

# Cjuandajyihí xí catsihindu San Mateo Tsëhé Jesucristu

---

## Xutachanga rë Jesucristu

**1** Xujun vihi ne, setaha xujun ñihí rë xutachanga rë Jesucristu, me xí tjë rë David, hacuaha tjë rë Abraham.

<sup>2</sup>Abraham ne, me vëhé xí xutachanga xí má nahmi rë Isaac. Isaac ne, me vëhé xí xutachanga xí má nahmi rë Jacob. Jacob ne, me vëhé xí xutachanga xí má nahmi rë Judá cojo hntsé cha. <sup>3</sup>Judá ne, nahmi má me tsëhé Fares cojo Zara; naa rë me ne, Tamar hmí rë. Fares ne, me vëhé xí xutachanga xí má nahmi rë Esrom. Esrom ne, me vëhé xí xutachanga xí má nahmi rë Aram. <sup>4</sup>Aram ne, me vëhé xí xutachanga xí má nahmi rë Aminadab me xí xutachanga xí má nahmi rë Naasón, me vëhé xí xutachanga xí má nahmi rë Salmón. <sup>5</sup>Salmón ne, nahmi rë Booz me; hane Rahab ne, naa rë me. Booz ne, nahmi má me tsëhé Obed. Naa rë me vë; má Rut. Obed ne, me vëhé xí xutachanga xí má nahmi rë Isaí. <sup>6</sup>Isaí ne, me vëhé xí xutachanga xí má nahmi rë David. David jan ne, me vëhé xí cavitexa nangui rë Israel. Hane David ne, me vëhé

xí xutachanga xí má nahmi rë Salomón. Naa rë Salomón ne, titjun chjuun rë Urías camá me.

<sup>7</sup>Salomón ne, me vëhé xí xutachanga xí má nahmi rë Roboam. Roboam ne, me vëhé xí xutachanga xí má nahmi rë Abías. Abías ne, me vëhé xí xutachanga xí má nahmi rë Asa. <sup>8</sup>Asa ne, me vëhé xí xutachanga xí má nahmi rë Josafat. Josafat ne, me vëhé xí xutachanga xí má nahmi rë Joram. Hane Joram ne, me vëhé xí xutachanga xí má nahmi rë Uzías. <sup>9</sup>Uzías ne, me vëhé xí xutachanga xí má nahmi rë Jotam. Jotam ne, me vëhé xí xutachanga xí má nahmi rë Acaz. Acaz ne, me vëhé xí xutachanga xí má nahmi rë Ezequías. <sup>10</sup>Ezequías ne, me vëhé xí xutachanga xí má nahmi rë Manasés. Manasés ne, me vëhé xí xutachanga xí má nahmi rë Amón. Amón ne, me vëhé xí xutachanga xí má nahmi rë Josias. <sup>11</sup>Josias ne, me vëhé xí xutachanga xí má nahmi rë Jeconías cojo hntsé cha. Nixtin hya ne, xutaxín ne, cafaxin me xuta nangui rë Israel, quijicojo me xuta jan nangui Babilonia.

<sup>12</sup>Hane xí cama quiji me Babilonia, Jeconías vë ne, camá

me vëhë xutachanga xi má nahmi rë Salatiel. Salatiel ne, me vëhë xi xutachanga xi má nahmi rë Zorobabel. <sup>13</sup>Zorobabel ne, me vëhë xi xutachanga xi má nahmi rë Abiud. Abiud ne, me vëhë xi xutachanga xi má nahmi rë Eliaquim. Eliaquim ne, me vëhë xi xutachanga xi má nahmi rë Azor. <sup>14</sup>Azor ne, me vëhë xi xutachanga xi má nahmi rë Sadoc. Sadoc ne, me vëhë xi xutachanga xi má nahmi rë Aquim. Aquim ne, me vëhë xi xutachanga xi má nahmi rë Eliud. <sup>15</sup>Eliud ne, me vëhë xi xutachanga xi má nahmi rë Eleazar. Eleazar ne, me vëhë xi xutachanga xi má nahmi rë Matán. Matán ne, me vëhë xi xutachanga xi má nahmi rë Jacob. <sup>16</sup>Jacob ne, má me nahmi rë José, xihin rë María naa rë Jesús me xi hacuaha yaha ñihi rë Mesías.

<sup>17</sup>Cuatjin camá xi cavatju teñuju ndiya xi cavatju xi cjin xuta tsetsin me nixtin rë Abraham hisca nixtin rë David. Hacuaha cama teñuju ndiya xi cjin xuta tsetsin me nixtin rë David hisca hya xi xutaxin jan ne, cafachaxin me xuta nangui rë Israel, quijicojo me xuta nangui Babilonia. Hane hacuaha camá teñuju ndiya tsëhë nixtin hya hisca nixtin xi catsin Mesías.

### Hya xi catsin Jesucristu

<sup>18</sup>Cuitjin camá nixtin xi catsin Jesucristu: María, naa rë Jesús ne, tacun vasen cjuavixan rë na cojo José. Peru chaja sa xi cjuaha xicjin na cojo me ne, casacu rë na quihndi ngatsë rë Hasen rë Nina. <sup>19</sup>José, me xi cuixan cojo na jan

ne, tyjahi me cojo cjuatacun rë me xcun Nina. Hane xi mijí scandi me cjuasava rë na, catsingatahacacun me xi taha hma ni ne tsismicacun me na. <sup>20</sup>Cuatjin catsingatahacacun me xi sahmi me peru hora hya ne, cafehetsejen ngu ángel rë Nina ngajñi chini rë me, hane cuitjin cachja ángel:

—José, ngaye quihndi tjë rë David, ximacjintacuín xi chjehentse María cuma chjuun riji na ta, sacuaha quihndi xi yaha na ne, ngatsë rë Hasen rë Nina, camá xi casacu rë na. <sup>21</sup>Tsin rë na ngu quihndi xihin. Quihndi vë ne, tehe ñihi rë Jesús. Cuatjin cjuaha ñihi ta, tsëhë xi cuaxëtje rë xuta rë tsëhë jyé rë me.

<sup>22</sup>Yëjë xcusun vihi ne cuatjin cama, cojo sa xi cuetjucaa jain cju xi cachja profeta nixtin hatsëë cuitjin:

<sup>23</sup>Ngayujun ni nutsujun ta ngu chjuun xungun ne, sacu rë na ngu quihndi xihin.

Quihndi jan ne, suañihi me Emanuel.

Emanuel ne, vëhë cju xi vijne: Nina ne, jiya me ngajñi naja.

<sup>24</sup>Ngajan xi hya xi cavasca rë José ne, casahmi me tutjin cachja ángel cojo me. Cafahatsja me María ne xi camá chjuun rë me na. <sup>25</sup>Peru hisca xi cavatju catsin quihndi ne, sehe caviyuju cojo xicjin me. Hane casuañihi rë me quihndi jan, Jesús.

**Ngu jo cha xi vechu cjuatacun rë ne, cavëë cha niñú tsëhë Jesucristu**

**2** Nixtin xi catsin Jesús nangui Belén, distritu Judea, nixtin hya ne, Herodes vitexa me xuta nangui vë. Hacuaha nixtin hya ne,

ngu jo cha xi vechutaha cjuatacun rë ne, cavetjun cha ladu vetjucaa tsuhi cafehe cha nandya Jerusalén.

<sup>2</sup>Hane cuitjin cachja cha:

—¿Jani sacu niji quihndi xi cuitexa nangui Israel? ta cahyin xi cavetjucaa niñú rë me ngajan ladu vetjucaa tsuhi. Hane nduvintjenguin me xi chjihinrcuin me.

<sup>3</sup>Hya xi cama ne, jemu cama xti rë Herodes xi tu cahndë me cjua jan; cojo xuta nangui Jerusalén ne, cama xti rë me. <sup>4</sup>Hya xi cama ne, Herodes ne, cajindayahava me yëjë ni nahmi xi matitjun cojo yëjë cha vicuya cjuachacun rë xuta nangui Israel. Sehe cavinenguise me ¿jani xi tsin xu me xi má Cristu? <sup>5</sup>Hane cuitjin cafayangui me:

—Ngajan nandya Belén, distritu Judea tsin ta cuatjin catsihindu profeta tsëhë nandya jan xi ngajan tsin quihndi:

<sup>6</sup>Ngaye, nandya Belén, ngaye nandya tsëhë xuta tjë rë Judá, hacuaha vengui chji ri xcun xuta matitjun nangui Judá. Ta ngajñi rë xuta rijji ne cuetjutsejen ngu me xi cuitexa rë xuta naha, xuta nangui Israel.

<sup>7</sup>Hya xi camá ne, Herodes ne, cajindayahama me cha xi vechu cjuatacun rë jan. Cafahataha rë me cha. ¿Mé hora cjuaquixi tsëhë mé nixtin camatsejen niñú jan?

<sup>8</sup>Ngaxtun vëhë ne, sehe cavitexa me cha xi cjue cha Belén. Hacuaha cuitjin cachja me cojo cha:

—Tangun ngajan Belén. Chjinengunsunndujun yëjë tsëhë quihndi. Hane xi sacu nuju

cjuaquixi ne, ningatjun ná cjua sehe cojo ngahan ne hacuaha cjué cjuahárcun quihndi.

<sup>9</sup>Xi cavihndë cha xi cuicun vi cjua jan, cavetju cha quiji cha. Hane niñú xi cavetjucaa ngajan ladu vetjucaa tsuhi jan ne, hacuaha quiji titjun hisca xi cavechu cahndë hiscan xi jiña quihndi, hane ngajan cvasén. <sup>10</sup>Hane xi cavëë cha niñú xi ngajan cvasen ne, jercu tu ndama camaha ni rë cha. <sup>11</sup>Hane xi cavisehen cha ndihya hiscan siu me ne, cavëë cha quihndi jan. Hacuaha cavëë cha naa rë me, xi hmí rë María. Sehe quiji cavixcuhnchi cha cafaharcun cha quihndi jan. Hane sehe cavuxaha cha hiscan hinchá rë cha cuatjo, hane casua cha oro cojo tyjungunsa cojo tyjungunjne xi hmí rë mira. <sup>12</sup>Hya xi cavatju vëhë ne, tsëhë xi cachja chini cojo rë cha xi cuyain cha taha ladu hiscan tacun Herodes ne, tahaxin cavuya cha nangui rë cha.

### Quiji me hiscan nangui Egipto

<sup>13</sup>Hya xi quiji cha xi vechu cjuatacun rë jan ne, cafehetsejen ngu ángel rë Nina ngajñi chini rë José, hane cachja cuitjin:

—Tisatjinhngue, tihincueje quihndi cojo naa rë. Tiyun hiscan nangui Egipto. Hane ngajan cuinechun hisca xi tsingátju cjua xi cuyun. Cuatjin nihñu ta tsëhë xi Herodes ne, cuanguise me quihndi xi tsiquehen me.

<sup>14</sup>Hane cavisatjenhnga me nixten quijicojo me quihndi jan cojo naa rë, cafe me Egipto. <sup>15</sup>Hane xi cafehe me ngajan Egipto ne, ngajan caviyujutaha me hisca nixtin xi

cahme Herodes. Cuatjin cama sehe hatuxa camachihin cjua xi catsingatju Nina cojo profeta rë me hatsëë nixtin. Cuitjin chja cjua jan: “Cajindáya rë quihndi naha xi nduvaniji tsëhë nangui Egipto.”

<sup>16</sup>Hya xi camachaya rë Herodes xi camá cavindacha cha xi vechu cjuatacun rë jan ne, jercu cama cjan rë me. Hane cavitexa me yo xi tsiquehen rë yëjë ni quihndi xihin xi cjëë cjuë jyan nu, yëjë ni quihndi nandya Belén cojo distritu rë. <sup>17</sup>Vëhë cjua xi cachja Nina xi catsihindu profeta Jeremías:

<sup>18</sup>Vinuhya rë cjuava ngajan nandya Ramá.

Jemu tjin cjuandusin.

Na Raquel ne, jihndava na ngatsë rë quihndi rë na.

Hane tsajin cjuetacun xi cuma rë na ta tsëhë xi ha cafë quihndi.

<sup>19</sup>Hane xi cavatju cahme Herodes ne, cavuya cafehetsejen nga ángel rë Nina ngajñi chini rë José ngajan Egipto ne, <sup>20</sup>cuitjin cachja: —Tisatjinhngue tihincueje quihndi cojo naa rë. Tihinniji nandya Israel. Tihin ta tsëhë xi ha cahme cha xi meje tsiquehen rë quihndi. Cuatjin cachja.

<sup>21</sup>Hya xi camá ne, cavisatjenhnga José ne, sehe cavetju me quijicojo me quihndi cojo naa rë, hane sehe cavisehen nga me nangui Israel. <sup>22</sup>Peru xi cahndë José xi Archelaus vitexa me distritu Judea ta me vëhë vitexa me ngojo rë nahmi rë me, Herodes, vëhë xi camacjincacun José mijí cjue me ngajan. Hane xi cachja chini cojo rë me ne, sehe cavisehen me distritu

Galilea. <sup>23</sup>Caviyujutaha me ngajan ngu nandya xi hmí rë Nasaret. Cuatjin cama sehe cuetjucaa cjua xi catsihindu profeta tsëhë me xi xuta ne, cuichja me xi Jesús ne, xuta Nasaret me.

### Cachja Juan Vitenda rë Xuta ngajan ngu xín tsëhë nandya

**3** Nixtin hya ne, cavetjucaa tsejen Juan Vitenda rë Xuta ngajan nguiñña tsëhë distritu Judea.

<sup>2</sup>Cuitjin catsiquihndë me xuta:

—Nindeyun cjuatacun nuju ta, camatiña nixtin xi Nina ne, cuitexa me ngasunhdë.

<sup>3</sup>Cuatjin tsëhë cha Juan vihi, cha vihi xi camahindu tsëhë cha xcun xujun xi chja cjua rë profeta Isaías xi chja cuitjin:

Cuitjin jercu hñu tsiquihndë ngu xuta ngajan hiscan jemu xín tsëhë nandya:

“Tuhun chjinu ndiya xi cuinduva Nina;

hacuaha ninguixun cjuatacun nuju tsëhë me.” Cuatjin cachja me.

<sup>4</sup>Tsjian rë Juan jan ne, tsja rë chu camellu camá hacuaha cojo ngu cinturón chuxin tsihñu me cahntsua me. Hane xi jinë me ne, chu nchahva cojo tsjen rë chu tusen.

<sup>5</sup>Hane jemu cjín xuta quijitjengui me Juan, xuta nandya Jerusalén, xuta distritu Judea cojo xuta xi siutahandee rë ndajyë Jordán.

<sup>6</sup>Xuta jan, xi cavijacun me jyé rë me cojo Nina camá cavitenda Juan me ngajan ndajyë Jordán.

<sup>7</sup>Peru xi cavutsejen Juan xi cjín xuta tifehe tixtenda me; cha tsëhë partidu fariseo cojo cha tsëhë

partidu saduceo ne cachja me cojo cha cuitjin:

—iNgayujun ni ngayun quihndi rë chu tsehen matsejen ne!, çyo cavinchangui nuju xi nihñu ngahñu xi cjuetjuntjun tsëhë castigu xi hatuxa tsingatju Nina? <sup>8</sup>Sá xi meje jain cjuetjuntjun matsejen ne, nihñu suvá cjuandaja sacuatjin sahmi xuta xi catsindeya jain me cjuatacun rë me. <sup>9</sup>Xicanujuun cahntsua xahasen nuju cjua vihi: “Ngayaan ne, tsajin mé cuma naja ta, tsëhë xi tjë rë Abraham ngayaan.” Xicanujuun cuatjin matsejen ta, nguehe cuichjá cojo nuju ta Nina ne, hisca cojo ndyojo xi cuicun vi ne, cuma sahmi me xi cumá tjë rë Abraham. <sup>10</sup>Chutsujun ta ngayun matsejen ne, tangun ngayun cojo yatjë xi ha quitahachjine quicharcu tyjama rë xi cuetsihin xti rë. Yëjë ni yatjë xi suaain tu xi ndaja matsejen ne, xti rë, sehe cueti. <sup>11</sup>Ngahan matsejen ne, cojo nandá ni tiviténda nuju, peru sehe cuinduva me xi hitsë sa jyë ngahñu tjin rë cjuatacun rë xi cuma ná ngahan, me xi hitsë sa jyë hnga cojo cjuatacun rë xi cuma ná ngahan. Hane me vëhë cueya me Hasen rë Nina cahntsua xahasen nuju, hacuaha tangun me sacuaha ngu ndihi xi tsityjahi rë cjuatacun nuju. <sup>12</sup>Me vëhë matsejen ne, sacuaha xi ha yahatsja me quicha xi tsicaha rë xtë rë trigu cojo sa xi cuma tyjahi ndaja trigu xi casechun rë tsëhë me, hacuaha cjuaya me trigu tyjahi xi cuinchandaja me, hane xtë rë jan matsejen ne, cuaca me xcun ndihi xi tsajin nixtin coho. —Cuatjin cachja Juan.

#### Caxtenda Jesús

<sup>13</sup>Nixtin hya ne, hacuaha cavetju Jesús tsëhë distritu Galilea hane

cafehe me ndajyë Jordán xi xtenda me. <sup>14</sup>Peru mijí sua Juan cahndé ta cachja me:

—Hitsë sa ndaja xi ngayun cuitendun ná. Hacuini xi ngahan cuitenda nuju.

<sup>15</sup>Ngajan xi cafayangui Jesús cuitjin:

—Jéya, cuatjin ndatjin xi cuma quihndë ta mameje rë xi cumachihin yëjë xcusun xi cavitexa Nina.

Hane catsingatihin Juan ne, cavitenda me Jesús. <sup>16</sup>Xi cama caxtenda Jesús ne, xi tu tivetju me tsëhë nandá jan ne, ngajan cavëë me xi ngahnga ne, catuxaha. Hane Hasen rë Nina ne, canduvajnetsejen casesun rcu me. Hane sacujayihi xcusun rë ngu paloma jyihi.

<sup>17</sup>Hacuaha canuhya rë ngu cjuagan ngahnga xi cachja cuitjin:

—Cha vihi xi quihndi naha xi hmú cáacun. Jemu ndama ná ngatsë rë cha.

#### Cafahachuva Satanás Jesús xi choho sahmi me

**4** Hya xi camá ne, Hasen rë Nina ne, quijiniiji xu cojo Jesús ngajan ngu xín tsëhë nandya ta ngajan cjuahachuva xitsehen me.

<sup>2</sup>Hya xi cama ne, Jesús ne, yachan nixtin cojo yachan nixten cajinii me niñu. Hya xi cavatju vëhë ne, jercu camavojo rë me.

<sup>3</sup>Sehe camatiñataha xu xitsehen xi cjuahachuva rë me. Cachja cojo rë me cuitjin:

—Sá xi ngaye jain xi Quihndi rë Nina ngaye ne, tinoje cojo ndyojo vihi ne, catama niñu. —Cuatjin xu cachja xitsehen cojo rë me.

<sup>4</sup>Peru cuitjin cafayangui me tsëhë xitsehen jan:

—Xcun xujun rë Nina ne, cuitjin camahindu: “Hacuiin suvá ngatsë rë niñu xi siu xuta cjuahñu ta hacuaha mameje rë me tsëhë yëjë ni cjua xi catsingatju Nina.”

<sup>5</sup>Sehe xitsehen jan quijicojo xu rë me nandya Jerusalén, nandya ximinchacun, quijisun xu me rcu cjin yungun xi matitjun <sup>6</sup>sehe ngajan xi cachja xu xitsehen:

—Sá xi ngaye jain xi Quihndi rë Nina ngaye ne, ningatjin yojo riji tsëhë ndyá ne hisca nangui. Ndaja hye ta tsajin mé cuma ri ta xcun xujun rë Nina ne, cuitjin chja:

Nina ne cuitexa me ángel rë me xi sahmi ri cuidado.

Cjuahántsa ri,

cojo sa xi ntsacui ne,

sacuinhuuaain rë cojo hisca ngu ndyojo.

<sup>7</sup>Ngajan xi cafayangui xu Jesús tsëhë xitsehen cuitjin:

—Hacuaha cuitjin chja xcun xujun rë Nina: “Mijí rë xi chjuhunchuvun Nina nuju.” —Cuatjin xu cachja Jesús.

<sup>8</sup>Hane ngu ndiya nga quijicojo xitsehen Jesús, quijicojo rë me ngu ndetjún hnga ne, sehe catsingacun xitsehen jan me jingujyë ni nandya tsëhë ngasunhdë cojo yëjë ni cjuanchina xi tjin rë. <sup>9</sup>Ngajan xi cachja xitsehen cojo rë me cuitjin:

—Suá ri yëjë nandya xi cuacún vë cojo cjuanchina rë. Hatuxa suá ri sa xi cuindove cuiticjexcuin nguehe xi chjehercuin ná.

<sup>10</sup>Sehe cafayangui Jesús tsëhë xitsehen cuitjin:

—Tihinxin Satanás, ta tsëhë xi xcun xujun rë Nina ne, cuitjin camahindu: “Meje rë xi chjuhuncun Nina naja, hacuaha ngu ni me vëhë xi meje rë xi nihñuchuhun hacutjin xi meje rë me.”

<sup>11</sup>Xi cuatjin xu cachja Jesús cojo xitsehen jan ne, cavetjuxin tsëhë me. Hane cafehe tjengui ángel me xi cjuahacuenda rë me.

**Jesús ne, vetsihin sahmi me  
xa ngajan distritu Galilea**

<sup>12</sup>Xi camachaya rë Jesús xi jiya Juan Vitenda rë Xuta ndavaya ne, quiji me distritu Galilea. <sup>13</sup>Hane cavetjuxin me tsëhë nandya Nasaret, quiji cavejña me nandya Capernaum. Nandya jan ne, tacun tjeheh rë ndajyë. Hane nandya jan ne tsëhë xuta tjë rë Zabulón cojo Neftalí. <sup>14</sup>Cuatjin cama sehe camachihin cjua xi camahindu xcun xujun xi chja cjua rë profeta Isaías xi chja cuitjin:

<sup>15</sup>Xuta xi viyuju me nangui rë Zabulón cojo Neftalí, nangui ngajan ngunda ndajyë Jordán, ngajan tjeheh rë ndachacun, tsëhë distritu Galilea, nangui rë xutaxín.

<sup>16</sup>Xuta jan xi jñu cjuatacun rë me, cavëë me ngu me xi sacuaha ngu ndihi seti xi sua rë me cjuahasan.

Xuta xi jemu tsavi siu me tsëhë cjuaveya, ndihi jan ne casua rë me hasen rë.

<sup>17</sup>Nixtin hya ne, Jesús ne, cavetsihin catsujyihya me cachja

me cojo xuta cjuar rē Nina. Cuitjin cachja me:

—Nindegun cjuatacun nuju ta tsēhē xi camatiña nixtin xi Nina ne cuitexa me ngasunhndē.

**Jesús ne, jindaya me cha xi tjun cumá xuta ladu rē me**

<sup>18</sup>Cama ngu nixtin xi tsujyihya me ngajan tjeheh laguna tsēhē Galilea ne, cavēē me jo me xi hntsé, ngu me xi hmí rē Simón cojo ngu me xi hmí rē Andrés. Titsingatjenya me changa ngajñi ndachacun, tsēhē xi hatuxa xá rē me xi faha me chu ti. <sup>19</sup>Hane Jesús ne, cachja me cojo me cuitjin:

—Nduvun cuanguen cojo ná. Hane cuicuyá nuju xi cuangun nuvun xuta xi cuisehen me ladu naha ngojo rē xi nuvun chu ti. —Cuatjin cachja me.

<sup>20</sup>Hane hora vēhē ni caviyuju me changa jan, hane cavetju me quiji me cojo Jesús.

<sup>21</sup>Hitsē sa nguvan ne, cavēē Jesús jo cha xi hacuaha hntsé: Jacobo cojo Juan, cha quihndi rē Zebedeo. Hinchá cha cahntsua barcu cojo nahmi rē cha, ngajan tifuyataha cha changa rē cha. Hacuaha cajindaya Jesús cha xi cjuecojo me cha. <sup>22</sup>Sehe caviyuju cha barcu jan, hane cavejña cha nahmi rē cha quiji cha cojo Jesús.

<sup>23</sup>Hane Jesús ne, catsujyihya me yējē ni ladu tsēhē distritu Galilea. Xi cavisehen me yungun ne, cavicuya me xuta, cachja me cojo xuta cjuandajyihí tsēhē gobiernu xi sahmi Nina. Hacuaha catsirqui me xuta hmu rē; camandaja xuta tsēhē yējē ni chíhin cojo tsēhē

yējē ni cjuahmu rē me. <sup>24</sup>Hane cavitsojo cjuar tsēhē cjuarcun xi casahmi Jesús. Cavitsojo cjuar jan hisca yējē nangui xi hmí rē Siria. Hane xuta ne, cafehetjengui me Jesús yaha me xuta hmu rē tsēhē yējē xcusun chíhin hane catsirqui me. Hacuaha catsirqui me xuta xi hinchá xitseheh cahntsua xahasen rē me cojo xuta xi má rē me chajan cojo xuta xi cahme yojo rē. <sup>25</sup>Hane quijitjengui xutacjín jan Jesús ne, xuta tsēhē cahndé xi cuicun vi: tsēhē tē nandya xi tsēhē Decápolis, cojo nandya Jerusalén, cojo yahnga sa xuta tsēhē distritu Judea, cojo xuta tsēhē nangui ngunda tsēhē ndajyē Jordán.

**Xuta xi ndaja tsēhē cojo xuta xi hmu tsēhē**

**5** Hya xi cavutsejen Jesús xi camatangun xutacjín jan ne, quijinihi me ngu ndetjun, hane xi cavéjña Jesús ne, casahmitiña xuta tsēhē Jesús. <sup>2</sup>Sehe cavetsihni cavicuya me xuta jan cuitjin:

<sup>3</sup>—Jemu ndaja tsēhē me xi machaya rē me xi tsichaja sa rē cjuatacun rē me xcun Nina matsejen ta satē rē me gobiernu xi sahmi Nina.

<sup>4</sup>Jemu ndaja tsēhē me xi jihndava me tsēhē cjuachoho matsejen ta Nina sua rē me cjuetacun.

<sup>5</sup>Jemu ndaja tsēhē xuta jeya, xuta xi hacuicun xta me matsejen ta, cjuahatsja me nangui xi sua Nina.

<sup>6</sup>Jemu ndaja tsēhē me xi sacuaha sahmi yahnga xuta xi vojo rē xi fi tjengui rē comida, cuanitjin tjengui me xcusun xi cuma tyjahí cjuatacun rē me xcun Nina matsejen ta,

cuechu nixtin xi cuiyujuchihin cjuatacun rë me.

<sup>7</sup>Jemu ndaja tsëhë me xi tjin rë cjuayumatacun cojo xuta, ta hacuaha cjuahatsja me cjuayumatacun tsëhë Nina.

<sup>8</sup>Jemu ndaja tsëhë me xi tjin ngu cjuatacun tyjahi cahntsua xahasen rë me matsejen ta, scuëë me Nina.

<sup>9</sup>Jemu ndaja tsëhë me xi tsinguejyu rë xuta xi chohovëë xicjin me matsejen ta, me vëhë jan ne, cuichja Nina xi quihndi rë me.

<sup>10</sup>Jemu ndaja tsëhë me hya xi tsujyihya tjengui xuta me cojo cjuahngatacun ngatsë rë xi tjin rë me ngu cjuatacun cojo Nina matsejen, ta satë rë me gobiernu xi sahmi Nina.

<sup>11</sup>Jemu ndaja tsujun ngayun ne sá xi ngatsë naha choho cuichja xuta tsujun o sá xi tsujyihya tjengui nuju xuta cojo cjuahngatacun o sá xi cojo cjuandesu tsicanijjyë me ngayun. <sup>12</sup>Nixtin hya ne, jemu catama sua rë xahasen nuju ngatsë rë cjuañihi vë ta jemu jyë ngu cjuandaja xi tacunya nuju ngajan ngahnga. Cuanitjin ni choho casahmi xutachanga naja cojo profeta rë Nina xi caviyuju hatsëë nixtin.

**Xuta ne, meje rë xi sahmi  
me sacuaha naxa**

<sup>13</sup>Ngayun, tjin hacutjin machji rëhë ngayun ngajñi rë xuta sacuaha sahmi naxa xi sahmi xtya rë ngu xichine. Ta sá xi naxa cjuë xtya rë ne, tsajin sa ngu xcusun xi cuma sahmi xtya rë. Hane sá xi cjuë xtya rë ne, tsajin me machji rëhë ta, scandi ni xuta, ngajan ni sune me.

**Má naja ndihi rë ngasunhndë**

<sup>14</sup>Cuanitjin ne, tjin hacutjin machji rëhë ngayun ngajñi rë xuta sacuaha machji rëhë ngu ndihi xi sua hasen rë. Ta sá xi ndetjun tacun nandya matsejen ne, hatuxa tsejen; tsajin me xi cuatsa rë. <sup>15</sup>Cuanitjin ne, hacuaha tsajin ngu xuta xi ha xcun xi ha cavetaha rë me ngu ndihi ne, sehe cjuaha me cueyahma me ngahma rë ngu caxa. Hatuxa cjuaha me cueñatsejen me cahndé rë cojo sa xi xuta xi siu me hiscan xi seti ndihi jan ne, cuechu hasen rë. <sup>16</sup>Hacuanitjin chuva vëhë, meje rë xi nihñu cjuandaja xi scuëë xuta xcusun xi nihñu hane ngatsë rë xcusun jan ne, sahmi jyë me sahmi hnga me Nahmi nuju xi tacun me ngahnga.

**Cjua xi cachja Jesús tsëhë  
ley rë xuta tjë rë Israel**

<sup>17</sup>Xi caningatuuntacuun matsejen xi nduvá tsinguétsun ngahñu rë ley xi catsihindu xutachanga naja Moisés o cjua xi cachja profeta. Cahndé rë xi tsinguétsun ne, sahmechihin cjua jan. <sup>18</sup>Hatuxa cuichjá cojo nuju cjuaquixi ta hya xi tacun cuaha ngahnga ne tacun cuaha ngasunhndë ne, cumaji chjahanxin rë cjua rë ley jan cojo yëjë ni letra rë ta, cuejña cuaha hiscan cumachihin cjua rë. <sup>19</sup>Vëhë xi tu yo ni xi sahmicuendaain tsëhë hisca ngu rquí cjua rë, hane sá cuinchangui me yahnga xuta xi cuanitjin sahmi me, chuva cuengui chji rë me hya xi sahmi Nina gobiernu. Peru tu yo ni me xi cjuahacuenda me



hacuaha tsingacun me xuta xi cjuahacuenda me ley jan, me vëhë cuma titjun me hya xi sahmi Nina gobiernu. <sup>20</sup>Nguehe cuichjá cojo nuju ngayun ta meje rë xi hitsë sa tyjahi cjuatacun nuju xi cumá rë cjuatacun rë xuta xi vicuya me ley o sá xi xuta partidü fariseo, ta sá tsajin ne, satiin nuju gobiernu xi sahmi Nina.

**Cjua xi cavicuya Jesús tsëhë  
xuta xi hngacacun**

<sup>21</sup>Ha hyun cjua xi cafaha xuta hatsëë nixtin xi chja xi canicuun xingun hacuaha chja xi yo xi tsiquehen xicjin matsejen ne, cjue me xcun juez xi tsichuva me jyé rë me. <sup>22</sup>Peru cuichjá cojo nuju xi hisca yo xi macjan rë cojo xicjin ne, satë rë xi tsichuva me. Hane yo xi chjataha xicjin ne, cjue xcun juez xi matitjun. Cuanitjin yo me xi cuichja tsëhë xuta: “Ngarca ngayun”, cuechji me tsëhë jyé rë me ngajan xcun ndihi xi tsajin nixtin coho.

<sup>23</sup>Ngatsë rë vihi, sá xi hora xi vejñu chjë nuju ngasunscun ne, sá xi tu ñahñu ni vitsjen nuju xi choho canihñu cojo xingun <sup>24</sup>ngajan catejñavasen chjë nuju, titjun cuangun tjengun xingun, hane chjayun rë me cjuaninchataha hane xi camandaja yun cojo me, sehe cuyun cuejñu chjë nuju jan.

<sup>25</sup>Sá ndiya tivangun cojo xuta xi meje cuinchajyë nuju xcun xutaxa rë ne, meje rë xi cuisiajmuchuhun cojo me, cojo sa xi ngajñi nuju cuma chihin ta sá tsajin ne, cjuecojo nuju me xcun juez. Hane juez matsejen ne, squindaya me mayu sehe sahmi nuju me

entregadu, hane cjue cueya nuju me ndavaya. <sup>26</sup>Ta cuichjá cojo nuju cjuaquixi ta hatuxa tsajin nixtin xi cuetjun tsëhë ngajan jinguyëjë rë xi cjëë cuechjun yëjë ni tujún xi quitjun.

**Cjua xi cavicuya Jesús tsëhë  
xuta xi sahmi cjuatsehen cojo  
rë ngu xi hacuiin tsëhë me**

<sup>27</sup>Ha hyun cjua xi cafaha xuta hatsëë nixtin xi chja cuitjin: “Xicanihñuu cjuatsehen cojo rë ngu chjuun o cojo rë ngu xihin xi hacuiin tsujun.” <sup>28</sup>Peru cuichjá cojo nuju xi hisca xi ngu xihin xi vutsejen me ngu chjuun xi macacun me cojo na, ngajñi cjuatacun rë me ne, ha casahmi me cjuatsehen cojo ran.

<sup>29</sup>Hindë sá xi cjuatacun nuju meje rë xi nihñu ngu jyé tsëhë xcusun xi chutsujun cojo tuxcuun ladu quixi, hitsë sa ndaja tsujun sá xi chjuhunxun tuxcuun jan chandunxun cojo sa xi hacuiin tsitsehen nuju, ta hitsë sa vengui chji rëhë xi ma chaja nuju ngu rquí yojo nuju hane hacuiin xi cuangun jingu hiscan xi má hasen rë nima castigu. <sup>30</sup>Cuanitjin ne, sá xi cjuatacun nuju meje rë xi nihñu ngu jyé cojo ntsun quixi ne, hitsë sa venguichji rëhë xi chandunxun ntsun jan ta hitsë sa ndaja tsujun xi machaja ngu rquí yojo nuju tsëhë xi cuangun jingu hiscan xi má hasen rë nima castigu.

**Jyé rë xuta xi tsismi xicjin me  
sehe cuixan cojo jingu sa**

<sup>31</sup>Hacuaha cafaha xuta hatsëë nixtin cjua xi chja cuitjin: “Ngu

cha xi tsismi chjuun rë ne catejña cha ngu xujun tsja chjuun jan xi ha quihndë mijí rë cha na.”<sup>32</sup> Peru nguehe cuichjá cojo nuju ta yo xi tsismi chjuun rë handasa ndastu mé cjuatsehen casahmi chjuun jan cojo ngu xihin xi hacjahi, hacuaha tjin rë me jyé ta sehe ngatsë rë xi catsismi me na ne sahmi chjuun jan cjuatsehen. Hacuaha yo xi cuixan cojo chjuun jan ne, tangun jyé rë cojo ngu xi sahmi cjuatsehen cojo ngu chjuun xi hacuiin chjuun rë.

#### Hacutjin meje rë xi sua cjuaquixi naja

<sup>33</sup>Hacuaha hyun cjua xi cafaha xuta hatsëë nixtin xi chja cuitjin: Hya xi cuinújun: “Vëë Nina”, hatuxa sahmi ngu jyë xi nihñuchuhun cjua xi canújun.<sup>34</sup> Peru nguehe cuichjá cojo nuju ta hora xi cuisiajmu cojo xingun ne, hacuiin cuinújun xi vëë Nina, hacuiin cuinújun xi vëë sa jingu sa quihndi ngasunhdë. Cuinujuun xi vëë ngahnga ta ngahnga ne, tacun Nina xi vitexa me.<sup>35</sup> Hacuaha cuinujuun xi vëë ngasunhdë ta ngasunhdë ne, tangun sacuaha ngu yatë hiscan xi tine ntsacu Nina. Cuinujuun xi vëë Jerusalén ta Jerusalén ne, nandya xi tsëhë Nina, Me xi Matitjun.<sup>36</sup> Cuinujuun cuitjin: “Sá xi quixiin jain cjua naha ne, catinduva ngu cjuacjintacun xi cuatjun”, ta tsëhë xi ngayun ne, hisca hitsë cumaji cuitexun sá xi cuma jma tsjarcun o sá xi cuma tyjava.<sup>37</sup> Hya xi cuisiajmu, sá xi “joho” nújun ne, cuanitjin ni cuitejña; o sá xi “jéya” nújun, hacuaha cuanitjin ni ndatjin ta, sá

xi vetjutë visiajmu cjua cjín jan ne, cjua cjín jan ne, nduva tsëhë cjuatsehen.

#### Meje rë xi nihmutacún xuta xi chohovëë naja

<sup>38</sup>Hyun cjua xi cafaha xuta hatsëë xi chja cuitjin: Cha xi cuahaxin tuxcun xicjin ne, hacuaha chjahaxin rë tsëhë cha. Cuanitjin cha xi cuahaxin nehño xicjin ne, hacuaha cuanitjin ni chjahaxin rë nehño cha.<sup>39</sup> Peru nguehe cuichjá cojo nuju ta, canicyuun cjuatsehen. Sá xi tjin yo xi vanguihmu nuju, yo xi vajaya ngu ladu tsa nuju matsejen ne, nicuyun sa ngu ladu catajaya.<sup>40</sup> Cuanitjin ne, sá xi tjin yo xi cjuecojo nuju xcun juez xi fahataha chingá nuju matsejen ne, hacuaha tuhun rë me cojo yëjë ni tsjian hasu nuju.<sup>41</sup> Cuanitjin ne sá xi ngu xuta ne, sahmi nuju me ngu jyë xi chanuju chaha rë me ngu kilómetro, cahndé rë ngu ni, tanguncujun jo kilómetro.<sup>42</sup> Yëjë ni xuta xi fehya nuju me mé xi machaja rë me matsejen ne, tuhun rë me. Hane sá xi scuxetaha nuju me, tuhun rë me.

<sup>43</sup>Hyun cjua xi cafaha xuta hatsëë nixtin xi chja cuitjin: “Nihmutacún xuta xi siutahndee nuju; choho hyun xuta xi má condra nuju.”<sup>44</sup> Peru cuichjá cojo nuju ta, hacuaha nihmutacún xuta xi má condra nuju; ndaja nihño cojo xuta xi choho vëë nuju me. Nújunyumuntuhun rë xuta xi tsujyihya tjengui nuju me cojo cjuahngatacun.<sup>45</sup> Sá xi cuatjin nihño ne, cumatsejen xi chjayunngun sacuaha sahmi Nahmi

nuju xi tacun ngahnga ta, Nina ne, sahmi me xi ngu chihin ni vetjucaa tsuhi xi casahmi me hane vechu hasen rë hiscan siu xuta tsehen hacuaha hiscan siu xuta ndaja. Hacuaha sahmi me xi vaha tsi xcun jnu rë xuta xi tjin xi cun rë me, hane hacuaha xcun jnu rë xuta xi tsajin xi cun rë me xcun Nina.

<sup>46</sup>Tsajin yo xi sua chj́ nuju tsëhë xi hmutacún xuta xi hmucacun nuju me matsejen, tsëhë xi hacuaha hisca cha faha tujúnsa (xi jemu vaxë cha tujún) matsejen ne, hmucacun cha xuta xi hmucacun rë cha. <sup>47</sup>Hacuanitjin ne, sá xi suvun cuinújun nina cojo xuta nuju ne, ¿há hitsë sa ndaja yun xi cuma rë yahnga xuta? ¡Jéya! Hisca xuta xi macjaain rë me Nina ne, tjin rë me xcusun ndaja vë. <sup>48</sup>Vëhë xi mameje rë xi tangun cojo ngasunhdë nuju cojo ngu xcusun xi tyjahi chichihin ni, cumatangun xcusun nuju cojo xcusun rë Nina xi tyjahi chichihin cjuatacun rë me.

**Jesús ne, vicuya me tsëhë  
cjuandaja xi meje rë sahmi xuta**

**6** 'Hya xi nihñu ngu cjuandaja ne, nihñu nguñajatacun, hacuain nihñu tsëhë xi scuëë nuju xuta; ta sá tsajin ne, ndastu me chji sacu tsëhë Nahmi nuju xi tacun ngahnga. <sup>2</sup>Cuanitjin ni sacuaha cjua vë, hya xi tuhun ngu caridad matsejen ne, xi canijanuu ngu tyjo xi tuhun cumachaya rë xuta cjuandaja jan. Hacuaha cuatjin sahmi xuta xi jo xcun jo hntsua me hya xi sua me caridad ngajan yungun o ndiya ngatsë rë xi vaxëndaja xuta me. Tichjá cojo nuju

ta ha vëhë ni chji sacu rë me. <sup>3</sup>Vëhë xi ngayun ne, hya xi tuhun caridad ne, catuun cumachaya rë ntsun ladu xcun mé xi tuhun cojo ntsun ladu quixi. <sup>4</sup>Cuatjin hya xi tuhun caridad ne, tuhunhmu matsejen ne, hane xi cuatjin nihñu ne, Nahmi nuju xi tacun ngahnga ne xi cavëë me cjuandaja xi canihñu ne, sua me chji nuju.

**Jesús ne, vicuya me  
hacutjin nihña oración**

<sup>5</sup>Hacuaha hya xi nihñu oración, xi canihñuu sacuaha xuta xi jo xcun jo hntsua me ta me vëhë ne, jemu meje sahmi me oración cahntsua yungun cojo sa hiscan sahmi cru ndiya të hiscan xi scuëë xuta me. Nguehe cuichjá cojo nuju ta ha vëhë ni chji sacu rë me. <sup>6</sup>Vëhë xi ngayun ne, hya xi nihñu oración ne, techjun tingotjo ndya nuju hane tangun cahncun, ngajan hma nihñu oración cojo Nahmi nuju xi tacun ngahnga ta ngu ni me vëhë xi tacun me cojo nuju. Hane Nahmi nuju jan xi vëë me yëjë xcusun xi hincha hma ne, sua me chji nuju.

<sup>7</sup>Hacuaha hya xi nihñu oración, caveyunnanguun ngu cjua xi hisca suvun vijniircun sacuaha xcusun xi sahmi xuta xi hvíin me cjua rë Nina, ta xi má rë me vë ne, xi hitsë cjin cjua cuichja me ne, hacuaha hitsë sa cuahacuenda Nina tsëhë me. <sup>8</sup>Mijí rë xi nihñu xcusun vëhë, ta hisca chaja sa xi chjahyun rë Nahmi nuju xi tacun ngahnga ne, ha vëë me mé xcusun xi mameje nuju. <sup>9</sup>Cuanitjin nújun hya xi nihñu oración:

Ngayun Nahmi niji xi nechun ngahnga ne,

meje rë xi ngayijin ni xuta  
ngasunhndë chjihinrcuin nuju.

<sup>10</sup> Nduvun nihñu niji gobiernu.

Catamachihin cjuatacun nuju  
nguehe ngasunhndë sacuaha  
ngahnga xi ha camachihin.

<sup>11</sup> Nchunchujun ni ne, tuhun niñu  
xi xini.

<sup>12</sup> Ninchatuhun niji tsëhë yëjë ni  
jyé niji ta hacuaha ngayin  
suvin ni tininchatihin rë xuta  
xi choho sahmi me cojo niji.

<sup>13</sup> Caningatjuun xi chjaháchuva  
niji cojo cjuatacun niji ta,  
tuhun niji ngahñu xi cuma  
cuetjinxin tsëhë cjuatsehen.

Tsujun suvun gobiernu cojo  
ngahñu, hacuaha tsujun ni  
hasen rë ngahñu cjuatacun nuju.  
Tsujun yëjë vë, yëjë nu, yëjë  
nixtin.

<sup>14</sup> Hya xi cajnetaha oración  
jan, cachja sa Jesús cuitjin: sá  
xi ninchatuhun xuta xi choho  
casahmi me cojo nuju ne, hacuaha  
Nahmi nuju xi tacun ngahnga ne,  
tsinchataha me jyé nuju, <sup>15</sup> peru  
sá xi ninchatuun xuta xi choho  
casahmi me cojo nuju ne, hacuaha  
Nahmi nuju jan ne, tsinchataain me  
jyé nuju.

**Jesús vicuya me tsëhë hya  
xi nechun xun rë Nina**

<sup>16</sup> Ngayun ne, nixtin xi nechun  
xun rë Nina ne, nihñuu va xcusun  
nuju sacuaha sahmi xuta xi jo  
xcun jo hntsua me ta sahmi va me  
xcusun rë me, ta me vëhë ne, hisca  
catsindeya me xcusun rë me sehe  
cumatsejen xi tacun me xun rë  
Nina. Cuichjá quixi cojo nuju ta ha  
vëhë chji xi sacu rë me. <sup>17</sup> Vëhë xi

ngayun ne, hya xi nechun xun rë  
Nina ne, tinchacjun, nihñu tyjahi  
yojo nuju. <sup>18</sup> Cuatjin nihñu cojo sa  
xi tsajin yo vëë rë xi nechun xun rë  
Nina, ta suva Nina, Nahmi nuju vëë  
me. Hane me vëhë ne cuechji me  
yun.

**Cjuanchina xi tacunya ngahnga**

<sup>19</sup> Cavetjuun cjuanchina nuju  
nguehe ngasunhndë, ta guehe  
ne, sahmi dañu chu xavi cojo  
xutsë. Nguehe ne cuma scuxahaya  
cha chëjë, hane sehe tsichëjë  
cha. <sup>20</sup> Hitsë sa ndaja ne, tetjún  
cjuanchina ngajan ngahnga ta  
ngajan ne tsajin dañu xi sahmi  
chu xavi cojo sa xutsë. Ngajan ne  
scuxaaain cha sehe xi tsichëjë cha.  
<sup>21</sup> Cuatjin meje rë xi ngajan cuetjun  
tsujun ta, tsëhë xi hiscan tetjo  
cjuanchina nuju ne, hacuaha ngajan  
quitaha cjuatacun nuju cojo.

**Ndihi rë yojo naja**

<sup>22</sup> Tuxcuun matsejen ne, vëhë xi  
sacuaha ndihi rë yojo naja. Vëhë xi  
hya xi tuxcuun ndacun ne, hatuxa  
seya cjuahasen cahntsua yojo naja.  
<sup>23</sup> Peru sá xi tuxcuun hmu matsejen  
ne, hacuaha ma jñu cahntsua  
yojo naja. Sacuaha hasen xi jiya  
cahntsua yojo naja ne, sá xi hacuain  
hasen xi cjuaquixi jain ta, suva jñú  
ne, ijercu tu jñú camahani cuma sa!

**Tsajin yo xi ma fahacuenda xa  
tsëhë Nina cojo tsëhë cjuanchina**

<sup>24</sup> Tsajin yo xi ma fahacuenda xa  
tsëhë jo patrón ta, tsëhë xi choho  
scuëë rë patrón xi tjun hane tsihmu  
cacun rë patrón xi majo jan. O sá  
tsajin ne, jemu cuetaha yojo rë cojo

patrón xi tjun hane patrón xi majo jan ne, hisca sahmicuendaain rë. Vêhë xi xi ngu tangun ni ne, cumaji nihñu hacutjin xi meje rë Nina cojo hacutjin meje rë cjuanchina tsehen xi tsêhë ngasunhndë.

### Sahmi cuidadu Nina xuta ladu rë me

<sup>25</sup>Vêhë xi cuichjá cojo nuju ta hacuiin cuityjanguntacun sá sacu o sá sacuiin mé xcusun xi xinu xi sua nuju ngahñu. Hacuaha hacuiin cuityjanguntacun sá sacu o sá sacuiin tsjian xi chujun. Hitsë sa vengui chji rë cjuahñu nuju xi cumá rë xi chinu, hacuaha hitsë sa vengui chji rë yojo nuju xi cumá rë tsjian xi chujun. <sup>26</sup>Chutsujun chu nisë xi vitjen chu ngahnga ta hacuiin tsitjê chu, hacuiin fanchi chu, hacuaha tsajin rë chu ndyahnga hiscan cuinchandaja chu xi sinë chu, peru Nahmi nuju xi tacun me ngahnga ne, tsicjen me chu. Ngayun ne, hitsë sa vengui chji nuju xi cumá rë chu nisë vë. <sup>27</sup>Hacuaha tsajin hisca xi ngu xuta xi cuma cuesuntaha me cjuahñu rë me hisca ngu hora ta hacuiin cavatsë chji me cjuahñu rë me. Tu mahya ne xi tjercu vityanguicacun me.

<sup>28</sup>Cuanitjin ne, ¿mé má chji rëhë xi cuityjanguntacun tsêhë tsjian xi chujun? Chutsujun naxu líriu xi vetju nguijnã ta tsihyaain nachjun hacuaha fahyaain tsjian rë. <sup>29</sup>Peru ngahan cuichjá cojo nuju ta tsjian rë xutachanga naja Salomón ne, handasa jercu ndacun camahani, peru hitsë sa ndajyihitsejen ngu naxu vëhë xi cuma rë tsjian jan. <sup>30</sup>Sá xi cuatjin tsicaja Nina xca nguijnã xi ngu nixtin ne

siutaha nguijnã, hane xi tu cuma nchujun nga ne, cueti ne, hitsë guan sa ngayun xi hatuxa tsicaja nuju me. Peru ngayun ne, cjëë cumangutacunndujun cojo me.

<sup>31</sup>Vêhë xi hacuiin cumacjintacún hane cuinengunsuun cuitjin: “¿Mé comida xini? o sá ¿jani sacu niji xi sihin? o sá ¿mé tsjian chijin?”

<sup>32</sup>Hacuiin ta, tsêhë xi xcusun vëhë ne, xuta xi hvíin me cja rë Nina ne, me vëhë xi vityanguicacun me xcusun vëhë. Peru ngayun ne, Nina Nahmi naja ne, ha vëë me xi machaja nuju xcusun vëhë.

<sup>33</sup>Tityjanguntacun hacuaha nechunyun rë gobiernu xi sahmi Nina, hacuaha catama tangun cjuatacun nuju cojo cjuatacun rë me ne, hane yëjë ni xcusun vëhë ne, quitahacoo sa sacú nuju. <sup>34</sup>Cuanitjin ne, hacuiin cumacjintacún tsêhë mé xi cuma cuatju nchujuni, ta xi cumá rë nchujuni matsejen ne, haya yaha cjuacjintacun rë. Ngu nixtin ngu nixtin ne, chjuhun cuendun cjuacjintacun rë ta jima ngu nixtin cojo tsêhë.

### Mijí rë xi nichuvan jingu sa xuta cojo cjuatacun rë me

**7** Hacuiin nichuvun jingu sa xuta cojo cjuatacun rë me, sehe hacuiin tsichuva Nina ngayun. <sup>2</sup>Canichuvuun ta sá tsajin ne, chuva xi quixi yun cojo xuta ne, hacuaha cuanitjin quixi Nina cojo nuju; hacuaha chuva xi nichuvunyun matsejen ne, vëhë ni tsichuva Nina yun. <sup>3</sup>¿Hacutjin má xi matsejen nuju xtë xi jiya tuxcun xingun? ta ngayun ne hitsë

sa jyë xi jiya túxcun. <sup>4</sup>¿Hacutjin má xi cuma cuinújun cojo xingun xi meje naxun xtë xi jiya tuxcun me jinguyëjë rë xi suvun matsejen ne, machayiin nuju xi hitsë sa jyë xta xi jiya túxcun vë ni? <sup>5</sup>Ngayun xuta xi jo xcun jo hntsua ne, naxun titjun xtë jyë xi jiya túxcun vë, sehe cumatsejenndaja nuju xtë xi jiya tuxcun xingun cojo sa xi cuma naxun.

<sup>6</sup>Sá xi tjin nuju mé xi venguichji rëhë sacuaaha tjin rë cjuandaja xi casua Nina yun, tetjuhunnndujun hacuiin tu yo ni tuhun rë ta sá tsajin ne, xuta jan ne, tsitjungui me xi ngayun jemu ximinchacun xi cuma nuju. Hacuaaha cuichjataha nuju me.

### **Chjahyun rë Nina mé xi machaja nuju**

<sup>7</sup>Chjahyun rë Nina, hane sua nuju me. Tinchunsun, hane sacú nuju. Tinújun hacuaaha chjahyun cahndé, hane Nina sua me cahndé xi cuisuhun cuinújun cjuacjintacun nuju. <sup>8</sup>Cuatjin nihñu ta, yëjë ni xuta xi fehya rë me ne, cuahatsja me, hane yo xi vanguise ne, sacú rë me, hane yo xi chja hacuaaha fehya cahndé me ne, sacú cahndé cuisehen me.

<sup>9</sup>¿Há tjin ngu nahmi xi, hya xi quihndi rë me cjuehya ngu niñu ne, cahndé rë xi vëhë ne, sua me ngu ndyojo, <sup>10</sup>o sá xi cjuehya quihndi yojo rë chu ti ne, cahndé rë vëhë ne, sua me ngu yë? <sup>11</sup>Sá xi ngayun xi xuta jyé yun ma tuhun rë quihndi nuju xcusun xi ndaja. Hitsë guan sa Nina Nahmi naja xi tacun me ngahnga xi jyë hnga me cojo

cjuandaja rë me ne, me vëhë vëë me mé cuatjo ndaja xi cuma sua me xuta xi cjuehya rë me.

<sup>12</sup>Sacuatjin xi meje nuju xi sahmi xuta cojo nuju matsejen ne, hacuaaha cuanitjin ni nihñu cojo rë me: cuatjin nihñu ta cojo ngu xcusun ni xi tinihñu vëhë ne, ngayun tinihñuchuhun yëjë ni cjuarë ley cojo yëjë ni cjuarë catsihindu profeta.

### **Ejemplu tsëhë tingotjo xcu**

<sup>13</sup>Cuisuhun hiscan sahmi Nina gobiernu sá xi cuisuhun tingotjo xcu ta, tsëhë xi sá xi cuisuhun táha tingotjo të o ndiya xi cjin me vatjun me ne; vëhë ni cjuecojo nuju cjuaveya hiscan xi jemu cjin xuta cjue me. <sup>14</sup>Ta tingotjo xcu o ndiya hndë ne, vëhë xi cjue cojo nuju hisca xi sacú nuju cjuahñu. Jemu chuva xuta xi sacú rë me tingotjo xcu jan.

### **Tsejen mé xcusun xuta me ngatsë rë mé xi sahmi me**

<sup>15</sup>Cuidadu tsëhë profeta ndacha ta xi tjengui nuju me, jeya tsejen xcusun rë me sacuaaha xcusun rë chu tsánga, peru quixiin vëhë ta suva cjuandacha ta xahasen rë me ne, quitsë rë cjuatsehen sacuaaha cahntsua xahasen rë chu lobo. <sup>16</sup>Tsejen mé xcusun xuta me ngatsë rë xcusun xi sahmi me. Sacuaaha ngu ya ne, tsejen mé xcusun rë ngatsë rë tu xi sua. Sacuiin rë xuta uva tsëhë ya nahyálatu, hacuaaha sacuiin rë xuta tuhaxi xi hmí higo tsëhë nahyándehya. <sup>17</sup>Quixi jain ta ngu yatjë xi ndaja ne, sua tú xi ndaja,

hacuaha ngu ya xi machjiriin ne, hacuaha machjiriin tu rë. <sup>18</sup>Vëhë xi ngu yatjë ndaja ne, cumaji sua tú xi machjiriin, hacuaha ngu ya xi machjiriin ne, cumaji sua tú xi ndaja. <sup>19</sup>Hane yatjë xi machjiriin tú rë ne, xtíjñi rë tsëhë xi ndaja sehe cueti. <sup>20</sup>Cuanitjin xuta ne, tutjin rë yatë vë ne, cuatjin rë me ta, tsejen xcusun rë xahasen rë me ngatsë rë xcusun xi sahmi me.

**Cachja Jesús xi hacuiin yëjë ni xuta cuisehen me gobiernu xi sahmi Nina**

<sup>21</sup>Tjin yo me xi cuichjacojo ná ta nai rë me ngahan, peru cuiisiin me gobiernu xi sahmi Nina nahmi naha; ta ngajan cuisehen suva xuta xi sahmichihin me cjuatacun xi vitexa Nahmi naha xi tacun me ngahnga. <sup>22</sup>Vëhë xi handasa xi jemu cjin me cuichja me nixtin hya jan cuitjin ta: “Nai naha, ngatsë rë xi hñu ngayun, vëhë xi caveyinnangui ñihi nuju ne canújin cjua rë Nina, hacuaha xi canújin ñihi nuju ne, canaxinxin xitsehen, hane cojo ngahñu rë ñihi nuju cama canihñi cjuarcun.” Cuatjin cuichja me nixtin hya. <sup>23</sup>Ngajan xi ngahan ne, cuitjin cjuayanguë tsëhë me nixtin hya: “Tángunxun tsahan ta hveen yo ngayun, ngayun xi nihñu cjuatsehen.”

**Ejemplu tsëhë jo ndihya**

<sup>24</sup>Yahnga xuta xi visiñuju me cjua naha hacuaha sahmi me sacuatjin chjá cojo rë me matsejen ne, tangun me cojo ngu cha quicun xi hya xi casahmi cha ngu ndihya matsejen ne, hiscan xcun nanguihñu casahmi cha.

<sup>25</sup>Hane hya xi cavaha tsi, camajyë ndajyë hacuaha casesuntë nandá, hacuaha cavanga tjo hñu ne, jercu hñu catsivaha rë ndihya jan, peru caticjaainjni tsëhë xi xcun nanguihñu secun. <sup>26</sup>Peru yahnga nga xuta xi visiñuju me cjua naha hacuaha sahmii me sacuatjin chjá cojo rë me matsejen ne, tangun me cojo ngu cha ngarca xi hya xi casahmi cha ngu ndihya matsejen ne, hiscan xcun nangui tsumi casahmi cha. <sup>27</sup>Hane hya xi cavaha tsi, camajyë ndajyë hacuaha casesuntë nandá, hacuaha cavanga tjo hñu ne, jercu hñu catsivaha rë ndihya jan, hane tu ngu ñahñu ne caticja ndihya jan, ngu cafë cavetsunya.

<sup>28</sup>Xi cajnetaha cachja Jesús ne, xutacjin ne jercu quijircun rë me tsëhë cjua xi cavicuya Jesús ta, <sup>29</sup>tsëhë xi cjua xi vicuya me ne, jercu tjin rë ngahñu, hacuiin sacuatjin cjua xi vicuya maestro xi vicuya ley.

**Casahmi Jesús xi camandaja ngu cha xi yaha chuxin rë cha chíhin vitaha**

**8** Hya ha cavijne me tsëhë ndetjun jan, jemu cjin xuta tjengui rë me. <sup>2</sup>Hya xi camá ne, cafehe ngu cha xi jingujyë ni chuxin rë yaha rë ngu chíhin xi vitaha, caticjaxcun cha cafaharcun cha Jesús hane cachja cha cuitjin cojo rë me:

—Tatá. Sá xi meje nuju ne, cuma chjuhunxun chíhin xi yaha ná vi.  
—Cuatjin cachja cha.

<sup>3</sup>Hane xi catsixinga Jesús tsja me ne cavetahatsja me cha ne, sehe cachja me cuitjin:

—Meje ná. Catamandaja ngaye.  
—Cuatjin cachja me.

Hane chíhin jan ne, ngutjen ni cafëya. <sup>4</sup>Sehe cavitexa me cha cuitjin:

—Hisca xi ngu ni canujiin cojo. Tihin ningacuin yojo riji xcun nahmi sehe catutsejen me xi camandaja ye. Sehe tihinchjehe cjuatjo riji xi tehe rë Nina ngatsë rë xi camandaja ngaye tsëhë chihin jan, sacuaha cavitexa Moisés xutachanga naja. Cuatjin nihñi cojo sa xi cumatsejen xi camandaja jain ngaye.

#### **Casahmi Jesucristu xi camandaja cha mosu xi cavatsë capitán**

<sup>5</sup>Xi cavatju vihi ne, sehe rë cavisehen me nandya Capernaum, hane ngajan cafehe tjengui rë me ngu capitán cafehya cha me favor <sup>6</sup>cuitjin cachja cha:

—Tatá. Tjin ná ngu cha mosu xi jiñahmu ndya naha. Cahme yojo rë cha hane jemu jiñañihi cha.

<sup>7</sup>Ngajan cafayangui Jesús:

—Cjué ngahan, tsírquë rë cha.

<sup>8</sup>Ngajan xi cafayangui capitán jan cuitjin:

—Hisca hacuiin sahmi nguýjë xi ngayun cuinduvun ndya naha ta tsëhë xi hitsë sa hñu cjuua yun xi cuma ná ngahan. Quihndë ne, ndastu tinújun xi cumandaja mosu naha hane cuma ndaja cha.

<sup>9</sup>Hacuaha ngahan ne, tjin ná xuta xi matitjun tsahan, hane hacuaha tjin ná ngu cientu sindadu xi siu ngahma gobiernu naha xi sahmi hacutjin xi meje ná. Hya xi chjá cojo ngu xi cjue ne, fi; hacuaha xi chjá cojo ngu nga xi cuinduva

ne, nduva, hane mosu naha ne, xi chjá cojo xi sahmi mé xi meje ná ne, sahmi. —Cuatjin cafayangui capitán.

<sup>10</sup>Hane xi cahndë Jesús cjuua vëhë ne, jemu quijircun rë me tsëhë capitán jan, hane cachja me cojo xuta xi tjengui rë me cuitjin:

—Cuichjá cojo nuju ngu cjuua ta, ngajñi naja ngayejen ni ngayaan xuta tjë rë Israel ne, cjëë scuëë ngu xuta xi cuatjin ndaja mangucacun me cojo ná sacuaha capitán vihi xi hacuiin xuta tjë naja me. <sup>11</sup>Hacuaha cuichjá cojo nuju ta cuinduva xutaxín tsëhë táha ladu vetjucaa tsuhi cojo táha ladu vetje tsuhi cuiyuju me sinësuhi me cojo Abraham cojo Isaac cojo Jacob ngajan hiscan sahmi Nina gobiernu, <sup>12</sup>Peru xuta tjë rë Abraham xi quihndi cjuaquixi ne, cuma tsingatju me hiscan jñu ngajan candatsen. Ngajan ne, jemu squihnda me hacuaha tsijanerii me nehñu me.

<sup>13</sup>Hya xi camá cachja Jesús cuatjin cojo xuta ne, sehe cachja Jesús cojo capitán jan cuitjin:

—Cuma cuangun ta tsëhë xi xcusun xi vetjutacun xi má sahme, camachihin.

Hane hora xi cachja me cuatjin ne, camandaja cha.

#### **Jesucristu casahmi me xi camandaja nahya rë Simón Pedru**

<sup>14</sup>Hya xi cama ne, cavisehen Jesús ndava Pedru ne, hane cavëë me xi jiñahmu nahya rë Pedru cojo chíhin suë. <sup>15</sup>Ngajan xi cavetahatsja Jesús tsja na, hane ngutjen cavetjuxin chíhin jan tsëhë na. Hane hora



vëhë ni ne, cavisatjenhnga na hisca cama cafahacuenda na me.

<sup>16</sup>Hane hora xi tivetje tsuhi ne, xuta ne, quijicojo me cjin xuta xi hincha rë xitsehen hane quiji me hiscan tacun Jesús. Hane Jesús ne, cavaxëxin me xitsehen jan cojo cjua ni, hacuaha catsirqui me yëjë xuta hmu rë. <sup>17</sup>Cuatjin casahmi me sehe cumachihin cjua xi cachja profeta Isaías xi cachja me cuitjin: “Cafaha suva me yëjë chíhin hinda xi tjin rë yojo naja, hane suva me cavaha me chíhin naja.”

**Xuta xi meje cjue cojo Jesucristu**

<sup>18</sup>Xi cavëë Jesús xi jemu tsë xuta hiscan tacun me ne, casua me cjua cojo xicjin me xi cjuexin cojo rë me ngunda laguna. <sup>19</sup>Ngajan cafehe tjengui rë me ngu cha maestru rë ley sehe cachja cha cuitjin:

—Maestro. Tu yani ni xi cuangun ne, cjué cojo nuju. —Cuatjin cachja cha.

<sup>20</sup>Sehe Jesús ne, cafayangui me cuitjin:

—Chu ninda ne, tjin nguijo hiscan viyuju chu, hane nisë xi vitjen chu ngahnga ne, tjin ndava chu, peru ngahan xi hatuxa Quihndi rë Xuta ngahan ne, hisca ndya naha tsajin. —Cuatjin cachja me.

<sup>21</sup>Ngu nga xuta xi tjengui rë me cachja cojo rë me cuitjin:

—Tatá. Cuanguen cojo nuju peru hya xi cuatju seyaniji nahmi naha.

<sup>22</sup>Peru cafayangui Jesús cuitjin: —Hanguen. Tehe vëhë catisahmi xuta xi cahme cjuatacun rë me, me vëhë catinchaniji me nima.

**Jesucristu casahmi me xi cuasen tjo cojo tsindyu rë nandan**

<sup>23</sup>Hya xi camá ne, cavisehen Jesús cahntsua ngu barcu hane ngajan quiji tjengui rë me xuta ladu rë me. <sup>24</sup>Hora xi cjuí barcu jan ne, canduva ngu tjoñu xi cavanga xcun laguna jan, hane hisca meje tsa rë barcu jan cojo tsindyu rë nandan xi satë rë jan. Peru hora vëhë Jesús ne, jiñafë me. <sup>25</sup>Sehe xuta ladu rë me ne, catsingasca rë me, hane cuitjin cachja me: —iTatá, tatá! iNaxuntjun naja! iNguehe cjuëyan! —Cuatjin cachja me cojo Jesús.

<sup>26</sup>Hane cachja Jesús cuitjin: —¿Mé má cuatjin jemu rcun ngayun, ngayun xi cjëë cumangutacún cojo ná?

Hya xi cachja me cuatjin ne, cavisatjenhnga me cavatëcja me ngahñu rë tjo jan cojo tsindyu rë nandan jan, hane jingujyë ni jan ne, cavejñajyuu. <sup>27</sup>Hya xi camá ne, xuta jan ne, jercu quijircun rë me hane cachja me cuitjin:

—¿Yo xuta me vihi xi hisca tjo hisca tsindyu rë nandan vihndë tsëhë me?

**Cha Gadara xi hincha xitsehen xahasen rë**

<sup>28</sup>Hya xi camá ne, cafehe Jesús cojo cha ladu rë me ngunda vëhë, hisca ladu rë xuta nandya Gadara ne, ngajan jo me xi hincha xitsehen xahasen rë quiji tiña me tsëhë Jesús. Catsijo me xi cuacun jan ne, siu cahndë me ngojo naxi hisca xi sacuaha tsjun. Hacuaha jemu cjan rë me hisca tsajin yo xi tsujihiya

taha vë jan. <sup>29</sup>Hya xi cavechu me hiscan tacun Jesús, cojo ngahñu rë xitsehen jan, cavetsihin cachja me cuitjin:

—Mé má cuatjin ninguisuhunjñu cojo niji ngayun Jesús, Quihndi rë Nina. ¿Há tuhun niji cjuañihi handasa chaja sa nixtin rë?

<sup>30</sup>Nixtin hya ne, ngajan tiñataha ne, tacun ngu cahndé hiscan jemu cjín chu chinga hinchataha chu tijine chu. <sup>31</sup>Hane xitsehen jan ne, ña yuma chja cojo Jesús cachja cuitjin:

—Sá xi hatuxa naxunxun niji tsëhë xahasen rë cha xi cuicun vi, ningatjun niji hiscan siutaha chinga, hacuaha ningatuhun niji xi cuisihin cahntsua xahasen rë chu.

<sup>32</sup>Hane cachja Jesús ta:

—Joho, tangun.

Hya xi camá ne, cavetjuxin xitsehen tsëhë cahntsua xahasen rë cha jan, hane cavisehen cahntsua xahasen rë chu chinga jan. Hya xi camá ne, yëjë ni chu chinga jan ne, cavanga chu quijijne chu taha rcu ndetjún, hane ngajan cavixuya chu ngajñi nandá tsëhë laguna, hane ngajan cafë chu, cahme chu.

<sup>33</sup>Hane ngatsë rë chircun jan ne, cha xi sahmi cuidadadu rë chu chinga jan, cavanga cha quiji cha nandya. Hane xi cavisehen cha nandya, casua cha camachaya rë xuta tsëhë xcusun xi camá rë chu chinga jan cojo xcusun xi cavatju jo cha xi hinja rë xitsehen jan. <sup>34</sup>Hya xi camá ne, yëjë xuta tsëhë ladu tsëhë nandya Gadara ne, quijitjengui me Jesús hiscan tacun me, hane xi cavechutaha xuta me ne, cafehya me Jesús xi catje me tsëhë ladu rë me jan.

### Casahmi Jesús xi camandaja ngu xuta xi cahme yojo rë

**9** Hya xi camá ne, cavisehen nga Jesús barcu, cafe me nangui rë me ta tacun ngunda laguna. <sup>2</sup>Hya xi camá ne, ngutjen ni quijitjengui xuta me hane xuta jan ne, yahahnga me ngu cha xi cahme yojo rë cha, jiña cha xcun nijña rë cha. Hane xi cavëë Jesús xi cuatjin mangu cacun xuta xi cuacun jan cojo rë me ne, sehe cachja xu me cojo cha hmu rë jan cuitjin:

—Tuhun cjuasua xahasen nuju ta jyé nuju, tsan ne, ha camanchataha. —Cuatjin cachja me.

<sup>3</sup>Ngajan xi ngu jo maestru xi vicuya cjuachacun ne, cavetsihin catsingataha cacun me cuitjin: “Nina tsixcuehyu cha.” <sup>4</sup>Hane tsëhë xi vëë Jesús cjua xi tsingatahacacun maestru jan ne, cuitjin cavinenguise me cha:

—¿Mé má cuatjin chojyihini ningatuhuntacun? <sup>5</sup>Xi má nuju, çjarë cjua xi hitsë sa tsaviin fi xi cuichjá: há xi “Jyé nuju ne, ha camanchataha” o há tsajin ne; há “Tisatjunhngun ne, tujyuhunyun?”

<sup>6</sup>Peru nguehe suá cumachaya nuju ta ngahan xi Quihndi rë Xuta Jain ngahan ne, yahá xá xi tsinchátaha jyé rë xuta nguehe ngasunhndë.

Sehe ngajan cachja xu Jesús cojo cha hmu rë jan:

—Quihndë ne, ngayun tsan ne, tisatjunhngun chjuhun nijña nuju vë, sehe tjangun ndya nuju.

<sup>7</sup>Hya xi camá ne, cavisatjenhnga cha quiji cha ndava cha. <sup>8</sup>Xi cavëë xuta xcusun xi camá ne, quijircun rë me, sehe casahmi hnga me Nina

ta Nina ne, casua me cahndé Jesús xi cuatjin casahmi me.

**Cavaxijin Jesucristu Mateo**

<sup>9</sup>Xi quiji sa xu Jesús ne, cavechu me hiscan cavëë me ngu xihin xi tacun cahndé hiscan xi faha tujúnsa. Mateo hmí rë me. Ngajan xi cachja Jesús cojo me cuitjin:

—Nduvun, cuanguen cona.

Hane Mateo jan ne, cavetju me quiji me cojo Jesús.

<sup>10</sup>Ha nixtin vëhë ne, tijine Jesús niñu ndava Mateo. Hane jemu cjin sa cha xi faha tujúnsa cojo yahnga cha xi tsitjungui xuta nangui vë ne, hacuaha tijine cha niñu ngajan.

<sup>11</sup>Peru xi cavëë cha partidu fariseo xcusun jan, sehe cavinenguise cha cojo cha ladu rë Jesús cuitjin:

—¿Mé má jinë hvi maestru nuju cojo cha xi faha tujúnsa cojo ngujo sa cha xi hacuaha cha tsehen cha? —Cuatjin cachja cha.

<sup>12</sup>Peru cavihndé Jesús cjua xi cachja cha, hane cafayangui me cuitjin:

—Xuta xi hacuiin hmu rë me ne, mamijí rë me xi cjuahacuenda rë me doctor ta suvá ni xuta xi hmu rë me ne, me vëhë meje rë xi cjuahacuenda rë me doctor. <sup>13</sup>¿Há vijnií rcun mé vijne cjua rë Nina vihi?: “Hitsë sa ndama ná xi mayuma nuju xingun xi cuma rë xi nicuhun chu sacuaha cjuatjo xi tuhun ná.” Hacuanitjin ná ngahan ta ngahan ne, hacuiin canduvá xi squindáyavaha rë xuta xi tsajin xi cun rë me xcun Nina, ta xa xi canduvá ne, xi squindáyavaha rë xuta tsehen, hane cuichjá cojo me xi tsindeya me cjuatacun rë me. —Cuitjin cachja Jesús.

**Mé tsëhë xi casahmii Jesucristu cojo xuta rë me xun rë Nina.**

<sup>14</sup>Ngajan xi xuta ladu rë Juan ne, cafehe me cavinenguise me Jesús cuitjin:

—Ngayijin ni, vinechin xun rë Nina hacuaha cha partidu fariseo hacuaha viyuju cha xun rë Nina. ¿Mé tsëhë xi xuta ladu nuju ne, sahmii me cuatjin ne?

<sup>15</sup>Ngajan xi Jesús ne, cuitjin cachja me cojo cha:

—Cumaji xi xuta rë cha xi tivixan ne, sahmii me xun rë Nina jinguyëjë rë xi cha xi tivixan ne, tacun cha cojo rë me. Peru cuechú nixtin xi cha xi tivixan jan ne, chjaháxin rë cha tsëhë xuta rë cha, hane hya cuma sahmii me xun rë Nina. —Cuatjin cachja Jesús.

<sup>16</sup>Hacuaha cachja sa me ta: —Tsajin yo xi cueyaco ngu tsjian changa cojo ngu rquí tsjian xi cjëë cjueyu ta sá xi cuatjin sahmii me, xi cjueyu tsjian xatsë jan ne, cuicheya rë tsjian changá jan hane sahmii jyë sa rë hiscan xi ntsun.

<sup>17</sup>Cuanitjin ne, tsajin yo xi vincha xan xatsë cahntsua chuxin changá ta, sá xi cuatjin sahmii me ne, tsitsingá rë chuxin jan. Hane cjuë cuixu xan jan, hacuaha cuetsun chuxin jan. Xi meje rë ne, xan xatsë ne, xinha cahntsua chuxin xatsë ta cuatjin ne, catsijo ni ne tsajin mé cuma rë.

**Catsicuya Jesucristu cjuahñu rë quihndi rë Jairo; hacuaha camandaja ngu na xi casatëtsja tsjian rë Jesucristu**

<sup>18</sup>Hora xi tivisiajmi me cuatjin ne, canduva ngu me xi xutaxa rë yungun. Hane quiji caticjxcun me xcun Jesús cachja me cuitjin:

—Ndicumaha ni cahme na lihndi naha. Peru sa xi cuanguen ne, cuisanu ntsun na ne, cuya nga na cjuahñu.

<sup>19</sup>Hya xi camá ne, cavetju Jesús quiji me cojo nahmi rë na lihndi jan hacuaha quiji xuta ladu rë Jesús.

<sup>20</sup>Hane ngajñi cjuí me ne, ngu na xi tjin rë tejó nu xi yaha rë na chíhin xahmajni quiji tiña na táha ngaxtun Jesús ne, quiji cavetahatsja na ntsacu tsjian rë me ta, <sup>21</sup>catsingatahacacun na cuitjin: “Sá xi cuetahantsa ndastu tsjian rë me ne, cumandaja ngahan.”

<sup>22</sup>Peru cavuya Jesús taha ngaxtun me ne, sehe cavutsejen me na hane cachja me cojo na cuitjin:

—Tuhun cjuasua xahasen nuju, tsan, camandaja ngayun ta camacjain nuju.

Hane ngutjen ni ne, camandaja na.

<sup>23</sup>Hya xi camá ne, cafehe Jesús ndava xutaxa rë jan. Ngajan cavëë me xi ha siu cha chjinyetjo cojo xutacjín xi jihnda me ngatsë rë cjuandusin. <sup>24</sup>Sehe cachja me cojo xuta cuitjin:

—Tjangunxun. Na lihndi vë ne, hacuñin cahme na ta jiñafë ni na.

—Cuatjin cachja me.

Ngajan xi xuta jan ne, tu cavejnucëë me Jesús. <sup>25</sup>Peru xi casahmi me xi cavetju xin xuta jan, sehe cavisehen Jesús hiscan jiña nima lihndi jan ne, cafaha me tsja na hane catsisatjenhnga me na. <sup>26</sup>Hya xi camá ne, cavitsojo cjuá rë xcusun jan jingujyë nanguí vë.

**Casahmi Jesús xi camatsejen  
rë jo cha rcá**

<sup>27</sup>Xi cavetju Jesús quiji me tsëhë ngajan ne, canduva tjengui rë me jo

cha rcá hane cajindaya cha cachja cha cuitjin:

—iNgayun Jesús, tjë rë David! Catamayuma nuju ngayin. —Cuitjin cachja cha.

<sup>28</sup>Xi cavisehen Jesús ndihya ne, sehe cavechutaha cha rcá me, hane cavinenguise Jesús cha cjuá vi:

—Xi má nuju, ¿há cuma sahme xcusun xi chjayun?

Cafayangui cha cuitjin:

—Macjain niji, Tatá, cuma nihñu.

<sup>29</sup>Hya xi camá ne, cavetahatsja me tuxcun cha hane cachja me cojo cha cuitjin:

—Cuatjin catama cojo nuju xcusun sacuaha xi macjain nuju.

<sup>30</sup>Hane ha hora vëhë ni ne, catuxaha tuxcun cha hane camatsejen rë cha. Ngajan xi Jesús ne, cavitexa me cha cuitjin:

—Tsajin yo cuinújun cojo tsëhë xcusun vihi.

<sup>31</sup>Peru cavatju xi quiji cha jan ne, cavitsojo cjuá tsëhë me jingujyë nandya jan.

**Cavaxëxin Jesús ngu xitsehen  
xi casahmi lihmi rë ngu cha**

<sup>32</sup>Hora xi ha quiji jo cha jan ne, cafehe xuta xi canduva me cojo ngu cha xi hincha rë xitsehen; hane xitsehen jan ne, casahmi lihmi rë cha. <sup>33</sup>Hane hya xi cavetju xitsehen tsëhë cha lihmi jan, cavetsihin cachja cha. Hane xutacjín xi cavutsejen me ne, jemu quijircun rë me ne cachja me cuitjin:

—Nguehe nanguí naja Israel ne, tsajin ngu nixtin xi tsejen cjuarcun sacuaha tijimá quihndë.

<sup>34</sup>Peru cha partidu fariseo ne, cachja cha cuitjin:

—Xitsehen xi matitjun ne, vëhë casua rë cha xa xi vaxëxin cha xitsehen.

**Jemu cjin xuta xi meje rë xi cuisinuju me cjuarë Nina**

<sup>35</sup>Jesús ne, catsujiyihiya me jemu cjin nandya cojo ranchun ne, ngajan cavicuya me xuta cahntsua yungun rë me. Casua me camachaya rë me cjuandajyihi xi chja tsëhë gobiernu xi sahmi Nina. Hacuaha catsirqui me xuta tsëhë yëjë ni chíhin cojo yëjë ni xcusun xi cjuahmu. <sup>36</sup>Peru xi cavëë Jesús xutacjin ne, camayuma rë me xuta jan ta tsëhë xi jemu va tjin rë xahasen rë me, jemu camachohocacun me sacuaha chu tsánga xi tsajin yo xi cjuahacuenda rë chu. <sup>37</sup>Vëhë xi cuitjin cachja me cojo cha ladu rë me:

—Xutacjin vi ne siu me sacuaha siu niji ngajan nguijña xi jemu ndaja camá peru tsajin cha mosu xi cuanga rë. <sup>38</sup>Vëhë xi meje rë xi chjahyun rë Nai naja xi tsingatju me xuta xi cuanga me.

**Cavaxijin Jesús tejó xuta ladu rë me**

**10** Cavechú ngu nixtin xi casahmitangun Jesús xuta ladu rë me xi tejó jan ne, sehe casua rë me ngahñu hacuaha casua rë me xá xi me xi cuacún vë, cuitexa me yëjë xitsehen hane cuaxëxin me xitsehen tsëhë xuta; hacuaha sahmi me xi xuta xi hmu rë me ne cuma ndaja me tsëhë tu me ni chíhin xi yaha rë me.

<sup>2</sup>Cha xi tejó jan ne, cuitjin hmí rë cha: titjun ne, Simón, me xi hacuaha yaha ñihi rë Pedru, cojo

Andrés hntsë Simón, Jacobo quihndi rë Zebedeo cojo Juan hntsë Jacobo, <sup>3</sup>Felipe cojo Bartolomé, Tomás cojo Mateo, cha xi faha tujúnsa, Jacobo quihndi rë Alfeo cojo Tadeo, <sup>4</sup>Simón xi tsëhë partidu cananayu cojo Judas Iscariote, me xi sahmi entregadu rë Jesús.

**Catsingatju Jesucristu tejó xuta ladu rë me xi cuichja cjuandajyihi rë Nina**

<sup>5</sup>Tejó xuta jan ne, catsingatju Jesús me ne, cavitexa me cuitjin: —Tanguun ngajan ndiya xi fi xuta xi hvíin me cjuarë Nina, hacuaha cuisuun nandya rë distritu Samaria ta; <sup>6</sup>tángun hiscan siu xuta nandya rë Israel, xuta jan ne tangun me cojo ngu chu tsánga rë Nina xi cachaja chu. <sup>7</sup>Tuhun cumachaya rë xuta cjuandajyihi rë Nina xi jima tiña gobiernu xi sahmi me. <sup>8</sup>Nihñu xi cuma ndaja xuta hmu rë, nicuyun cjuahñu rë nima, nihñu xi cuma ndaja xuta xi yaha chuxin rë me chihin vitaha, hacuaha naxunxun xitsehen. Ngahñu xi meje nuju xi cuatjin nihñu ne, tu cuatjo ni sacu nuju, vëhë xi hacuaha tu cuatjo ni tuhun ngahñu jan.

<sup>9</sup>Xicachjuun oro o sá quicha tyava o tu mé ni tujún xi cuinchunndujun cahntsua tsá tujún nuju xi tsëhë gastu nuju. <sup>10</sup>Xicachjuun changa, xicachjuun ngu xúta tsjian, hacuaha xicachjuun ngu xúta chuxinxte o sá ngu bastón ta, xuta xi sahmi me xá ne, tsëhë xá jan sacu rë me gastu rë me.

<sup>11</sup>Cuanitjin ne, tu mé ni nandya o sá tu mé ni ranchun xi cuisuhun ne, ngajan cuinchunsun ngu xuta xi ndaja xahasen rë me, ngajan

ndava me ne, nechunchahndun hisca xi cuetjuxun tséhë nangui jan.

<sup>12</sup>Hane hya xi cuisuhun ngu ndihya ne, tinújun ngu nina cuitjin: “Nina sua nuju me cjuandaja cjuajeya.”

<sup>13</sup>Hane sá xi nai rë ndihya jan ndaja vëë me yun ne, catisatë rë ndava me jan cjuajeya; peru sá xi hacuiin ndaja vëë me yun ne, satiin rë me cjuajeya jan. <sup>14</sup>Hane hiscan xi tjin xuta xi cjuahatsjaain nuju me, xi chjuhun ndiya xi cuetjuxun tséhë nandya vëhë ne, titsunu chojo rë ntsacu. <sup>15</sup>Cuichjá cojo nuju ngu cjuaquixi ta hya xi cuechú nixtin xi tsichuva Nina xuta tséhë jyé rë me ne, hitsë sa jyë castigu cuatju xuta tséhë nandya xi cafahtsjaain nuju jan, xi cumá rë xuta tséhë nandya Sodoma cojo xuta nandya Gomorra.

### **Cjuañihi xi cuatjun cuma**

<sup>16</sup>Ngahan titsingátju nuju ngayun xuta jeya xi cuangun ngajñi rë xuta hnga cacun sacuaha cjue ngu chu tsánga ngajñi rë chu cjan rë. Vëhë xi meje rë xi ndaja quicuntacun sacuaha quicuncacun chu yë, peru hacuiin tsavi yun sacuaha tsajin tsavi chu paloma. <sup>17</sup>Peru nechun cuidadu ta, cjuaha nuju xuta cjuecojo nuju me xcun xutaxa rë ndihyavasen, hacuaha cuaja nuju me ngajan yungun rë me, <sup>18</sup>hisca cjuecojo nuju me xcun gobernador, hacuaha cjuecojo nuju me xcun me xi vitexa me jingujyë ni nandya. Cuatjin cuangun ngatsë rë xi ladu naha má ngayun. Ngatsë rë vëhë sacu nuju cahndé xi ninguiixun cjuaxi cavicuyá nuju xcun xuta jan cojo xuta xi hvíin me cjuaxi rë Nina. <sup>19</sup>Hya xi cuatjin cjuecojo nuju

me ne, hacuiin cuityjanguntacun tséhë hacutjin xi ninguiixun ta, tséhë xi hora vëhë ne, Nina sua me ngayun cjuaxi xi nicuyun. <sup>20</sup>Ta tséhë xi hacuiin cjuaxi nuju xi cuinújun ta tséhë Hasen rë Nina cuinduva cjuaxi xi cuinújun.

<sup>21</sup>Hacuaha xuta ladu naha ne, hntsë me, cuinchajyë rë me, xutacha rë me, cuinchajyë rë me, quihndi rë me cuinchajyë rë me cojo sa xi xutaxa rë ne, cjuaha rë me me ne, tsiquehen rë me. <sup>22</sup>Yëjë ni xuta ne, choho scuëë nuju me, tséhë xi ladu naha ngayun. Peru jarë ngayun xi scaa nuju cojo cjuacjintacun vëhë hisca xi cueyun ne, cuechun xcun Nina. <sup>23</sup>Hya xi tsujyihiyatjengui nuju me ngu nandya ne, tangun ngu nandya tiñataha ta, cuichjá quixë cojo nuju ta xi chaja sa cuatjun jingujyë ni nandya tséhë nangui rë Israel ne, cúa ngahan Quihndi rë Xuta.

<sup>24</sup>Ngu cha xi sehe tivutaya matsejen ne, hacuiin hitsë sa matitjun cha xi cumá rë maestru rë cha, cuanitjin ne, ngu cha hndixahan ne, chuva venguichji rë cha xi cumá rë nai rë cha. <sup>25</sup>Catamangucacun cha tséhë xi cuechú nixtin xi tangun cuenguichji rë cha cojo maestru rë cha o tangun cuenguichji rë hndixahan cojo nai rë. Ha chuva vëhë ni cuatjun ta sá xi choho cuichja xuta nai rë ndihya ne, ngu xitsehen me, hitsë sa choho cuichja me tséhë xuta rë nai rë ndihya jan.

### **Xicarcuun xuta**

<sup>26</sup>Xicarcuun xuta condra nuju. Yëjë ni xcusun xi casetsangui

ne, cuechú nixtin xi chjaháxin rē xi titsangui rē. Vēhē xi yējē ni xcusun xi hma ne, handasa sahmangui ne, peru cuechú nixtin xi cuetjucaa tsejen. <sup>27</sup>Yējē ni cjua xi cuichjá cojo nuju hiscan jñu ne, cuinújunsun hiscan hasen. Yējē ni cjua xi cuichjáhma ne, cuechú nixtin xi cuinuhya rē jinguyējē ni nandya. <sup>28</sup>Xicarcuun xuta xi cuma tsiquehen yojo nuju, peru ngaxtun vēhē ne, tsajin me dañu ma sahmi me cojo hasen nuju. Hitsē sa ndaja ne, rcun Nina, me xi tjin rē chuva rē xi tsiquehen me yojo nuju hane hacuaha tsingatjenja nuju me hiscan xi má hasen nuju castigu.

<sup>29</sup>Chutsujun ta jo chu nisē langa ne, ngu ni tujún chji rē chu, peru handasa cuatjin ne, hiscan ngu chu cumaji cueya chu sá xi suaain Nina cahndé. <sup>30</sup>Hane ngayun ne, hisca jimangu tsjarcun ne xqui tjin rē Nina. <sup>31</sup>Vēhē xi xicarcuun ta, tsēhē xi jimangu ngayun ne, hitsē sa jercu vengui chji nuju xi cumá rē chu nisē vē, handasa jemu cjín chu.

<sup>32</sup>Yējē xuta xi tsinguixi me xcun yahnga xuta xi xuta ladu naha má me ne, hacuaha ngahan tsinguixē xcun Nahmi naha xi tacun ngahnga xi xuta ladu naha má me. <sup>33</sup>Peru yējē xuta xi tsinguixiin me xcun yahnga xuta xi hacuiin xuta ladu naha má me ne, hacuaha hacuanitjin ni tsinguixē ngahan xcun Nahmi naha xi tacun ngahnga.

**Ngatsē rē cjua rē Jesucristu xi sahmi condra xutacjin xiejin me**

<sup>34</sup>Xi má nuju ngayun ne, ¿há cjuajeya canduvácojo xi cumá rē xuta ngasunhdē? Hacuuiin

cuatjin. Ngahan ne, si canduvá cojo. <sup>35</sup>Canduvá tsinguetsuntaha xicjin xuta. Cha quihndi ne, sahmi condra cha nahmi rē cha, hane na quihndi ne, sahmi condra na naa rē na, hane jahnda ne, sahmi condra na nahya rē na. <sup>36</sup>Cuatjin xuta condra rē me ne, cuma ni xuta rē me.

<sup>37</sup>Sá xi ngu me ne hitsē sa tsihmu cacun me nahmi rē o sá xi naa rē me xi cumá ná ngahan ne, vechiin chuva rē xi tsahan cuma me. Hacuaha sá xi ngu me ne hitsē sa tsihmu cacun me quihndi rē me sá xihin sá chjuun xi cuma rē xi tsihmu cacun me ngahan ne, vechiin chuva rē xi tsahan cumá me. <sup>38</sup>Ha cuanitjin ne, sá xi ngu me ne mijí cjuējñahñu xahasen rē me xi cjuecojo me ndiya naha handasa cueya me xcun cru ne, cumaji cuechu me chuva rē xi tsahan cumá me. <sup>39</sup>Xuta xi nguehe ni ngasunhdē meje cjuenduju me cojo cjuahñu rē me ne, titsichajá me cjuahñu xatsē xi sua Nina me. Peru xuta xi titsichajá me cjuahñu rē me nguehe ngasunhdē ne ngatsē naha ne, hatuxa sacú rē me cjuahñu xatsē xi sua Nina me.

### **Cjuatjo xi sua Nina**

<sup>40</sup>Xuta xi cjuahatsja me yun, tangun sacuaha xi cjuahatsja ná me ngahan suva, hane xuta xi cjuahatsja ná me ne, tangun sacuaha xi cjuahatsja me Nahmi naha, me xi catsingatju ná. <sup>41</sup>Xuta xi cjuahatsja me ngu me xi chja me cjua rē Nina ne ngatsē xi chja me jan cjua rē Nina ne, tangun chji sacú rē me cojo me jan. Hacuaha xuta xi cjuahatsja me ngu xihin

xi tyjahi cjuatacun rë me xcun Nina ngatsë rë ndaja xihin jan ne, tangun chji sacu rë me cojo xihin jan. <sup>42</sup>Cuanitjin ne, xuta xi sua me ndastu ngu vasu nandá cjuahatsja tu yo ni xi xuta ladu naha ne handasa jemu yuma jyihi me ne, sacu chji rë me ngatsë rë xi cuatjin sahmi me cojo xuta xi tjengui ná.

### Cha xi catsingatju Juan Vitenda rë Xuta

**11** Hya xi camá ne, xi cajnetaha cjuá xi cavitexa Jesús cha xi tejó má jan, sehe cavetjuxin me quiji me nandya xi siutahndee, ngajan cavicuya me xuta cachja me cojo tsëhë cjuandajyihi rë Nina.

<sup>2</sup>Nixtin hya ne, ha jiya Juan Vitenda rë Xuta ndavaya, hane ngajan camachaya rë me tsëhë xcusun xi sahmi Jesús. Vëhë xi catsingatju me ngujo cha ladu rë me xi quiji cha <sup>3</sup>cavinenguise cha Jesús cuitjin:

—¿Há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin cavinenguise xuta xi catsingatju Juan jan.

<sup>4</sup>Hya xi camá ne, catsicuya Jesús cjuá cojo cha xi cuacun jan hane cuitjin cachja me:

—Tjangun ne, sehe tinújun cojo Juan yëjë cjuá xi canuhyun cojo yëjë xcusun xi cahyun. <sup>5</sup>Tinújun ta xuta rcá ne, camá camatsejen rë me; xuta rengun ne, camá quijindaja me; xuta xi yaha rë chíhin vitaha xi setaha yojo naja ne, camandaja me; nima ne, cavuya nga cjuahñu; xuta yuma ne, casacu

camachaya rë me cjuandajyihi rë Nina. <sup>6</sup>Hacuaha jemu ndaja tsëhë tu yo ni xuta xi hacuiin tsismicacun me xi mangu cacun me cojo ná. —Cuatjin cachja Jesús.

<sup>7</sup>Hane hya xi cavetju quiji xuta ladu rë Juan jan ne, sehe cavetsihin cachja Jesús cojo xutacjín jan cuitjin tsëhë Juan:

—Hya xi cavetjun catsangun ngajan ngu xín tsëhë nandya catsangun tjengun Juan matsejen ne, ¿há caningatuhuntacún xi cuechuntuhun ngu xihin xi hacuiin ngu ni cjuatacun rë me, sacuatjin rë ngu ndeje xi fi nguehe fi ngajan rcu sacuatjin cjuí tjo? <sup>8</sup>O há tsajin ne, ¿há caningatuhuntacún xi cuechuntuhun ngu xihin xi yaja ngu tsjian xi jemu tu ndajyihi camahani? Hacuiin cuatjin. Ha hyaan matsejen ta xuta xi jercu tu ndacun camahani tsjian vaja me ne, sacuiin naja ngajan xin jan, ta sacu naja ndava ngu xuta nchina. <sup>9</sup>Peru ngayun matsejen ne, catsangun cachutsujun ngu profeta. Hacuaha cjuaquixi xi vëhë cachutsujun. Peru profeta Juan vë matsejen ne, hitsë sa vengui chji rë me xi cumá rë yëjë sa profeta xi yahnga. <sup>10</sup>Hacuaha me vëhë xi cachja Nina tsëhë me xcun xujun rë me cuitjin:

Ngahan ne, tsingátju titjun ngu cha

xi scuxaha cjuatacun rë xuta tsëhë xi cjuehe ngaye.

<sup>11</sup>Cuichjá cojo nuju matsejen ta ngajñi rë yëjë xuta xi catsin me tsëhë naa rë me matsejen ne, tsajin ngu xi hitsë sa vengui chji rë xi cumá rë Juan. Peru hya xi cuetsihin Nina sahmi me gobiernu nguehe



ngasunhndë matsejen ne, xuta xi chuva cuengui chji rë me nixtin hya matsejen ne, hitsë sa cuengui chji rë me nixtin hya, xi cuma rë xi vengui chji rë Juan quihndë.

<sup>12</sup>Hisca nixtin xi caxtenda Juan hisca nixtin quihndë ne, má cjuasuë xi satë rë gobiernu xi sahmi Nina; xuta ne, meje cuisehen me ngajan, handasa cojo cjuachan. <sup>13</sup>Xi chaja sa nduva Juan ne, yëjë ni xujun xi catsihindu profeta cojo xujun rë ley ne, suva casua camachaya rë xuta tsëhë gobiernu xi sahmi Nina. <sup>14</sup>Sá xi meje nuhyun cjuaquixi ne: Juan ne, hacui Elías, xi sehe nduva xu. <sup>15</sup>Yo ngayun xi tjin nuju cjuasua xi cuinuhyun cjua vihi matsejen ne, ndaja tetuhunrcun.

<sup>16</sup>Ngayun xuta tsëhë nixtin vihi matsejen ne, ¿mé xi tangun ngayun cojo? Tangun ngayun cojo langa xi siu ngajan ndetsin, xi jindaya xicjin <sup>17</sup>cojo cjua vihi: “Canijani tsujun ne, mijí xtun; casin va ne, mijí chjihndun.” Cuatjin jindaya langa. <sup>18</sup>Cuatjin chjá cojo nuju matsejen ta, Juan xi vitenda nuju ne jinii me niñu hacuaha hviin me xan, hane nújun ta jiya xitsehen xahasen rë me. <sup>19</sup>Hane ngahan xi Quihndi rë Xuta Jain matsejen ne, jinë hacuaha hvë, hane nújun ta ngu cha cahntsuaníñu ngahan, ngu cha cahntsuanaxan ngahan, hacuaha ngu cha amigu rë cha xi faha tujúnsa cojo jingu sa xuta tsehen ngahan. Tsejen xi ndaja ngu cjuatacun xi casacu rë ngatsë rë xi ndaja tivetjucaa tsujun xi tinihñuchuhun.

**Chojyihi tsëhë xuta nandya xi vindeyaain cjuatacun rë me**

<sup>20</sup>Hya xi cama ne, cavetsihin Jesús chjataha me xuta nandya

jani hitsë sa jemu casahmi me cjuarcun camá, ta catsindeyaain me cjuatacun rë me. Cuitjin cachja me:

<sup>21</sup>—iJemu chojyihi tsujun xuta nandya Corazín! iHacuaha jemu chojyihi tsujun xuta nandya Betsaida! Jemu chojyihi tsujun ta, tsëhë xi sá xi xutaxín tsëhë Tiro cojo xutaxín tsëhë Sidón cavëë me cjuarcun xi cahyun ne, ha catsindeya me cjuatacun rë me, hacuaha ha cavajá me tsjian xi sacuaha tsánaxá hacuaha caviyuju me ngajñi ndesu, sacuaha xcusun naja hya xi choho má naja. <sup>22</sup>Vëhë xi hya xi tsichuva Nina yëjë xuta tsëhë jyé rë me ne, xuta nandya Tiro cojo xuta nandya Sidón ne, hitsë sa chuva castigu cuatju me cumá xi cumá nuju ngayun xuta nandya Corazín cojo ngayun xuta nandya Betsaida. <sup>23</sup>Hane ngayun xuta nandya Capernaum ne, ¿há cuangun hisca ngahnga hiscan tacun Nina? iHacuiin! Hatuxa cuangun nduchin, cahndé hiscan fi hasen rë nima ta, tsëhë xi sá xi xuta tsehen tsëhë Sodoma cavëë me cjuarcun xi cahyun ne, ha catsindeya me cjuatacun rë me, hane tacun cuaha nandya jan hisca quihndë. <sup>24</sup>Vëhë xi hya xi tsichuva Nina xuta ne, hitsë sa chuva castigu cuatju xuta Sodoma xi cumá nuju ngayun xuta nandya Capernaum.

**Casahmi jyë casahmi hnga Jesucristu Nina**

<sup>25</sup>Nixtin hya ne, cachja Jesús cojo Nina cuitjin:

—Ngayun nahmi naha ne, sahme jyë sahme hnga nuju, ngayun xi Nai rë ngahnga cojo nangui, ngayun,

tsëhë xi ngayun cavyéúnhmu cjuatacun vëhë xi cuma rë xuta xi jemu vechú cjuatacun rë, hane catuhun camachaya rë xuta xi jñu tsëhë me. <sup>26</sup>Ngayun nahmi naha, cuatjin canihñu ta, tsëhë xi cuatjin xi cachuya nuju. —Cuatjin cachja Jesús cojo Nina.

<sup>27</sup>Cachja me cojo xuta:

—Yëjë ngarca matsejen ne, Nina Nahmi naha casua ná me. Tsajin hisca ngu xi vëë yo xi Quihndi rë Nina matsejen ta suvá ni Nina Nahmi naha xi vëë me. Hacuaha tsajin yo xi vëë Nahmi naha matsejen ne ta, suva ni ngahan xi Quihndi rë me ngahan xi hvë, cojo tu yo ni xi ngahan meje suá cumachaya rë. <sup>28</sup>Ngayun xi fenda rë xahasen nuju, ngayun xi hai tjin tacun tsëhë jyë nuju ne, nduvun tjengun ná, hane cjuaháxen vëhë xi sahmi hai nuju. <sup>29</sup>Ningatuhun xi chjuhun yugu naha sacuaha má cojo ndyaja hya xi cjuaha chu xa sahmi chu, hacuaha chjayunngun tsahan. Ta ngahan ne, tjin ná cjuandaja cjuajeya, hane sacu hñu rë xahasen nuju. <sup>30</sup>Ta yugu xi suá nuju vihi ne, hacuiin hai, tanguaain cojo tsëhë chu ndyaja, hane xa xi suá nuju ne, hacuaha hacuiin hai.

**Cavotohosun xuta ladu rë Jesucristu trigu nixtin xi chjahájenda rë**

**12** Nixtin hya ne, cuatjin camá ngu nixtin xi chjahájenda rë. Hora xi tivatju Jesús cojo xuta ladu rë me hiscan tjin tjë trigu ne, cama vojo rë xuta ladu rë me, cavetsihin cavotohosun xuta jan tsë tsë trigu jan ne, catsufëtsja me cagine me. <sup>2</sup>Hane cha tsëhë partidu

fariseo xi cavëë cha xi cuatjin casahmi me, cachja cha cojo Jesús cuitjin:

—Chutsujun ni, xuta ladu nuju ne, tisahmi me xa quihndë nixtin xi chjahájenda rë, handasa chja ley naja xi cumaji xi cuatjin nihña.

<sup>3</sup>Hane cafayangui Jesús cuitjin:

—Ngayun, ha cachutayun xcusun xi casahmi xutachanga naja David hatsëë nixtin hya xi jercu camá vojo rë me cojo xuta xi siu cojo me. <sup>4</sup>Cavisehen me ndava Nina, hane cafaha me pan xi viyuju xcun Nina xi tsajin cahndé xi tu yo ni siné ta suvá ni nahmi xi cuma siné me. Peru David ne, cajinë me hacuaha casua me cajinë xuta xi siu cojo me. <sup>5</sup>Cuanitjin ne, ha cachutayun xi chja cjua rë ley naja xi nahmi xi sahmi xa ndava Nina ne, ngajan tjin xa xi satë rë me nixtin xi chjahájenda rë peru tsajin jyë xi cuma rë me handasa tisahmi me xa nixtin hya. <sup>6</sup>Cuichjá quixë cojo nuju ta nguehe tacun ngu xi hitsë sa meje rë xi chjahanrcun rë xi cumá rë yungun xi matitjun. <sup>7</sup>Cjëë cuijnercun cjua xi chja: “Hitsë sa ndama ná xi cumayuma nuju xingun tsëhë xi cumá rë xi nicuhun chu sacuaha cjuatjo xi tuhun ná.” <sup>8</sup>Hacuaha cachja sa Jesús cuitjin: Ngahan xi Quihndi rë Xuta Jain ngahan ne, ngahan xi vitéxa mé xi cuma nixtin xi chjahájenda rë.

**Casahmi Jesucristu xi camandaja cha xi quixíhñu ngu tsja**

<sup>9</sup>Hya xi camá ne, xi quiji sa Jesús ne, cavisehen me yungun ngajan.

<sup>10</sup>Hane tacun ngu cha cahntsua yungun jan xi quixíhñu tsja quixi

cha. Hane cha xi vicuya cjuachacun cojo cha fariseo ne, cavinenguise cha Jesús cuitjin:

—¿Mé xi tsingatihi ley xi nihña nixtin xi chjahájenda rë? ¿Há sua cahndé xi nirquen rë xuta hmu rë?

—Cuatjin cavinenguise cha me xi sehe cuma cuinchajyë cha me.

<sup>11</sup>Hane cuitjin cafayangui Jesús tsëhë cha:

—¿Há cuma xi ngu ngayun handasa hya xi nixtin xi chjahájenda rë ne, cuanguun naxun chu tsánga nuju sá xi cjuinenguia chu ngu ngojo xi jemu nungun?

<sup>12</sup>Sá cuatjin vengui chji rë ngu chu tsánga ne, hitsë sa cjin vengui chji rë ngu xihin. Vëhë xi tsingatihi ley xi nixtin xi chjahájenda rë ne nihña cjuandaja.

<sup>13</sup>Sehe cachja Jesús cojo cha hmu rë cuitjin:

—Nixingun ntsun. —Cuatjin cachja me.

Hane cuatjin casahmi cha. Hane tsja cha xi quixi ne, ha camandaja sacuatjin jyihi tsja cha xingu. <sup>14</sup>Hya xi camá ne, cha partido fariseo jan ne, cavetju cha quiji cha, cachja cha ngajñi rë cha cojo xicjin cha xi meje rë xi sacuya ra xcusun hacutjin cuma tsiquehen cha Jesús.

### **Cjua xi catsihindu profeta tsëhë Jesús**

<sup>15</sup>Peru Jesús ne, machaya rë me cjuatacun jan, hane cavetju me quiji me tsëhë ngajan. Hacuaha cjin xuta quiji tjengui cojo rë me, hane catsindaja me yëjë ni xuta tsëhë chñhin xi má rë me, <sup>16</sup>sehe cachja me cojo me xi cuichjaain të me yo me jan. <sup>17</sup>Cuatjin casahmi Jesús xi

cuetjucaa cjua xi catsihindu profeta Isaías xi chja cuitjin:

<sup>18</sup>Cha vihi ne, cha mosu naha, cha xi cavitéxa ngahan, cha xi tsihmúcacun, cha xi ndama ná tsëhë.

Suá cha Hasen naha, cuichja cha cojo xutaxín tsëhë hacutjin quixi Nina hya xi tsichuva me xuta.

<sup>19</sup>Cha vihi ne, hacuiin cjin cuisiajmi cha cojo xuta; hacuiin jindaya të cha xi chja cha.

Cuichjaain hñu cha cojo sa xi jemu catjaha cuenda rë cha xuta xi tsujyihya me ndiya të.

<sup>20</sup>Xcotaain cha cjuatacun rë hisca ngu xuta yuma xi tangun me cojo ngu ndeje xi caxtane, hacuaha sahmi chuvaain cha cjuatacun rë xuta yuma xi tangun me cojo ngu candil xi ha ndiya coho.

Yëjë xcusun vihi ne, sahmi cha hisca xi cumatsejen cjuaquixi rë gobiernu rë cha.

<sup>21</sup>Hane xuta ngasunhdë ne, cuetahacacun me cha.

### **Cachja xuta xi Satanás casuaxa rë Jesús**

<sup>22</sup>Cavechú ngu nixtin xi cafehe tjengui xuta Jesús hane yaha me ngu cha xi jiya xitsehen xahasen rë cha. Rcá cha jan hacuaha lihmi cha. Hya xi camá ne, Jesús ne casahmi me xi camandaja cha jan hisca cama cachja cha hisca cavutsejen ndaja cha. <sup>23</sup>Hane xutacjin ne, jemu quijircun rë me cachja me cuitjin: —¿Há cumacacun xi cha vihi hacui quihndi tjë rë David xi tsingatju Nina?

<sup>24</sup>Peru cha partidu fariseo xi camachaya rë cha cjua jan ne, cachja cha cuitjin:

—Hacuiin suvá cha vaxëxin cha xitsehen ta Beelzebú, xitsehen xi matitjun ne, vëhë casuaxá rë cha xi vaxëxin cha xitsehen.

<sup>25</sup>Peru Jesús ne, tsëhë xi ha vëë me mé xi tsingataha cacun xuta xi cuacún jan ne, cuitjin cachja me cojo cha:

—Hya xi xuta tsëhë ngu nandya ticjan me ngajñi rë me cojo xicjin me, cjuë ngahñu cjua rë, hane cjuincanii rë me. Hacuaha sá xi xuta tsëhë ngu ndihya ne, scaan me ngajñi rë me ne, ngajan chajá ngahñu cjua rë ndihya jan.

<sup>26</sup>Ha cuanitjin rë Satanás ta, sá xi Satanás ne vaxëxin xitsehen xi yahnga ne, cavatëcja ngahñu cjua rë, hane cumaji cuitexa xicjin.

<sup>27</sup>Vëhë xi sá xi Beelzebú casua ná xa xi vaxëxin xitsehen ne, hacuaha ha Beelzebú vëhë casua rë ngu ngu xuta ladu nuju xa xi hacuaha vaxëxin me xitsehen. Vëhë xi me vëhë ni cuma cuichja me xi cuaintjin cjua xi nújun xi Beelzebú casua ná xa. <sup>28</sup>Peru sá xi hacuiin Beelzebú casua ná xa ta Nina casua me ne, ngajan matsejen xi gobiernu xi sahmi Nina ne, ha tivetsihin.

<sup>29</sup>Hisca ngu cha chëjë cumaji tu cuisehen ni cha ndava ngu xuta xi hñu cjua rë sá xi tacun me. Titjun tsihñu cha xuta xi ndava ta cuatjin xi cuma tsichëjë cha tsëhë me.

<sup>30</sup>Xuta xi fiin me favor naha ne, condra naha má me. Hane xuta xi visecuain ná me xi nihñi tangun cjuatacun rë xuta cojo Nina ne, tsinguetsun me cjuatacun rë xuta.

<sup>31</sup>Hacuaha cuichjá cojo nuju cjuaquixi ta tu mé ni jyé xi sahmi xuta hacuaha tu mé ni cjua xi choho cuichja me tsëhë xuta ne, sacú rë me cjuaninchataha sa xi cuijacun me jyé jan. Peru tu yo ni xi choho cuichja tsëhë Hasen rë Nina ne, tsajin cjuaninchataha xi cuma rë. <sup>32</sup>Cuanitjin ne, tu mé ni cjua xi choho cuichja xuta tsëhë Quihndi rë Xuta Jain ne, cuma sacú rë me cjuaninchataha. Peru tu yo ni xi choho cuichja tsëhë Hasen rë Nina ne, tsajin cjuaninchataha nguehe nixtin vi, hacuaha tsajin cjuaninchataha nixtin xi nduva.

**Ngatsë ni rë xcusun xi sahmi me ne, tsejen mé xcusun xuta me**

<sup>33</sup>¿Jarë xi meje nuju?, ¿há xi ndaja ya hacuaha ndaja tu rë? o há tsajin ne, ¿há xi ndajin ya hane ndajin tu rë? Jima ngu ya ne, cuma tsejen sá xi ndaja o sá xi ndajin ngatsë rë tu xi sua. <sup>34</sup>Ngayun quihndi rë chu tsehen, maji nújun cjua xi ndaja. Maji ta tsëhë xi cjua xi quitsë rë xahasen nuju ne, vëhë cjua xi vetju nújun. <sup>35</sup>Vëhë xi xuta ndaja ne, tsëhë cjuandaja xi tetjo rë me cahntsua xahasen rë me cojo cahntsua cjuatacun rë me ne, tsëhë ngajan vetju cjuandaja. Cuanitjin ne xuta tsehen ne, tsëhë cjuatsehen xi tetjo rë me ne, ngajan vetju cjuatsehen. <sup>36</sup>Cuichjá cojo nuju ta tu mé ni cjua xi cuinújun, handasa tu visiajmu ni ne, tuhuncuenda rë Nina cjua jan nixtin xi tsichuva me yaan. <sup>37</sup>Cuatjin ta cojo cjua xi canújun ne, cjua jan cuma testigu xi cuetjunxun tsëhë castigu, o sá tsajin ne, cjua xi canújun vëhë

cuma testigu tsëhë castigu xi cueyun.

**Cafehya xuta tsehen ngu  
seña xi sua Nina**

<sup>38</sup>Ngajan xi ngujo cha xi vicuya cjuachacun cojo ngujo cha partidu fariseo catsicuya cha tsëhë me, cuitjin cachja cha:

—Maestro, ningacun niji ngu cjuarcun xi sua seña yo ngayun.

<sup>39</sup>Ngajan cafayangui Jesús cuitjin:

—Ngayun xuta tjë rë Israel xi nechun nixtin vihi matsejen ne, tsehen cjuatacun nuju, hacuaha majotacun xcun Nina. Vëhë xi chjahyun ná ngu seña xi sua Nina. Peru seña vëhë ne, sacuiin nuju ta ngu ni seña xi sacú nuju matsejen ne, vëhë seña xi casua profeta Jonás hatsëë nixtin. <sup>40</sup>Sacuatjin rë profeta Jonás ne, jyan nixtin cojo jyan nixten caseya me cahntsua chu ti jyë, hane ha cuanitjin ni ne cumá rë Quihndi rë Xuta Jain, ta jyan nixtin cojo jyan nixten seya me ngahma nangui. <sup>41</sup>Hya xi cuechú nixtin xi tsichuva Nina jyë nuju, ngayun xi nechun nixtin vihi ne, yëjë ni xuta nandya Nínive matsejen ne, cjue cuinchajyë nuju me; ta me vëhë ne catsindeya me cjuatacun rë me hya xi casua profeta Jonás camachaya rë me cjuar rë Nina. Peru nguehe ne ha tejña ngahan sacuaha ngu seña xi hitsë sa vengui chji rë xi cuma rë profeta Jonás. <sup>42</sup>Hacuaha nixtin hya ne, na xi cavitexa ngajan nangui Sabá ne, cjue cuinchajyë nuju ta, tsëhë xi jemu cjuañihi cavatju na tsëhë xi jercu cjin hiscan canduva na xi cuihndë na

cjuatacun ndacun rë Salomón, me xi cavitexa xuta naja nixtin hatsëë. Peru nguehe tejña ngahan xi hitsë sa vengui chji rë cjuatacun naha xi cumá rë cjuatacun rë Salomón.

**Xitsehen xi vuya**

<sup>43</sup>Hya xi vetjuxin xitsehen tsëhë xahasen rë ngu xuta hiscan xi camá sacuaha ndava xitsehen jan ne, fi táha hiscan jemu nangui quixí camahani, vanguise cahndé hiscan xi cueñajenda. <sup>44</sup>Hane xi sacuiin rë cahndé hiscan cueñajenda ne, cuitjin tsingatahacacun: “Cúya rë cjué ndya naha hiscan xi cavétjuxen.” Cuatjin tsingataha cacun xitsehen jan. Hane hya xi vuya fehe xitsehen jan cahntsua xahasen jan ne, vutsejen xitsehen jan cahntsua xahasen jan sacuaha ngu ndihya tiya, ngu xi caxtecha tyjahi tyjahi, hacuaha siundaja chichihin ngu tsé ngu xtí. <sup>45</sup>Xi vutsejen xitsehen xi cuatjin jyihi jan ne, sehe fi jaha sa rë yatu sa xitsehen xi hitsë sa tsehen xi cumá rë vëhë ne, sehe visehen nga viyujucahndé jan. Peru xi má ngascan ne, hitsë sa chojyihí tsëhë xuta vëhë xi cumá rë titjun. Cuitjin cumá tsëhë xuta xi siu nixtin vihi. —Cuatjin cachja Jesús.

**Naa rë Jesucristu cojo xicjin me**

<sup>46</sup>Hya xi tichja me cojo xutacjin ne, naa rë me cojo xicjin me ne, cafehjetjengui me Jesús, hane maji vechútahacjin me xi cuichja me cojo ta tsëhë xi jemu quitsë xuta. <sup>47</sup>Ngajan xi cachja ngu xi cachja cuitjin:

—Nutsujun ni. Ná nuju cojo nixti xingun ne, hinchacun me ngajan

candatsen, xi meje nduvatjengui nuju me cuichja me cojo nuju. —Cuatjin casacu camachaya rë me.

<sup>48</sup>Hya xi camá ne, cavuya me catsicuya me cjuua cuitjin: —¿Yo xi má nuju xi ná naha cojo xingueen?

<sup>49</sup>Hya xi cuatjin cachja me ne, catsingacun tsja me xuta ladu rë me sehe cachja me cuitjin:

—Ngayun xi nechun nguehe ne, ngayun xi sacuaha ná naha cojo sacuaha xingueen ngayun ta, <sup>50</sup>tu yo ni me xi sahmi me sacuaha meje rë Nahmi naha xi tacun me ngahnga ne, me vëhë tangun ni cojo xingueen, cojo ná naha.

Ejemplu tsëhë cha xi catsitjë trigu

**13** Nixtin hya ne, cavetjuxin Jesús tsëhë ndihya ne, quiji me tjehe laguna ngajan cavejña me. <sup>2</sup>Hane ngajan camatangun xutacjín. Vëhë xi cavisehen me ngu barcu ngajan cavéjña me. Hane xutacjín jan ne, caviyuju me nangui quixí tjehe nandan jan. <sup>3</sup>Sehe cavicuya Jesús me jemu cjín cjuua sacuaha xcusun rë ejemplu. Cuitjin cachja me:

—Cuejña ne xi ngu cha xi tsitjë cha trigu matsejen ne, cavetju cha quiji cha xi tsitjë cha trigu. <sup>4</sup>Hane jinguyëjë rë xi titsitjë cha matsejen ne, ngujo matsejen ne, cavixu ndiya. Hane canduva chu nisë, catsicjë chu cajine chu. <sup>5</sup>Hane ngujo nga matsejen ne, cavixu hiscan xi jemu naxindya, hacuaha jemu chuva nihndë quisun. Ngajan jemu xati cavetju ta tsëhë xi hacuain tjin nihndë quisun. <sup>6</sup>Hane xi cavetjucaa tsuhi ne, cavaca rë cojo ndavá jan.

Hane tsëhë xi tsajin tyjama rë xi nungun matsejen ne, caxintsen. <sup>7</sup>Ngujo nga ne, cavixu ngajñi nahyá. Hane xi camacha tangun matsejen ne, nahyá jan ne, vëhë casahmi hndë rë catsixi rë. <sup>8</sup>Hane xi yahnga matsejen ne, cavixu hiscan nihndë ndaja. Hane camayehe ne, ngujo ne casua tutjë rë ngu cientu sa cuatjin sacuatjin xi camatjë, ngujo nga ne, yachantë sa, hane ngujo nga ne, cantë sa sacuatjin xi camatjë. <sup>9</sup>Yo ngayun xi tjin nuju cjuasua xi cuinuhyun cjuua naha ne, ndaja tetuhunrcun. —Cuatjin cachja me.

Mé má ejemplu cachja  
Jesucristu cojo xuta

<sup>10</sup>Hya xi camá ne, cafehetiña xuta ladu rë me cavinenguisse me Jesús tsëhë ejemplu xi chja me ta, ¿mé tsëhë xi ejemplu ni vicuya me cojo? <sup>11</sup>Hane cafayangui me tsëhë xuta jan cuitjin:

—Nina ne casua me cahndé xi ngayun ne, cuijne rcu cjuatacun tsëhë gobiernu xi sahmi Nina, cjuatahahma xi titjun ne tsajin yo machaya rë. Peru yëjë sa me xi yahnga ne, casuaain me cahndé xi cuijnercu me. <sup>12</sup>Me xi ha tjin rë cjuatacun jan ne, sua sa Nina me, ndaja cuijne rcu me. Hane me xi tsajin cjín rë cjuatacun jan ne, cjuahataha Nina hitsë xi tjin rë me. <sup>13</sup>Vëhë xi suvá ejemplu tichjá cojo rë me ta, handasa vutsejen me, peru sahmicuendaain me; visiñuju me ne, peru sahmi me sacuaha xi vihndiin me hacuaha vijni rcu me. <sup>14</sup>Xi cuatjin sahmi me ne, sahmicihin me cjuua xi catsihindu profeta Isaías xi catsihindu cjuua vihi:

Handasa cuisiniñuju ngayun ne,  
peru ha tuxa cuijnii rcun;  
Handasa chutsujun ne, peru  
cumatsijiin nuju.

<sup>15</sup>Xuta xi cuacun vë ne, tichjá  
cjuatacun rë me,  
tyjavañuju me cojo tuxcun me  
ne, cavechja me,  
ta sá tu scuëë me cojo tuxcun  
me,  
hane sá cuihndë me cojo  
tyjavañuju me,  
hacuaha cuijne rcu me cojo  
cjuatacun rë me, sehe cuya  
me ladu naha xi cuaxëtjë me.

<sup>16</sup>Peru ngayun ne, jemu ndaja  
tsujun ngayujun ni tsëhë xi hatuxa  
tichutsujun cojo tuxcun; hacuaha  
visiñuju cojo tyjavañuju. <sup>17</sup>Nguehe  
cuichjá quixë cojo nuju ta jemu  
ndaja tsujun ta, tsëhë xi hacuaha  
jemu cjín profeta hacuaha jemu  
cjín xuta xi matitjun xi caviyuju  
titjun ne, jemu meje scuëë me  
xcusun xi ngayun tichutsujun, peru  
casacuiin cavëë me. Hacuaha jemu  
meje cuisiniñuju me cjua xi tivisiñuju  
ngayun, peru casacuiin cavisiniñuju  
me ta, tsëhë xi cjëë cuechu nixtin.

#### **Cachja Jesús mé vijne ejemplu tsëhë cha xi catsitjë trigu**

<sup>18</sup>Cuatjín hindë ne, nuhyun mé  
meje cuichja ejemplu tsëhë cha xi  
catsitjë trigu. <sup>19</sup>Hya xi visiñuju ngu  
xuta cjua tsëhë gobiernu xi sahmi  
Nina ne, peru vijniircu me cjua jan,  
sehe vinduva Satanás ne, fahataha  
cjua jan tsëhë xahasen rë me. Cjua  
vi ne, hacui sacuaha trigu xi cavixu  
ndiya. <sup>20</sup>Hane tsëhë trigu xi cavixu  
hiscan jemu naxindya ne, hacui  
sacuaha hya xi vihndë xuta cjua rë

Nina, hane fahatsja me cojo cjuasua.  
<sup>21</sup>Peru trigu xi cuacun vë ne, jemu  
chúva tyjama rë vetju. Hacuanitjin  
ni vatju ngujo xuta má. Macjain rë  
me ngujo nixtin peru hya xi vechú  
ngu nixtin xi satë rë me cjuañihi  
o cjuandya xi sua xuta me ngatsë  
rë cjua rë Nina ne, fëcacun me  
cojo cjua jan. <sup>22</sup>Hane tsëhë trigu  
xi cavixu ngajñi nahyá ne, hacui  
sacuaha hya xi vihndë xuta cjua  
rë Nina, peru ha xcun xi cjuinduju  
me cojo nixtin rë me ne, tsingataha  
cacun me tsëhë cjuatacun xi satë  
naja nguehe ngasunhndë, hacuaha  
meje rë me cjuanchina xi cjuicani  
rë, hane vëhë suaain cahndé xi  
cumajyë cjua rë Nina cahntsua  
xahasen rë me, hacuaha sahmi me  
ngu cjuandaja xi tsingacun xi xuta  
rë Nina má me. <sup>23</sup>Hane hya xi vixu  
yahnga trigu hiscan nihndë ndaja  
ne, hacuaha hacui sacuaha hya xi  
vihndë xuta cjua rë Nina hane vijne  
rcu me mé vitexa Nina, hane sahmi  
me cjuandaja. Tjin me xi jercu  
quisun cjuandaja sahmi, hane tjin  
nga me ne, chuva cjuandaja sahmi  
me, hane yahnga me, hitsë sa chuva  
cjuandaja sahmi me.

#### **Ejemplu tsëhë xi jiyahma cojo tutjë rë trigu**

<sup>24</sup>Sehe cachja nga me ngu  
ejemplu cojo me, hane cuitjin  
cachja me:  
—Gobiernu xi sahmi Nina ne,  
cumá sacuaha camá hya xi catsitjë  
ngu xuta tutjë rë trigu ndaja xcun  
nangui rë. <sup>25</sup>Peru nixten ne, hya xi  
jiñafë xuta ne, cafehe ngu xi condra  
rë me catsitjë cha ngu ndiji xi meje  
tanguncun cojo trigu. Ngajan ngajñi

rë trigu jan catsitjê hma cha sehe quiji cha. <sup>26</sup>Hya xi camá ne, hisca xi cavetju xca rë, cavetju tú rë, sehe camachaya rë me tsêhê ndiji jan. <sup>27</sup>Hya xi camachaya rë me ne, cafehe mosu rë me xi tsêhê nangui jan, cavinenguise mosu me: “Nai, tutjê ndaja xi camá canitjun, ¿há cutjin cavetjun xi casecjan cojo ndiji ne?” <sup>28</sup>Ngajan cafayangui me tsêhê mosu jan: “Ngu me xi condra naha casahmi me.” Hane cafayangui mosu jan cuitjin: “¿Há hanguin chjanijñi ndiji jan?” <sup>29</sup>Peru cafayangui me cuitjin: “¡Jéya! Caveni chjanujñu ndiji jan ta sá tsajin ne, hacuaha chjanu trigu xi ndaja. <sup>30</sup>Catamacha catsijo, sehe cuichja hya xi tjune rë xi tjun ni cjuanejñi cha ndiji, sahmi cha xtê rë xi cuaca cha. Sehe cjuaya cha trigu, cuinchandaja cha cahndé rë.” Cuatjin fi ejemplu xi cachja Jesús.

### **Ejemplu tsêhê tutjê lihndi**

<sup>31</sup>Jesús ne, cachja nga me ngu ejemplu cuitjin:

—Gubiernu xi sahmi Nina ne, hacuaha cumajyê tangun cojo ngu tutjê ya mostasa ta jemu lihndi camahani ne. Tutjê jan ne, cafaha ngu cha catsitjê cha xcun nangui rë cha; <sup>32</sup>Tutjê rë ya mostasa ne, handasa hitsê sa lihndi má xi cumá rë yêjê ni tutjê xi yahnga ne, hya xi camá cha ni, hitsê sa jyê camá xi cumá rë yêjê ni ya xi yahnga. Cuma ngu ya xi hiscan nisê xi vitjen chu ngahnga ne, cuma sahmi chu ndava chu rcu ya jan.

### **Ejemplu tsêhê san rë pan**

<sup>33</sup>Cavuya cachja nga Jesús cuitjin:

—Gubiernu xi sahmi Nina ne, hacuaha tangun sahmi sacuaha san rë pan xi visecjan ngu chjuun ngajñi rë jyan chuva rë nahyu rë pan cojo sa xi sahmixa ngajñi rë yêjê ni nahyu cjin jan.

### **Me tsêhê xi Jesús ne, sahmixa me cojo ejemplu**

<sup>34</sup>Cuatjin cachja Jesús cojo xutacjin, ta ejemplu ni cachja me cojo xuta ne, cachjaain me chichihin ta, suvá cojo ejemplu.

<sup>35</sup>Cuatjin cavicuya me sehe cuetjucaa cjua xi catsihindu profeta ta:

Cjua xi vetju ntsuva ne, suva ejemplu ni;  
Cuichjá cjua xi hinchahma hisca ntsacu cavetsihin ngasunhndê.

### **Cachja Jesús mé vijne ejemplu tsêhê ndiji jan**

<sup>36</sup>Hya xi cavatju cachja me, sehe catsicjê Jesús cjua cojo xutacjin jan, cavisehen me cahntsua ndihya hane ngajan cafehe tjengui rë me cha ladu rë me, cavinenguise cha me ¿mé vijne ejemplu tsêhê ndiji nguijña jan?

<sup>37</sup>Sehe cafayangui Jesús cuitjin: —Cha xi catsitjê trigu ne, hacui Quihndi rë Xuta Jain. <sup>38</sup>Hane nguijña ne, hacui ngasunhndê. Tutjê ndaja ne, vêhê xuta xi vihndê me tsêhê Nina, hane ndiji jan ne, hacui xuta xi vihndê tsêhê xitsehen. <sup>39</sup>Cha condra xi catsitjê cha ndiji jan ne, hacui xitsehen xi matitjun cha. Hacuaha nixtin xi cjuanga ne, hya xi cjuê ngasunhndê. Hane cha xi cjuanga ne, hacui ángel. <sup>40</sup>Cuanitjin sacuaha ndiji xi



casahmi cha xtë rë xi cueti, cuatjin cumá cojo xuta xi hndiin tsëhë Nina hya xi cjuë ngasunhndë. <sup>41</sup>Hya ne Quihndi rë Xuta Jain ne, tsingatju me ángel rë me xi cuahaxin me yëjë ni xuta xi candiya xicjin me ngajni rë cjuatsehen cojo xuta xi sahmi me cjuatsehen, cuaxëxin me tsëhë gobiernu xi sahmi Nina. <sup>42</sup>Hya xi camá cavaxëxin me ne, scandiya me xuta hiscan cuaca me ngu ndihi jyë, ngajan jemu squihnda me hacuaha jemu cuanerii nehñu me. <sup>43</sup>Peru xuta xi tyjahi cjuatacun rë me xcun Nina ne, cumá me sacuaha tsuhi xi seti xi sua hasen rë camá ngajan gobiernu xi sahmi Nina nahmi rë me. Yo ngayun xi tjin nuju cjuasua xi cuinuhyun cjua naha ne, ndaja tetuhunrcun. —Cuatjin cachja me.

**Ejemplu tsëhë tujún xi caseyanijihma**

<sup>44</sup>Xuta xi meje cuisehen gobiernu xi sahmi Nina ne, hacuaha tangun me sacuaha ngu cha xi casacu rë cha ngu cahndé hiscan xi caseyanijihma tujún cjín. Hane hya xi camá ne, cavetsa nga cha tujún jan, sehe quiji cha cojo cjuasua ne, caviteña cha yëjë xi tjin rë cha sehe cavechutaha cha chji rë xáhva jan.

**Ejemplu tsëhë tuseti xi hnga chji rë**

<sup>45</sup>Hacuaha xuta xi meje cuisehen me gobiernu xi sahmi Nina ne, tangun me sacuaha ngu cha viteña xi vanguise cha ngu tuseti xi hitsë sa ndaja seti. <sup>46</sup>Hane xi sacu rë cha ngu xi jercu tu vengui chji rë ne, quiji cha caviteña cha yëjë xi tjin

rë cha sehe cavechutaha cha chji rë tuseti jan.

**Ejemplu tsëhë changa rë chu ti**

<sup>47</sup>Hacuaha gobiernu xi sahmi Nina ne, cumá sacuaha ngu changa jyë xi catsingatjeya xuta ndachacun. Hane hya xi camá ne, ngajan cahntsua changa jan camá tangun yëjë xcusun chu ti. <sup>48</sup>Vëhë xi hora xi catsë rë ne, cajuvë nga xuta changa jan ne cavejña me tjeheh rë ndachacun ngajan cavaxijin me chu. Chu xi chine ne, cavinchandaja me, peru cacandi me chu xi yahnga. <sup>49</sup>Cuanitjin ne cumá hya xi cjuë ngasunhndë, ta cuinduva ángel ne, cuatëcja me xuta xi tsehen cjuatacun rë me tsëhë xuta xi tyjahi cjuatacun rë me, <sup>50</sup>sehe scandi me xuta tsehen hiscan cuaca me ngu ndihi jyë. Hane ngajan ne, jemu squihnda me hacuaha jemu cuanerii nehñu me.

**Cjuanchina xatsë cojo cjuanchina changa**

<sup>51</sup>Hya xi camá ne, Jesús ne, cavinenguise me xicjin me:

—¿Há cavijne rcu cjua vi?

Ngajan cafayangui me:

—Juun, cavijnrcuin.

<sup>52</sup>Sehe ngajan cachja Jesús cuitjin:

—Hya xi ngu maestro xi vicuya me ley ne, sá xi scutaya me xi meje cuisehen me ladu tsëhë gobiernu xi sahmi Nina ne, sahmi me sacuaha nai rë ngu ndihya jyë. Xuta jan ne, vaxë me xcusun xatsë ne, hacuaha vaxë me xcusun changá tsëhë cahndé xi cavinchandaja me.

**Jesús ne, cavuya me nangui rë me**

<sup>53</sup>Hya xi camá cajnetaha cachja Jesús ejemplu vihi ne, sehe cavatju quijixin me. <sup>54</sup>Hane xi quiji me ne, cafehe me nangui rë me, ngajan cavicuya me xuta cahntsua yungun rë. Hya xi camá ne, jercu cavëhërcun me Jesús, hane cachja me cuitjin:

—¿Jani cavutaya cha vihi ta jemu tjin rë cha cjuatacun? ¿Jani casacu rë cha cahndé xi sahmi cha cjuarcun? <sup>55</sup>Cha vihi ne, quihndi rë cha chjineya jan. Naa ra ne, María hmí na. Hacuaha xicjin cha ne, hacui Jacobo, José, Simón cojo Judas. <sup>56</sup>Hacuaha tichjá cha ne, xuta nandya naja. Ha hyun ta cuatjin peru, ¿jani casacu rë cha cjua xi tichja cha?

<sup>57</sup>Cuatjin ne mijí cjuaha cuenda me cjua rë Jesús tsëhé xi tangun nangui rë me. Sehe cachja Jesús cuitjin:

—Ngu profeta ne, macjain rë xuta me, peru hatuxa xuta nangui rë me macjaain rë me tsëhé me. Hacuaha xuta ndava me ne, macjaain rë me tsëhé me.

<sup>58</sup>Cuatjin camá ta tsëhé xi ngatsë rë xi macjaain rë xuta me ne, ndastu cjin cjuarcun casahmi me ngajan.

**Xi má rë Herodes ne, Jesús ne, hacui Juan Vitenda Xuta**

**14** Nixtin hya ne, camachaya rë me xi matitjun xi hmí rë Herodes cjua xi tichja xuta tsëhé Jesús. <sup>2</sup>Ngajan xi cachja me cojo xuta xi faha cuenda rë me ta:

—Cha vëhé ne, hacui nima Juan Vitenda Xuta. Handasa cahme nima,

peru ha cavascaya rë, vëhé xi tjin rë cha ngahño xi má sahmi cha cjuarcun.

<sup>3</sup>Ta Herodes jan ne, ha catsingatju me cachjaha rë Juan ne, catsihño me cha xi quiji cha ndavaya.

Cuatjin casahmi Herodes ta tsëhé xi cuatjin cachuya rë na Herodía, chjuun rë hntsë Herodes. <sup>4</sup>Tsëhé na vë cachja Juan cojo Herodes cuitjin:

—Chja ley ta ndajintjin camahani xi chjahan chjuun rë xingueen.

<sup>5</sup>Herodes ne, meje tsiquehen me Juan jan, peru camaji ta tsëhé xi xi má rë xuta ne, cha Juan ne, hacui profeta má cha. Hane Herodes ne, tsacjun me xuta. <sup>6</sup>Cuatjin camá xi hya xi cavechu nixtin rë suhi tsëhé Herodes, na quihndi rë na Herodía ne, catë na ngajni xuta xi siu suhi jan. Hane jemu cachuya rë Herodes xi cuatjin catë na. <sup>7</sup>Sehe ngajan xi Herodes casua na me cjua quixi rë me xi sua me na tu mé ni xi meje cjuehya na. <sup>8</sup>Ngajan xi na vë ne, hya xi ha cavinchangui na naa rë na ne, cachja na cuitjin:

—Meje ná xi cahntsua ngu tyuva ne, tuhun ná rcu Juan Vitenda Xuta.

<sup>9</sup>Hya xi camá ne, jercu choho cama rë Herodes. Peru tsëhé xi hisca Nina caveyanangui me hane tsëhé xi xcun cjin xuta jan casua me cjua ne, catsingatju me cjua xi cuatjin cumá. <sup>10</sup>Hane cavitexa me sindadu cavatësun cha rcu Juan ngajan ndavaya. <sup>11</sup>Hya xi camá ne, cafehe cha cojo rcu jan xcun ngu tyuva hane casua me na. Sehe quijitjengui na naa rë na, casua na naa rë na. <sup>12</sup>Hya xi camá ne, xuta ladu rë Juan jan, cafehya me nima caveyaniji me. Sehe quiji me casua me camachaya rë Jesús.

**Catsicjen Jesucristu hñú mil xihin**

<sup>13</sup>Hane xi camachaya rè Jesús ne, cavetju me ngajan cavisehen me ngu barcu quiji me ngu cahndé xín. Peru xi camachaya rè xuta ne, cavetju me tséhë nandya ne, quiji ntsacu me tjehen laguna quiji tjengui me Jesús. <sup>14</sup>Xi tu cavetju Jesús tséhë barcu ngunda ne, cavutsejen me xutacjín jan, hane camayuma rè me xuta jan. Hane catsindaja me xuta hmu rè. <sup>15</sup>Hane hya xi jimá nguixun ne, cafehe xuta ladu rè me cachja cojo me cuitjin:  
—Jemu xín camahani cahndé vi, hane ha quiji hora. Ninguijnutuhun cjua cojo xutacjín vë ne, sehe catji me nandya xi siu tiñataha catatsë me comida xi sinë me.

<sup>16</sup>Peru Jesús ne, cuitjin cachja me cojo cha xi tejó jan:

—Sahmii nguivyë xi cjuexin me ne, ngayun tuhun xi sinë me.

<sup>17</sup>Sehe ngajan xi cachja cha ladu rè me cuitjin:

—Hñu pan ne cojo jo ti tjín naja.

—Cuatjin cachja cha.

<sup>18</sup>Sehe cachja Jesús cuitjin:

—Nduvuncujun.

<sup>19</sup>Hya xi camá ne, casahmi Jesús xi catiyuju xutacjín jan xcun ndiji; sehe cafahtsja me hñu rquí pan jan cojo jo ti jan. Hane tivutsejenniji me ngahnga ne, casua me nacuechji rè Nina, sehe cavotoho langa me pan casua me pan jan cha ladu rè me xi cjue sua cha sinë xuta. <sup>20</sup>Hane xuta ne, yëjë ni me cajinë me hacutjin cachuya rè xahasen rè me. Hane xi cachjaya rè xi cavangui cajinë xuta jan ne, catsë tejó chajne. <sup>21</sup>Me xi cajinë

pan jan ne, hñú mil má me xi xihin. Ha xin yachjin cojo langa xi hacuiin cojo camaxqui.

**Quiji ntsacu Jesucristu xcun nandá**

<sup>22</sup>Hya xi camá ne, Jesús ne, casahmi rè me nguivyë xuta ladu rè me xi cuisehen me barcu hane cjue titjun ni me ngunda vëhë, jinguyëjë rè xi tsinguijnetaha me cjua cojo xutacjín jan. <sup>23</sup>Hane hya xi camá quiji xutacjín ne, sehe camijixin Jesús rcu ndetjún xi cuisiajmi me cojo Nina. Hane hora xi camá nguixun ne, tacun suvá me. <sup>24</sup>Peru barcu jan ne, vasentjin laguna cjui, hane jemu chja cjui ngatsë rè tsindyu rè nandá xi tsivaha rè barcu ta, tséhë xi tjo ne, taha hiscan cjui ne, ngajan nduva.

<sup>25</sup>Hane hya xi tiña sahasen ne, quiji ntsacu Jesús xcun nandan ne quiji tjengui me me tséhë me. <sup>26</sup>Hya xi cavëë xuta ladu rè me xi nduva ntsacu me xcun nandan ne, jemu camá xti rè me cachja me ta nima xi meje cuincharcun rè me, hane cajindayatë me. <sup>27</sup>Ngajan xi cachja Jesús cojo me ta:

—iXi carcuun! iTuhun cjuetacun xahasen nuju ta ngahan vi!

<sup>28</sup>Hya xi camá ne, cafayangui Pedru tséhë Jesús cuitjin:

—Nai, sá xi quixi xi ngayun ne, tuhun ná cahndé nduvá tjenguë nuju.

<sup>29</sup>Sehe cachja Jesús cuitjin:

—Nduvun.

Hane cavitjune Pedru tséhë barcu jan, quiji ntsacu me quiji tjengui me Jesús. <sup>30</sup>Peru xi camachaya rè me tjoxtin ne, catsacju me camá, sehe cavetsihin cavisehen ngahma

me ngajñi nandan. Hya xi camá ne cajindayatè me Jesús cachja me cuitjin:

—iNai, naxuntjun ná!

<sup>31</sup>Hya xi camá ne, ngutjen cafahtsja Jesús me, cavaniji me me ne, cachja me cojo me cuitjin:

—Ngayun ne, cjëë

cumangutacunndujun cojo ná, ¿mé má macjaain nuju?

<sup>32</sup>Hya xi camá ne, cavisehen catsijo me cahntsua barcu jan, hane hora vëhë ne casejyu tjo jan. <sup>33</sup>Ngajan xi xuta xi hincha barcu jan ne, cavixcuhnchi me cafahtarcun me Jesús cachja me cuitjin:

—Ngayun ne, quixi jain xi Quihndi rë Nina yun.

#### Casahmi Jesús xi camandaja xuta nandya Genesaret

<sup>34</sup>Xi quiji sa me cojo barcu ne, cafehe me tjehen laguna hiscan nandya xi hmí Genesaret. <sup>35</sup>Hane xi camachaya rë xuta xi Jesús xi cafehe me, catsingatju me cjua rë yëjë ni nandya xi siutahndee, hane xuta ne quijicojo me xuta hmu rë me hiscan tacun Jesús. <sup>36</sup>Sehe cafehya me cojo Jesús xi ndastu satëtaha xuta hmu rë jan ntsacu tsjian rë Jesús. Hane yëjë ni xuta hmu rë xi casatëtaha ntsacu tsjian rë Jesús ne, camandaja me.

#### Cha partidu fariseo ne, fahataha cha Jesús

**15** Ngu ndiya ne, ngujo cha tsëhë partidu fariseo cojo ngujo cha maestro rë ley ne, canduva cha tsëhë nandya Jerusalén, quiji cha hiscan tacun Jesús, cachja cha cojo me cuitjin:

<sup>2</sup>—¿Hacutjin cumá xi cha ladu nuju ne, sahmii cha sacuaaha yaha xcusun rë xutachanga naja? Ta cuatjin vanii cha tsja cha hora xi jinë cha niñu.

<sup>3</sup>Ngajan xi Jesús cafayangui me tsëhë cha cuitjin:

—Hane ngayun ne, ¿hacutjin cumá xi vejñuxun cjua xi cavitexa Nina ngatsë rë xi nihñu xu xcusun rë xutachanga naja? <sup>4</sup>Cachja Nina ta: “Chjuhuncun na nuju, chjuhuncun nahmi nuju”, hacuaaha chja ta: “Yo xi choho chja tsëhë xutacha rë ne, xuta ne tsiquehen rë.” <sup>5</sup>Peru ngayun tuhun cahndé xi cuichja xuta cojo xutacha rë ta: “Ha quihndé cumaji cuisécoo nuju ta yëjë ni xcusun xi tjin ná ne, ha cavejñá tsja Nina.” <sup>6</sup>¿Mé má cuatjin tuhun cahndé xi faharcuiin cha nahmi rë cha? Cuitjin ne, ngatsë rë xcusun nuju sacuaaha xi venguichjiin rë cjua rë Nina xi cuma rë xuta.

<sup>7</sup>Ngayun ne, xuta jo xcun jo hntsua ngayun. Cachja quixi profeta Isaías xi cuitjin catsihindu me tsjun:

<sup>8</sup>Xuta xi cuacun vi ne, ndaja chja me tsahan

peru xi cojo xahasen rë me ne, hisca tsinguitsjiin me ngahan.

<sup>9</sup>Tu mahya xi faharcun ná me ta, Xi vicuya xicjin me ne, hacuiin cjua naha ta tu cjua rë xuta.

<sup>10</sup>Hya xi camá cachja me cuatjin ne, cajindaya Jesús xutacjín cachja me cojo cuitjin:

—Ngayujun ngarca ni ne, nuhyun ndaja cjua vi: <sup>11</sup>Xcusun xi tsitsehen rë xuta ne, hacuiin xcusun xi chine xi visehen hntsua me, ta xcusun xi tsitsehen rë xuta ne, xcusun xi vetjun tsëhë hntsua me.

<sup>12</sup>Sehe cafehe xuta ladu rë Jesús ne, cavinenguise me cuitjin:

—¿Há hyun xi canicjun rë cha partidu fariseo ne xi cuatjin canújun?

<sup>13</sup>Peru cafayangui Jesús cuitjin:

—Tu mé ni tutjé xi catsitjiin nahmi naha xi tacun ngahnga ne, tjune rë hisca cojo tyjama rë. <sup>14</sup>¡Caveni! ¡Nihñuu cuendun me! Me vëhë tangun me cojo xuta rcá xi cjuecane xicjin me. Hane sá xi cuatjin ne, cuixuya catsijo me xanga.

<sup>15</sup>Sehe cachja Pedru cuitjin:

—Ningacun niji mé vijne ejemplu jan.

<sup>16</sup>Ngajan xi Jesús cachja cojo me ta:

—¿Há hiscan ngayun cajni rcun cjua xi cachjá ni? <sup>17</sup>¿Há hyuun xi xcusun xi jinë xuta ne visehen cahntsua me? Fë ne, vetjutaha ndatsen. <sup>18</sup>Peru xcusun xi vetju chja me ne, nduva tsëhë xahasen rë me, hane vëhë tsitsehen rë me, <sup>19</sup>ta tsëhë xi tsëhë xahasen rë xuta ne, nduva cjuatacun tsehen sacuaaha jyé xi tsiquehen xicjin xuta, sacuaaha jyé xi sahmi chjuunnahñu rë me jingu sa chjuun, sacuaaha yachjin xi viteña yojo rë, sacuaaha cjuachëjë, sacuaaha testigu xi vindacha me, sacuaaha cjuachjataha. <sup>20</sup>Yëjë cjuatsehen xi cuacun vëhë ne, nduva tsëhë xahasen rë xuta, hane vëhë tsitsehen rë me; peru sá jinë me niñu cojo tsja me xi cjëë cuane me ne, tsitsiin rë me.

**Jesús ne, visecoo me ngu  
chjuun xutaxín, na xi hacuiin  
na ladu tsëhë Israel**

<sup>21</sup>Hane Jesús ne, cavetju me ngajan, quiji me ngu nanguixin

táha distritu nandya Tiro cojo nandya Sidón. <sup>22</sup>Hya xi camá ne, cafehetjengui rë me ngu chjuun cananea xi tsëhë ngajan. Cajindaya na cachja na cojo Jesús cuitjin:

—¡Nai! Ngayun, quihndindaicjin rë David, icatamayuma nuju ngahan! ta na quihndi naha ne, jiya xitsehen xi jemu suandya rë na cahntsua xahasen rë na.

<sup>23</sup>Peru Jesús ne, ndastu me cjuacatsicuya me. Hane xuta ladu rë me ne, cafehya me Jesús cuitjin:

—Ningatjunxun na, ta jemu si nduvatjengui na yaan fehyataha na yun. —Cuatjin cachja me.

<sup>24</sup>Ngajan xi cafayangui Jesús cuitjin:

—Nina ne, catsingatju me ngahan ngatsë rë xuta rë nangui Israel, ta me vëhë sacuaaha tsánga xi cachaja má me.

<sup>25</sup>Hya xi camá ne, cafehetiña na tsëhë Jesús cavixcuhnchi na xcun Jesús xi cafaharcun na me. Cachja nga na cuitjin:

—Tatá, nihñu favor tiseacun ná.

<sup>26</sup>Ngajan xi cachja Jesús ejemplu vi:

—Sechiye ne catijnetaha catjine nixti ta, hacuiin ndatjin xi chjahantahan niñu tsëhë nixti hane sehe tahan rë naña.

<sup>27</sup>Hane cafayangui na cuitjin:

—Quixi jain xi nújun, peru naña xi siu ngahma maxë ne, sacu xi rë pan xi vixuhndu ngahma maxë rë nai rë chu hane jinë chu.

<sup>28</sup>Sehe cafayangui Jesús cachja me cojo na cuitjin:

—Ngaye chjuun, jemu ndaja mangutacuín cojo ná. Catamandaja quihndi riji sacuaaha xi meje ri.

Hya xi camá ne, hora hya ne,  
camandaja quihndi rë na.

**Casahmi Jesús xi camandaja  
xuta tjeheh rë laguna Galilea**

<sup>29</sup>Hya xi camá ne, cavetju Jesús taha vëhë quiji me tahndee rë laguna Galilea sehe ngajan camiji me ngu ndetjún, ngajan cavejña me. <sup>30</sup>Hane jemu quijitjengui rë me xutacjín, yaha me xuta rengun, xuta rcá, xuta lihmi, xuta yoho cojo xuta xi má rë hacjahi chíhin ne caviyujutë me xuta jan xcun Jesús hane Jesús ne, casahmi me xi camandaja me. <sup>31</sup>Xi cavëë xutacjín xi cuatjín camá ta, cama cachja xuta lihmi, camajingu xuta yoho, findaja xuta rengun hacuaha tsejen rë xuta rcá ne, sehe jercu quijircun rë me, hane casahmi hnga me, casahmi jyë me Nina, Nina jan xi faharcun xuta nangui Israel.

**Cjuarcun xi catsicjen  
Jesús ñuju mil xihin**

<sup>32</sup>Ngajan cajindaya Jesús xuta ladu rë me, cafehe me cachja Jesús cojo rë me cuitjin:

—Jemu yuma má ná xutacjín vi ta ha quihndë jyë nixtin hinchataha me cojo naja, hane ha quihndë tsajin camahani mé xi sinë me. Tsajin mangucacun xi tsingátju me cjue me xi cjëë sinë me niñu ta, sá tsajin ne, cjuaha rë me hinda ndiya.

<sup>33</sup>Sehe ngajan xi xuta ladu rë me ne cafayangui me tsëhë me cuitjin:

—Peru nguehe nangui xín ne çjani cuma sacú niji pan xi sinë xutacjín vi?

<sup>34</sup>Ngajan xi cavinenguise Jesús cojo xuta cuitjin:

—¿Há cjín pan tjin nuju?

Ngajan xi cachja me ta:

—Yatu má pan hacuaha siu ngujo ti langa.

<sup>35</sup>Ngajan xi Jesús ne cavitexa me xutacjín xi cuiyujutë me nangui.

<sup>36</sup>Hya xi camá casahmi xuta ne, sehe cafaha Jesús yatu pan cojo ti jan ne sehe casua me nacuechji rë Nina. Hane cavotoho langa me pan cojo ti jan, casua me xuta ladu rë me xi cavatëcja me ne cafaha xutacjín. <sup>37</sup>Cuatjín camá cajine xuta jan, hane jemu ndaja cama rë xahasen rë me. Hane xi cafaya xuta xi cavangui cajinë xuta jan ne catsë yatu nisinya. <sup>38</sup>Xuta xi cajinë ne, sacuaha ñuju mil má me xi xihin me, hacjahi má xuta chjuun cojo quihndi. <sup>39</sup>Hya xi cajnetaha vëhë ne, catsingatju Jesús xuta cafe me, hane suvá ni me, cavisehen me ngu barcu quiji me taha nandya Magadán.

**Cha partidu fariseo cojo cha  
partidu saduceo ne fehya cha  
xi tsingacun Jesús ngu seña**

**16** Xi cafehe me ngajan ne, hacuaha cafehe cha tsëhë partidu fariseo cojo cha partidu saduceo hane ta tsëhë xi meje cjuahachuva cha me, cafehya cha me ngu cjuarcun xi nduva ngahnga, cojo sa xi scuëë cha xi Nina catsingatju rë Jesús. <sup>2</sup>Peru Jesús ne, cafayangui me cojo ejemplu vi cuitjin:

—Nguehe ne, hya xi chutsujun xi má haní ngahnga ne, nújun jain, ta: “Tyjahi nchujun ni, ndajyihí nixtin.”

<sup>3</sup>Cuanitjin hya xi sahasen ne, sá xi má haní ngahnga hane hinchá yufí

jma ne, nújun ta: “Va cumá nixtin.” Jo má tacun. ¿Hacutjin cuma xi jemu hyun mé vijne xcusun xi cún ngahnga, peru vijniircun mé vijne xcusun xi tijima nguehe nixtin vihi ni? <sup>4</sup>Xuta tséhë nixtin vihi ne, xuta xi tsehen cjuatacun rë me, xi tjenguin me Nina cojo ngu ni cjuatacun, xuta vë xi fehya me ngu seña. Peru sacuiin rë me seña ta seña xi sacu rë me ne, sacua ha seña xi ha catsingacun profeta Jonás hatsëë nixtin.

Sehe xi cajnetaha cachja Jesús cjuá vëhë ne, caviyuju me xuta jan ne, quiji me.

#### **Ejemplu tséhë san rë pan**

<sup>5</sup>Hya xi cafehe xuta ladu rë me ngunda laguna ne, hacua ha cachaya rë me cjuaha me pan.

<sup>6</sup>Sehe Jesús cachja cojo me:

—Nechun cuidadu tséhë san rë pan tséhë cha partidu fariseo cojo xi tséhë cha partidu saduceo.

<sup>7</sup>Sehe cha ladu rë me ne, cavisiajmi cha cojo xicjin cha cuitjin:

—Tséhë xi cachaya naja pan ne, vëhë xi cuatjin chja me.

<sup>8</sup>Peru xi camachaya rë Jesús xi veyanangui cha xi tsajin rë cha pan ne, cachja me cojo cha cuitjin:

—Ngayun ne, cjëë cumangutacun nduju cojo ná. ¿Mé má cuatjin nújun xi chjá ta tséhë xi tsajin nuju pan? <sup>9</sup>¿Há nuhyuun? ¿Há vitsjiin nuju? Hya xi cajinë hñu mil xuta hñu pan ne, ¿há cjín chajne cachjayun tséhë pan xi cavangui jan? <sup>10</sup>Hacuaha hya xi cajinë ñuju mil xuta yatu pan ne, hya ne ¿há cjín chajne cachjayun? <sup>11</sup>¿Hacutjin

cuma xi nuhyuun xi hacuiin tséhë pan xi cachjá cjuá jan? Xi chjá ne, nechun cuidadu tséhë san rë pan tséhë cha partidu fariseo cojo xi tséhë cha partidu saduceo.

<sup>12</sup>Hya xi camá ne, camachaya rë me xi cachjaain me xi meje cuidadu cojo san xi sahmixa pan ta cachjá me tséhë xi meje cuidadu cojo cjuachacun xi sahmixa cha partidu fariseo cojo cha partidu saduceo.

#### **Catsinguixi Pedru yo Jesucristu**

<sup>13</sup>Ngu ndiya xi ha cavisehen Jesús distritu tséhë nandya Cesarea tséhë Filipino ne, cavinenguise me xuta ladu rë me cuitjin:

—Mé chja xuta tsahan, ¿yo ngahan, Quihndi rë Nina Jain?

—Cuatjin cavinenguise me cha.

<sup>14</sup>Sehe ngajan xi cachja cha cojo Jesús cuitjin:

—Yahnga me ne, chja me ta nima Juan Vitenda rë Xuta ngayun, hane yahnga nga me ne, chja me ta Elías, hane yahnga nga me ne, chja me ta nima Jeremías, hane me xi yahnga nga ne, chja me ta ngayun ne, ngu profeta xi hacjahi.

<sup>15</sup>—Hane ngayun ne, ¿mé nújun ni, yo ngahan? —Cuatjin cavinenguise Jesús.

<sup>16</sup>Ngajan xi cafayangui Símon Pedru cuitjin:

—Ngayun ne, Mesías xi catsingatju nuju Nina; ngayun, Quihndi rë Nina, Nina quicun jain.

<sup>17</sup>Sehe cachja Jesús cuitjin:

—Ndatjin tsujun, Símon, quihndi rë Jonás. Tsajin ngu xuta xi casua camachaya nuju cjuá jan, ta Nahmi naha xi tacun me ngahnga ne, me vëhë xi casua me xi camachaya

nuju tsëhë. <sup>18</sup>Hane ngahan ne, suá cumachaya nuju xi ngayun ne, ngayun xi hmí nuju Pedru. Hane ñihi nuju ne, vijne ndyojo. Hane xcun ndyojo vihi sahme yungun naha; yungun jan ne, hisca cjuaveya ne tsajin ngahñu xi tsicjéya rë. <sup>19</sup>Suá nuju quicha tsëhë gobiernu xi sahmi Nina, ngajan xi xcusun xi nihñucjun nguehe ngasunhndë ne, hacuaha cumahñucjan ngajan ngahnga, hacuaha xcusun xi chundecjun nguehe ngasunhndë ne, hacuaha tundejan ngajan ngahnga.

<sup>20</sup>Sehe Jesús ne, cavitexa me xuta jan xi tsajin camahani yo xi cuichja me cojo tsëhë xi Mesías má me.

#### Cachja Jesús xi tsiquehen xuta me

<sup>21</sup>Hya xi camá ne, sehe cavetsihin vicuya Jesús xuta ladu rë me tsëhë xi sahmi nguýjë xi cjue me nandya Jerusalén, hane ngajan ne, jemu cjín cjuañihi cuátju me cuma xi sahmi xuta changá cojo nahmi xi matitjun tsëhë nahmi cojo cha xi vicuya cjuachacun ne. Tsitjungui cha me, tsiquehen cha me; peru xi cumá jyan nixtin ne, tsicuya Nina me cjuahñu. <sup>22</sup>Ngajan xi Pedru ne, quijixin me cojo Jesús. Sehe cavetsihin cachjataha me Jesús cuitjin:

—Tatá, icatamamiji rë Nina!  
iHatuxa cumaji cuatjun cuatjin!

<sup>23</sup>Hane xi cavuya Jesús cavutsejen me Pedru, ngajan cachja cojo me cuitjin:

—Tihinxin gaye Satanás, gaye ne, sacuaha ngu ndyojo xi meje xtenguiya ná ngajní cjuatsehen tsëhë xi ningatiintacuin gaye

sacuaha tsingatahacacuin Nina ta ningatehetacuin sacuaha ngu xuta ngasunhndë ni.

<sup>24</sup>Sehe cachja Jesús cojo cha ladu rë me cuitjin:

—Sá xi tjin yo xi meje rë xi cuma cuisehen me ladu naha ne, ha quihndë mijí rë xi sahmi me hacutjin xi meje rë suvá me ta nchunchujun ni meje rë xi catejñahñu xahasen rë me xi cjuenduju me cojo ndiya naha, handasa hisca cueya me xcun cru. <sup>25</sup>Yo xi mijii cuisehen ladu naha tsëhë xi tsacjun me xi cueya me ne, cahndé xi vetjo me cjuahñu rë me ne, tsichaja me cjuahñu xatsë xi sacu rë me. Peru yo xi ngatsë rë xi cavisehen ladu naha cueya ne, sacu rë cjuahñu jan. <sup>26</sup>¿Mé machji rëhë rë yo xi sacú rë yëjë cjuanchina rë ngasunhndë peru sehe cueya ne cumá castigu? Tsajin mé xi cuma tsindeya xicjin me cojo cjuahñu xatsë. <sup>27</sup>Ta ngahan, quihndi rë Xuta Jain, cuinduvá cojo hasen ndajiyihi tsëhë Nahmi naha hacuaha cojo ángel naha cuinduvá; hane hya ne, cuechji me jimangu me, ¿há ndaja há ndajin casahmi me? <sup>28</sup>Cuichjá quixë cojo nuju ta tjin yahnga ngayun xi sechun nguehe xi cueyuun jinguyëjë rë xi cjëë chun xi cuitexa Quihndi rë Xuta Jain gobiernu xi sahmi Nina.

#### Cavindeya xcusun rë Jesucristu

**17** Hya xi camá cavatju jyun nixtin ne, quijixin Jesús quijicojo me Pedru cojo Jacobo cojo Juan, hntsë Jacobo, quijiniji me ngu naxi hnga. <sup>2</sup>Ngajan camá xi cavëë me xi cavindeya xcusun rë Jesús:



Xcun me ne, camaseti sacuaha seti tsuhi, hacuaha tsjian rë me ne, jemu tu tyava camahani camá sacuaha hasen rë ndihi. <sup>3</sup>Hacuaha ngajan cavëë me xi cafehetsejen nima profeta Moisés cojo profeta Elías, me xi caviyuju hatsëë nixtin ne, tivisiajmi me cojo Jesús.

<sup>4</sup>Sehe cachja Pedru cojo Jesús cuitjin:

—Nai, tu ma rë xi nguehe nechin ne, sá xi meje nuju ne, sahme jyan puestu; ngu cuma tsujun ne, ngu cuma tsëhë Moisés, hane cojo ngu cuma tsëhë Elías. —Cuatjin cachja me.

<sup>5</sup>Hane hora xi tichja Pedru ne, canduva ngu yuff xi seti tsejen casahmi tjahnguen rë tsëhë me, hane canuhya rë ngujo cjuu xi cavetju ngajñi yuff jan xi cachja cuitjin:

—Cha vihi xi Quihndi naha cha xi jemu hmu cacún. Jemu ndama ná ngatsë rë cha. Tinuhyun cjuu xi chja cha.

<sup>6</sup>Hya xi cahndë xuta rë me cjuu jan ne, caticaxcun me. Hane jemu catsacjun camahani me camá.

<sup>7</sup>Ngajan xi cafehe Jesús cavetahatsja me me, hane cuitjin cachja me:

—Tisatjunhngun. Xicarcuun.

—Cuatjin cachja me.

<sup>8</sup>Hane xi cavutsejenniji me ngajan ne, ndastu yo siu ta suva ni Jesús tacun me.

<sup>9</sup>Xi tu tivijne me tsëhë rcu naxi jan cojo xuta ladu rë me xi quijicojo me jan ne, ngajan xi cachja me cojo me ta tsajin yo xi cuichja me cojo xcusun xi cavëë me. Xi cuatju cueya Quihndi rë Xuta Jain, sehe cuya ngaja me cjuahñu ne, hya cuichja me.

<sup>10</sup>Ngajan xi cavinenguise me cojo Jesús cuitjin:

—¿Mé má cuatjin chja maestru tsëhë ley xi titjun Elías cuinduva me, sehe cuinduva Mesías?

<sup>11</sup>Ngajan cafayangui Jesús cuitjin:

—Quixi xi Elías cuinduva me titjun ta me vëhë cuiyujuchihin me yëjë ni xcusun. <sup>12</sup>Peru cuichjá cojo nuju ta ha canduva me, peru xuta ne, hvíin me xi hacui me, hane choho casahmi xuta cojo me hacutjin meje rë xahasen rë me. Hane hacuanitjin sahmi me xi cuátju cjuañihi Quihndi rë Xuta Jain.

<sup>13</sup>Ngajan xi camachaya rë xuta rë me ta tichja me tsëhë Juan Vitenda xuta hya xi chja me Elías.

**Jesucristu ne, casahmi me xi camandaja cha xi faha rë chajan**

<sup>14</sup>Hane xi quiji me ne cavechutaha me xutacjín ne, ngajan cafehetjengui rë me ngu xihin, cavixcuhnchitaha cha Jesús cachja cha cuitjin:

<sup>15</sup>—Nai. ¡Catamayuma nuju cha lihndi naha ta, jemu faha rë cha chajan hane jemu choho sahmi cojo cha. Jiya hora ne, finenguia cha ngajñi ndacahi, hane jiya hora nga ne, viticjaya cha ngajñi nandan.

<sup>16</sup>Cëjëcojo cha xcun xuta ladu nuju xi tsirqui me cha peru camaji casahmi me.

<sup>17</sup>Sehe ngajan xi Jesús ne, cuitjin cafayangui me:

—Ngayujun ni ne, xuta xi macjaain rë ngayun hacuaha xuta xi cavetjuxin tsëhë ndiya ndajyih ngayun. ¿Há jyë sa xi cuitejña cojo nuju? ¿Há jyë sa nixtin xi scaa

ná cojo nuju? Nduvuncujun cha nguehe. —Cuatjin cachja me.

<sup>18</sup>Hya xi camá ne, cachjataha Jesús xitsehen xi hinchaxahasen rë cha, hane cavetjuxin xitsehen jan, hane hora hya ne, camandaja cha.

<sup>19</sup>Hya xi camá ne, xi cafehe xuta ladu rë Jesús cavinenguisse me me cuitjin:

—¿Mé má ngayin ne xi camaji canaxinxin xitsehen jan tsëhë xahasen rë cha vë?

<sup>20</sup>Ngajan xi cachja Jesús cojo me ta:

—Camaji ta hacuiin ndaja macjain nuju. Ta cuichjá quixë cojo nuju ta sá xi mangutacún cojo ná ndastu hitsë ne, hacuaha cuma cuinújun cojo naxi vihi: “Catjixin, catjin catiseacun ngajan tavëhë.” Hane cuihndë tsujun. Hisca sá xi mangutacún cojo ná ndastu hitsë ne, tsajin me xi cumaji nihñu.

<sup>21</sup>Peru sacuaha xitsehen xi cuacun vë ne, meje rë xi titjun chjahyan rë Nina hacuaha cuinechan xun rë me, cojo sa xi cuma naxexeen.

#### Cachja nga Jesús xi tsiquehen xuta me

<sup>22</sup>Nixtin xi caviyuju Jesús cojo xuta ladu rë me ngajan distritu Galilea ne, cachja Jesús cojo me ngu nixtin cuitjin:

—Ngahan xi Quihndi rë Xuta Jain ngahan ne, hatuxa tjin xi cuma ngahan entregadu tsja xuta <sup>23</sup>xi tsiquehen ná me. Peru xi cjuë xi jyan nixtin ne, cuya nga cjuahñu.

Hane xi cahndë me cjuja jan ne, jemu cafaha me cjuachoho.

#### Jesucristu ne, cavechjitje me tujúnsa tsëhë yungun

<sup>24</sup>Hya xi cafehe me nandya Capernaum, cafehe xuta xi faha

me tujúnsa rë yungun, camatiña me tsëhë Pedru cachja me cojo me cuitjin:

—Maestru nuju ne, ¿há vechjitje me tujúnsa rë yungun?

<sup>25</sup>Ngajan cafayangui Pedru cuitjin:

—Juun, vechjitje me.

Hya xi camá ne, xi cavisehen Pedru ndihya ne, peru chajasa xi cuichja me ne, ngajan xi cachja Jesús cojo me cuitjin:

—Simón, ¿mé nújun? Sacuaha me xi matitjun tsëhë nandya ngasunhndë ne, ¿yo vitexa me xi satë rë xi cuechjitje tujúnsa? ¿Há quihndi rë me? ¿Há xutaxín?

<sup>26</sup>Ngajan xi cachja Pedru cuitjin: —Xutaxín cuechji me.

Cachja nga Jesús cuitjin:

—Sá xi cuatjin ne, quihndi rë me xi matitjun jan ne, ha cavatjuhnga tsëhë. <sup>27</sup>Quixi vë, peru cojo sa hacuiin ngatsë rë vëhë cumacjan rë me o maxti rë me cojo naja ne, tangun laguna ne, chandunyun tsitin ngajñi nandan ne, hane hya xi faha tsitin ngu ti ne, chu xi tjun faha rë ne, chjuhun chu nuxuhun hntsua chu hane ngajan cahntsua hntsua chu jan ne, sacú tujún xi stetaha cuechjun tujúnsa xi satë ná cojo xi satë nuju.

#### Yo xi matitjun

**18** Hya ne, xuta ladu rë Jesús cafehe tjengui me me, cavinenguisse me cuitjin:

—¿Yo xi hitsë sa cumatitjun hya xi sahmi Nina gobiernu?

<sup>2</sup>Hya xi camá ne, cajindaya Jesús ngu lihndi, cavejña me cavasencja.

<sup>3</sup>Sehe cachja me cuitjin:

—Hisca ngu ngayun cumaji cuisuhun gobiernu xi sahmi Nina ne, sá xi hacuiin nindeyun cjuatacun nuju hisca cuma yun sacuaha ngu quihndi. <sup>4</sup>Vêhë xi yo xi tsinguijne suvá me yojo rê me xi cuihndë me sacuaha vihndë ngu quihndi ne, me vêhë xi hitsë sa cumatitjun me hya xi sahmi Nina gobiernu. <sup>5</sup>Hane tu yo ni xi cjuahatsja rê ngu quihndi xi cuacun vê ngatsë rê xi ladu naha má ne; vêhë cuma sacuaha xi cafahatsja me ngahan.

**Xuta xi nduvacojo me xcusun  
xi tsitsehen rê xicjin**

<sup>6</sup>Peru yo xi nduvacojo xcusun xi sahmi xi tsismicacun ngu quihndi ndiya naha ne, hitsë sa ndaja tsêhë xuta vêhë xi xtyangui ngu ndyojo natsi nguisin me sehe ningatjeya rê me ngajñi ndachacun. <sup>7</sup>Jemu choho vatju xuta ngasunhndë ngatsë rê xcusun xi tsitsehen rê me xi sahmi me cjuatsehen. Hatuxa cuinduva xcusun xi meje sahmi xi tsismicacun xuta ndiya rê Nina, peru jemu chojyihî tsêhë xuta xi nduvacojo me xcusun vêhë.

<sup>8</sup>Hane sá xi cjuatacun nuju meje rê xi nihñu ngu jyé cojo ntsun o sá xi cojo ntsacu ne, vengui sa chji rê xi chandunxun, ta hitsë sa ndaja tsujun xi cuma yoho yun xi cuma rê xi cuechun jingu cojo catsijo ntsun o catsijo ntsacu xcun ndihî xi tsajin nixtin tsajin nixten xi coho. <sup>9</sup>Hacuaha sá xi cjuatacun nuju meje rê xi nihñu ngu jyé cojo xcusun xi chutsujun cojo tuxcun ne, chjuhunxun tuxcun jan chandunxun, ta tsêhë xi hitsë sa

ndaja tsujun xi sacu nuju cjuahñu xatsë handasa cojo ngu ni tuxcun xi cuma xi cojo catsijo tuxcun cuechun xcun ndihî xi sahmi castigu rê nima. <sup>10</sup>Cojo yêjê ni ne, nihñu cuidadu xi nitjunguun ngu quihndi sacuaha quihndi vihi, ta tsêhë xi ángel xi sahmi cuenda me ne, yêjê nixtin yêjê hora ne, siu tangun me cojo Nahmi naha hane sahmi ngujyê xi cjuehya me cahndé xi cuichja me cojo.

**Ejemplu tsêhë chu tsánga xi cachajá**

<sup>11</sup>Quihndi rê Xuta Jain ne, canduvá me xi cuaxëtje me xuta xi cachajá. <sup>12</sup>¿Mé xi nújun? Cuejñaa ne xi ngu xihin tjin rê me ngu cientu chu tsánga. Hane sá xi chajá ngu chu rê me, ¿há hyuun xi cuiyujutaha me chu xi ñujuchan tyjuhun ñuju jan nguijña ne, sehe cjue me cuanguise me ngu chu xi cachajá jan? <sup>13</sup>Hane hya xi sacú rê me chu ne, hitsë sa jyé cjuasua tjin rê xahasen rê me ngatsë rê xi casacu rê me chu xi cachaja xi cuma rê cjuasua tsêhë ñujuchan tyjuhun ñuju chu xi tetjo. <sup>14</sup>Cuanitjin xi cuma rê Nahmi nuju xi tacun ngahnga, ta mijí rê me xi chajá hisca ngu quihndi rê me cuatjin.

**Hacutjin meje rê xi  
cuinújantahan xingueen**

<sup>15</sup>Hane sá xi ngu xingun choho sahmi cojo nuju ne, tangun suvun tinújuntuhun rê, hane sá xi tsindeya cjuatacun rê ne, ndatjin, ta hacuiin cuetsuntaha cjuandaja xi tjin nuju cojo me. <sup>16</sup>Peru sá xi vihndiin me tsujun ne, tangun chjuhun ngujo

xuta tanguncujun xi tinújuntuhun rē tsēhē xi hya xi cuma me testigu nuju tsēhē, sehe cumatsejen cjuaquixi.

<sup>17</sup>Sá xi hisca cojo me vē vihndiin me tsēhē me ne, tangun tinújun tsēhē xcun xuta yungun, hane sá xi hacuaha vihndiin me cjuatacun rē xuta yungun jan, cumá me xi cuma nuju sacuaha ngu xutaxín o sacuaha ngu xuta ndacha xi faha rē tujúnsa.

<sup>18</sup>Cuichjá quixē cojo nuju ta xcusun xi nihñucjun nguehe ngasunhdē ne, hacuaha mahñucjan ngajan ngahnga, hacuaha xcusun xi nihñu ndaya nguehe, hacuaha mandaya ngajan ngahnga. <sup>19</sup>Hacuaha cuichjá cojo nuju ta sá nguehe ngasunhdē ne matangun cjuatacun rē jo ngayun tsēhē ngu xcusun xi chjahyun rē Nina ne, cuetjucaa jain tsujun ta sahmi chihin Nahmi naha xi tacun me ngahnga. <sup>20</sup>Ta tu mé ni cahndé xi cuiyujuntangun ngu jo jyan xuta xi ngajan veyanangui ñihi naha, hacuaha ngajan ngajñi rē me tejña ngahan.

<sup>21</sup>Sehe cafehe Pedru cachja cojo me cuitjin:

—Nai, ¿há cjin ndiya sahmi ngujoyē xi tsinchátaha xingueen sá xi choho sahmi me cojo ná? ¿Há ndatjin xi yatu ndiya?

<sup>22</sup>Ngajan cafayangui Jesús cuitjin:

—Hacuiin yatu ndiya ni, ta cuichjá cojo nuju ta mameje rē xi jyanchan tē cuatjin xi yatu ndiya ninchatuhun rē me.

### **Ejemplu tsēhē cha xi mijí tsinchataha xicjin cha**

<sup>23</sup>Ngajan tsejen xi hya xi Nina sahmi me gobiernu ne, cumá

sacuaha ngu me xi matitjun xi meje cuaxēchihin me cuenta xi tjin rē me cojo xuta rē me. <sup>24</sup>Hane hora xi tijima ne, cajindaya rē ngu cha xi cafehe cha hane cha jan ne, tē mil tujún quitjen cha. <sup>25</sup>Hane ngatsē rē xi tsajin camahani cha rē tujún xi sahmingojo cha, cachja me xi matitjun jan xi xteña cha xi cuma cha ngu mosu, xteña suva cha, hacuaha cojo chjuun rē cha cojo quihndi rē cha cojo yējē ni xi tjin rē cha, hane sehe cuatjin cuma cuechji cha tsēhē xi quitjen cha. <sup>26</sup>Hya xi camá ne, cavixcuhnchi cha xcun me cafararcun cha me cafehya cha me cuitjin: “Nai, catijnehnchan cjuacjan nuju, tuhun ná hitsē cahndé hane cuechjē tsujun.” <sup>27</sup>Ngajan xi me xi matitjun jan ne, camayuma rē me cha, catsijyēcacun me tsēhē cha tsēhē cjuacjintacun jan, catsinchataha me cha.

<sup>28</sup>Peru xi cavetju quiji cha jan, cavechutaha cha jan ngu cha xicjin cha xi quitjen tsēhē cha hitsē tujún, hane cafaha cha nguisin xicjin cha jan, cachja cha cuitjin: “Nihñi ngojo yējē xi quitjin tsahan.”

<sup>29</sup>Hane xi cavixcuhnchi xicjin cha xcun cha ne, cachja xicjin cha jan cuitjin: “Catijnehnchan cjuacjan nuju, tuhun ná hitsē cahndé ta cuechjē tsujun.” <sup>30</sup>Peru mijí sua cha cahndé, hane quiji caveya cha xicjin cha ndavaya, ngajan seya xicjin hisca xi cuma sahmingojo tujún. <sup>31</sup>Hya xi cavēē yahnga mosu xcusun xi camá cavatjun jan, jemu camá xti rē me quiji casuacuenda me tsēhē cojo me xi matitjun tsēhē me. <sup>32</sup>Ngajan xi cajindayavaha me xi matitjun cha jan, cachja me

cuitjin: “Ngaye, jemu choho xcusun riji. Catsinchátaha yějē ni xi quitjin tsahan, tséhē xi jemu cachjahye.

<sup>33</sup>Hane ngaye, ¿hacutjin cumá xi tsajin ri cjuayuma cojo xinguin? ta ngahan ne, cama yuma ná ngaye.”

<sup>34</sup>Cuatjin camá xi jemu camacjan rē me xi matitjun cojo cha jan, catsingatju me cha cjuañihi ngajan ndavaya jñu hisca nixtin xi cjuē cuechji cha xi quitjen cha.

<sup>35</sup>Hane cuatjin sahmi Nahmi naha xi tacun ngahnga cojo nuju, sá xi ninchatuun xingun cojo yějē xahasen nuju.

#### Cjuachacun tséhē xuta xi tsismi xicjin

**19** Hya xi cajnetaha cachja Jesús cjuá vi, sehe cavetju me distritu Galilea ne, cavisehen me distritu Judea ngajan tahndee ndajyē Jordán ladu vetjucaa tsuhi. <sup>2</sup>Hacuaha quiji tjengui rē me xutacjín hane casahmi me xi camandaja xuta hmu rē.

<sup>3</sup>Hya xi camá ne, ngajan cafehe cha tséhē partidu fariseo ne, quiji cha hiscan tacun Jesús hane tséhē xi meje cjuahachuva cha me cojo cjuá rē me ne, cachja cha cuitjin:

—¿Há tsingatihi ley xi ngu xihin ne, tsismi chjuun rē ngatsē rē tu mé ni xcusun xi chuyiin rē me tséhē?

<sup>4</sup>Ngajan xi cafayangui me cuitjin: —Ngayun ne, ¿há cachutayuun ta tséhē xi hisca ntsacu cavetsihin casahmi Nina ngasunhndē ne, casahmi me xi chjuun xi xihin xuta? <sup>5</sup>Cachja Nina ta ngatsē rē xi cuatjin casahmi me xuta ne: “Véhē xi ngu xihin ne, cuejña cha nahmi rē cha, hacuaha cuejña cha naa rē cha,

hane cumatangun cha cojo chjuun rē cha sacuaha ngu ni xahasen.”

<sup>6</sup>Ha quihndē hacuiin jo ta sacuaha xi ngu ni xahasen. Hane tséhē xi ha Nina cachja me xi cuatjin cuma ngu xahasen me ne, ndajintjin xi xuta ne, tsinguetsuntaha me tséhē xicjin me. —Cuatjin cachja Jesús.

<sup>7</sup>Ngajan cavinenguise cha cuitjin: —Sá xi cuatjin ne, ¿mé má casua Moisés cahndé xi ngu xihin cuma cuejña cha ngu xujun tsja chjuun rē cha xi ha quihndē mijí rē cha na? Hane xi cuatjin ne, cuma tsismi cha na.

<sup>8</sup>Sehe ngajan xi Jesús ne, cachja me cojo cha ta:

—Ngatsē rē cjuataja rē xahasen nuju ne, véhē xi Moisés ne casua me cahndé xi nismu chjuun nuju, peru hacuiin cuatjin cavitexa Nina ntsacu cavetsihin. <sup>9</sup>Cuichjá cojo nuju ta yo xi tsismi chjuun rē handasa ndastu mé cjuatsehen casahmi chjuun jan cojo ngu xihin hacjahi, hane cuixan cojo ngu nga chjuun ne, tjin jyé rē me ta tséhē xi ngatsē rē cjuá rē me sahmi chjuun jan cjuatsehen.

<sup>10</sup>Ngajan xi cachja xuta ladu rē Jesús cuitjin:

—Sá xi cuatjin sacuaha xi nújun, ndajintjin tsajan xi cuixan.

<sup>11</sup>Cachja nga Jesús cuitjin: —Hacuiin yějē ni xuta ma vijnercu me cjuá vi, suva xuta xi Nina casua cahndé xi vijnercu me ne, me véhē vihndē me. <sup>12</sup>Tjin xuta xi cumaji cuixan me, sacuaha xihin xi hisca chaja sa catsin me ne, maji matangun me cojo ngu chjuun. Hacuaha tjin yahnga me xi catsixindē xuta me, hacuaha tjin

yahnga me xi faain me ngu chjuun ngatsë rë xi sahmixa rë gobiernu xi sahmi Nina. Catjahatsja cjuá vi tu yo ni xi cuma cjuahatsja rë.

### Gatsinchacun Jesucristu nixti

<sup>13</sup>Hacuaha quijicojo xuta nixti rë me hiscan tacun Jesús xi cuisanetsja me nixti jan hacuaha cjuehya me cjuandaja rë Nina ngatsë rë me. Peru hya xi cavëë xuta ladu rë Jesús xi cuatjin tijima ne, cavatëcja me cjuatacun rë xuta jan.

<sup>14</sup>Peru Jesús ne, cachja me cojo xuta ladu rë me cuitjin:

—Tuhun rë nixti cahndé catinduva tjengui ná. Xicanichuun rë cahndé ta, tsëhé xi gobiernu xi sahmi Nina ne, má tsëhé nixti xi cuacun vë.

<sup>15</sup>Hane ngajan cavisanetsja me nixti jan sehe cavetju me tsëhé cahndé jan.

### Jemu chja cuisehen xuta nchina ladu rë Nina

<sup>16</sup>Hya xi camá ne, cafehe ngu cha nixti xi cavinenguise cha Jesús cuitjin:

—Ngayun Maestro, ¿mé cjuandaja meje rë xi sahme cojo sa xi sacú ná cjuahñu xatsë xcun Nina? —Cuatjin cachja cha.

Ngajan xi cachja Jesús cuitjin:

<sup>17</sup>—¿Mé má noje tsahan xi ndaja ngahan? Ngu ni Nina xi ndaja me. Peru sá xi meje sacú ri cjuahñu xatsë jan, nohye cjuá rë ley xi cavitexa Nina.

<sup>18</sup>Ngajan cafayangui cha cuitjin: —¿Jarë cjuá jan?

Hane cachja Jesús ta:

—Xicanicuun xuta, xicanihñuu cjuatsehen cojo rë ngu chjuun

o cojo rë ngu xihin xi hacuiin tsujun, xicanihñuu cjuachëjë, xicanujuun cjuandesu tsëhé xuta, <sup>19</sup>chjuhunrcun nahmi nuju hacuaha chjuhunrcun na nuju. Hacuaha nihñu hmutacun xingun sacuaha hmutacun suva yojo nuju.

<sup>20</sup>Ngajan cachja cha nixti jan ta: —Yëjë ni cjuá vëhé ne, ha cáhndë tsëhé hisca cjualihndi naha. ¿Mé sa meje rë xi sahme? —Cuatjin cachja cha.

<sup>21</sup>Ngajan cafayangui Jesús cuitjin:

—Tjin sa ngu cjuá sehe cuma chihin yëjë ni: yëjë ni xcusun xi tjin ri ne, titeñi, hane sehe tichecje tujún rë ngajñi rë xuta yuma. Hane xi cuatjin nihñi ne, jemu jyë cjuanchina sacú ri ngajan ngahnga. Hane xi cjuë cuichecje tujún vëhé ne, sehe ndove tisecue ná.

<sup>22</sup>Peru xi cahndë cha nixti cjuá xi cachja Jesús ne, jemu va camá cacun cha hane quiji cha, tsëhé xi jemu nchina camahani cha.

<sup>23</sup>Hya xi camá quiji cha ne, cachja Jesús cojo xuta ladu rë me cuitjin:

—Cuichjá quixë cojo nuju ta jemu chja xi ngu xuta xi tjin rë me cjuanchina cuisehen me hiscan sahmi Nina gobiernu. <sup>24</sup>Hisca cuichjá nga xi hitsë sa chjaain cuatju ngu chu camellu ngojo rë ngu níndu xi cuma rë xi cuisehen ngu xuta nchina hiscan sahmi Nina gobiernu.

<sup>25</sup>Ngajan xi xuta ladu rë me ne jemu quijircun rë me cjuá rë me tsëhé xi cachja me tsëhé xuta nchina hane cavinenguise me Jesús cuitjin:

—Sá cuatjin ne, ¿yo xi cuma cuetjutje ni?

<sup>26</sup>Ngajan xi Jesús ne, cavutsejen me hiscan siu xuta jan ne, cachja me cojo me cuitjin:

—Xuta ne, maji sahmi me; peru yějē ni xi maji sahmi xuta ne, Nina ne, hatuxa ma sahmi me.

<sup>27</sup>Sehe cachja Pedru cojo me cuitjin:

—Chutsujun ni. Ngayin ne, ha canismitacuín yějē ni xcusun xi tjin niji, hane tivisecuín nuju. Hindē ne, ¿mé sacú niji?

<sup>28</sup>Sehe cachja Jesús cuitjin:

—Cuichjá cojo nuju cjuaquixi ta hya xi cuechu nixtin xi cumá xatsē yějē ni ne, nixtin xi cuejña Quihndi rē Xuta Jain xcun silla xi sahmi me gobiernu ne, ngayun xi tejó ne, ngayun xi cavisuhun ladu naha hacuaha cuinechun xcun silla nichuvun cjuatacun rē yějē tejó tjē naja, ngayaan xi tjē rē xutachanga naja Israel ngayaan.

<sup>29</sup>Hacuaha yějē xuta xi tsismicacun me ndava me, tsismicacun me xicjin me, tsismicacun me xutacha rē me, tsismicacun me quihndi rē me, tsismicacun me nangui rē xitjē rē me, ngatsē naha; sacú rē me ngu cientu sa quisun tsēhē hane hacuaha sacú rē me cjuahñu xatsē.

<sup>30</sup>Peru xuta xi matitjun quihndē ne, jemu cjín me xi cumachjiriin me hya, hane xuta xi hacuicun matitjun quihndē ne, hya ne cumachji rēhē me xi cumatitjun me.

#### Ejemplu tsēhē chji rē mosu

**20** 'Sua Nina cahndē xi cuisehen xuta gobiernu xi sahmi me ne, sacuaha casahmi ngu me xi nai rē ngu ranchun. Xati nguitajñu quiji me cavanguise me

mosu xi sahmi xá hiscan catsitjē me uva. <sup>2</sup>Hya xi casacu rē me ngujo cha, casahmi me compromisu hane cavejña chji rē cha xi ngu tujún xi hmí rē denario xi ngu nixtin. Hane hora hya casua me cha xá quiji cha nguñña xitjē. <sup>3</sup>Hya xi camá ne, sacuaha fane ñaja ne, cavuya nai jan ndetsin hane ngajan cavēē me cha xi hacjahi hane mahya rē cha. <sup>4</sup>Sehe cachja me cojo cha cuitjin: “Hacuaha tangun xitjē naha, sehe sua nuju hacutjin satē nuju.” Hane quiji cha jan. <sup>5</sup>Hane jo ndiya nga ne, sacuaha nchisen hane sacuaha fane jyan ne, quiji nai jan ndetsin, tangun casahmi me tangun cachja me. <sup>6</sup>Hane xi cavechu sacuaha fane hñu nguixun ne, quiji nga me ndetsin, ngajan casacu rē me yahnga cha xi mahya rē, sehe cachja me cojo cha cuitjin: “¿Mé má tu nechun ni nguehe cuahanixtin?” <sup>7</sup>Hane cafayangui cha cuitjin: “Tsēhē xi tsajin yo xi casua niji xa.” Sehe cachja me cuitjin: “Hacuaha tangun nihñu xa xitjē naha.” <sup>8</sup>Hane hya xi ha camá nguixun, nai rē xitjē ne, cachja me cojo cha xi fahacuenda rē xitjē jan cuitjin: “Chjindayun rē mosu ne, tuhun rē me chji rē yějē ni me, titjun ne tuhun chji rē cha xi cafehe ngascan hane cuatjin ne hisca xi cuijnetaha ne, sehe tuhun rē cha xi tjun cafehe.” <sup>9</sup>Hane xi cafehe cha xi casacu rē xa sacuaha fane hñu nguixun ne, cafahatsja cha chji ra xi ngu denario. <sup>10</sup>Hane xi camachaya rē cha xi tjun casacu rē xá ne, xi má rē cha ne, hitsē sa hnga cumá chji rē cha, peru hacuaha cafahatsja cha ngu denario

ni. <sup>11</sup>Hane xi cafahatsja cha chji rë cha ne, cachjataha cha nai jan cuitjin: <sup>12</sup>“Cha vë ne, ngascan cafehe cha, ngu ni hora casahmi cha xa, hane tangun catuhun chji rë cha cojo niji. Ngayin ne, canihñi xa cuaha nixtin hacuaha cacaa niji ndavá.” <sup>13</sup>Peru nai rë xitjë jan ne, cafayangui me tsëhë cha jan cuitjin: “Tai, tsajin me cjuachan, ¿há quixi, há quixiin xi cavisiajme xi chji nuju ne, ngu denario? <sup>14</sup>Chjuhun tujún xi satë nuju hane cuangun; ta ngahan ne, cachuya ná ngahan xi ngu chichihin suá rë cha hacuaha suá nuju. <sup>15</sup>Ngahan xi tsahan ne, ngahan cuitexa. ¿O há tsajin ne, há machinitacun tsëhë xi casahme cuatjin?” <sup>16</sup>Hacuaha chuva vëhë ni, xuta xi matitjun quihndë ne, cumachjiriin hya, hane xuta xi hacuiin matitjun me quihndë ne, cumachji rëhë me xi cumatitjun me. Jemu cjin má me xi cachjindaya rë xi canduva me, peru tsëhë yëjë me jan ne, chuva má me xi catuxijin rë.

**Camá jyan ndiya cachja  
Jesucristu xi cueya me**

<sup>17</sup>Hya xi camá ne, hora xi jiya ndiya Jesús xi cjui me nandya Jerusalén, quijixin me cojo xuta ladu rë me xi tejó ni cachja me cojo me cuitjin:

<sup>18</sup>—Chutsujun ni, tivanguen Jerusalén, hane ngajan ne, ngahan xi Quihndi rë Xuta jain ne, cuma ngahan entregadu tsja nahmi xi matitjun cojo maestro tsëhë ley; hane cuichja me jyé naha ne, vechu chuva rë xi cueya ngahan. <sup>19</sup>Sehe sahmi entregar me ngahan xutaxín, cuejnucëë ná xuta, cuëhënatya ná

me, cuaja ná me ne, sehe cuetaha ná me xcun cru. Peru xi má jyan nixtin ne, cúa nga cjuahñu.

**Meje scaaya xuta ladu rë Jesús  
tsëhë yo me xi cumatitjun**

<sup>20</sup>Hya xi camá ne, naa rë quihndi rë Zebedeo quijitjengui na Jesús cojo cha quihndi rë na. Cavixcuhnchi na xcun Jesús tsëhë xi fehya na ngu favor. <sup>21</sup>Sehe cavinenguise Jesús na cuitjin: —¿Mé xi meje rë xahasen nuju? Hane cuitjin cafayangui na: —Tuhun cahndé xi cuiyujutaha cha quihndi naha ngu ngu ladu tjehen nuju, hya xi nihñu gobiernu nuju.

<sup>22</sup>Ngajan cachja Jesús cojo cha cuitjin:

—Ngayun ne, hyuun mé xi chjayun. ¿Há scaa nuju cuatjun cjuañihi xi cuátju ngahan ni?

Sehe cafayangui catsijo cha:

—Juun, scaa niji.

<sup>23</sup>Ngajan xi cachja nga Jesús cojo cha cuitjin:

—Cjuañihi xi cuátju ngahan cuma ne, hatuxa hacuaha cojo ngayun cuatjun cuma. Peru xi cuinechuntuhun ngu ngu ladu tjehen naha ne, hacuiin ngahan cuichjá ta Nina cuichja me yo xuta xi sua rë me cahndé xi cuiyujutaha me.

<sup>24</sup>Xi cahndé yahnga xuta xi të jan cjua xi cachja Jesús ne, cavetsihin camacjan rë me cojo jo me xicjin me jan. <sup>25</sup>Ngajan xi cajindaya Jesús yëjë ni me, cachja cojo me cuitjin:

—Ngayun ne ha hyun ta yëjë ni xuta xi matitjun nguehe ngasunhdë ne, jemu sahmi yehe



me yojo rë me sacuaha xi me vëhë xi nai rë xuta, hacuaha jercu meje cuitexa me. <sup>26</sup>Peru hacuiin cojo ngayun cuatjin nihñu ta xi meje rë ne, ngu ngayun xi meje nihñi yehe yojo nuju ne; ninguijnu yojo nuju tisecon xingun. <sup>27</sup>Hane ngu ngayun xi meje cumatitjun ngayun, nihñu xi cuma yun sacuaha ngu mosu rë xingun. <sup>28</sup>Ta cuanitjin ne, casahme ngahan Quihndi rë Xuta Jain, ta canduvá ne, peru hacuiin canduvá xi xuta cuisecoo ná me ta ngahan cuisecoo rë xuta, hacuaha tsingatehen xi tsiquehen ná xuta, cojo sa xi ngatsë rë vëhë cjín xuta cuaxëtje Nina me. —Cuatjin cachja Jesús.

**Casahmi Jesucristu xi camatsejen nga rë jo cha rcá ngajan Jericó**

<sup>29</sup>Hya xi cavetju me nandya Jericó ne, jemu xutacjín quijitjengui rë me. <sup>30</sup>Hane ngajan hiscan cavatju me siu jo cha rcá xi viyuju cha tjeheh ndiya, hane xi canuhya rë xi Jesús tivatju me, cajindaya cha cachja cha cuitjin:

—iNai, ngayun tjë rë David!

Catamayuma nuju ngayin.

—Cuatjin cachja cha.

<sup>31</sup>Hane xuta xi siu ne, cavisiajmicjan me cojo cha xi sejyu cha, peru cha vëhë ne, hitsë sa jercu cajindaya cha chja cha ta:

—iNai, ngayun tjë rë David!

Catamayuma nuju ngayin.

<sup>32</sup>Hya xi camá ne, ngajan casecunhñu Jesús, cajindaya me cha xi nduva cha. Sehe cavinenguise me cha cuitjin:

—¿Mé xi meje nuju xi sahme cojo nuju ni?

<sup>33</sup>Ngajan xi cachja cha rcá jan ta: —Tatá, xi meje niji ne, xi cuma tsejen niji.

<sup>34</sup>Hane Jesús ne, camayuma rë me cha; cavisanetsja me tuxcun cha. Hane ngutjen ni, camatsejen nga rë cha, sehe quiji cha cojo Jesús.

**Cafehe Jesús nandya Jerusalén**

**21** Hane hya xi ha jima tiña Jesús xi cjuehe me Jerusalén, cavechu me nandya Betfajé, ngajan ndetjún xi hmí rë Ndetjún Olivu ne, sehe catsingatju me jo xuta ladu rë me xi cjue tixa rë me, <sup>2</sup>hane cuitjin cachja me cojo me:

—Tángun nandya xi tsejen tacun vë. Hane ngutjen xi cjuhun tjeheh rë ne, sacú nuju ngu burru xi tjihñu chu cojo quihndi rë chu. Hane chundecjun chu, nduvuncujun chu. <sup>3</sup>Hane sá xi tjín yo xi cuichja cojo nuju tsëhë chu, sehe tinújun ta: “Maestru niji ne, meje rë me chu.” Hane sehe sua me cahndé.

<sup>4</sup>Cuatjin camá cojo sa xi cuetjucaa jain cjua xi cachja profeta cuitjin:

<sup>5</sup>Tinújun cojo xuta nangui Sion:

“Chutsujun ne, nduva me xi matitjun tsujun hiscan nechun. Hacuiin xta me ne, nduva me quisun me chu burru,

quisun me quihndi rë chu xi vaniji chaha.”

<sup>6</sup>Sehe xuta ladu rë me jan, cavetju quiji me hane casahmi me hacutjin cachja Jesús, <sup>7</sup>canduvacojo me chu burru cojo quihndi rë chu hiscan tacun Jesús. Hane caviyujusun me tsjian rë me ngaxtun chu, sehe camiji Jesús burru jan. <sup>8</sup>Hane xi

quiji Jesús ne, quisun me burru jan, hane xutacjín ne, táha cacandi me tsjian rë me ndiya hiscan cjui Jesús. Hane yahnga me ne, quiji cavotohosun me xca xcuen hane hacuaha cacandi me ndiya hacutjin cjui Jesús. <sup>9</sup>Hane yëjë ni me xi cjui tjun cojo yëjë me xi tjengui jan ne, cavetsihin jercu cajindaya me cachja me:

—iHosana! iNacuechji rë Nina xi cafehe me xi cuitexa naja sacuaha cavitexa David hatsëe! iJemu catsinchacun Nina me xi nduva vi tsëhë xi Nina catsingatju rë me! iHisca ngahnga ne, cuechu cjua rë cjuandaja rë Nina!

<sup>10</sup>Hya xi camá ne, xi cavisehen me nandya Jerusalén jercu jyë cjuandya camá hane cavinenguise xuta nandya cuitjin:

—¿Yo me vihi?

<sup>11</sup>Ngajan cafayangui xutacjín jan cuitjin:

—Me vihi, hacui profeta Jesús, xuta Nasaret tsëhë distritu Galilea.

#### **Cavaxë Jesucristu xuta xi sahmi ndetsin ndatsen yungun**

<sup>12</sup>Hya xi camá ne, quiji me yungun xi matitjun. Hane hya xi cavisehen me ndatsen yungun jan; cavaxë me xuta xi sahmi me ndetsin. Hacuaha catsindefa me maxë xi xinchasun tujún xi tsindeya cha cojo tujún rë xuta ngu nangui cojo puestu rë cha xi viteña nisëtyava. <sup>13</sup>Sehe cachja me cojo cha jan cuitjin:

—Chja cjua rë Nina ta: “Ndya naha ne, tacunxa xi cjue xuta sahmi me oración rë me. Peru ngayun ne, tiniñuxun cojo sacuaha ngu

cahndé xi matangun xuta xi sahmi cjuamaña.”

<sup>14</sup>Hya xi ha cavatju vëhë ne, ngajan yungun xi matitjun ne, cavechutaha me xuta rcá cojo xuta rengun; hane casahmi me xi camandaja me. <sup>15</sup>Ngajan xi cavëë nahmi xi matitjun cojo cha xi vicuya cjuachacun ne cjuarcun xi casahmi Jesús, hacuaha cahndë me xi jindaya nixti ta: “iHosana! iNacuechji rë Nina xi cafehe me xi cuitexa naja sacuaha cavitexa David hatsëe!”; hane jemu cama xti rë me.

<sup>16</sup>Cachja me cojo Jesús cuitjin:

—¿Há nuhyun cjua xi tichja me?

Ngajan xi cafayangui Jesús cuitjin: —Juun, vihndë. Hane ngayun ne, ¿há cjëë chutahanyun cjua rë Nina xi chja tsëhë? Chja cjua ta:

Hisca cjua rë nixti hisca cjua rë quihndinda ne canihñu xi cuetju xi sahmi hnga nuju.

<sup>17</sup>Hya xi camá cachja me ne, cavetju Jesús tsëhë Jerusalén quiji me nandya Betania cavejña me nguixun.

#### **Jesús ne, cachja xi quihndë cuaquiin tu rë ngu yaxujun xi cavangui me tú rë hya xi vojo rë me**

<sup>18</sup>Xi camanchujun jan ne, xi cavuya nga Jesús Jerusalén ne, cama vojo rë me. <sup>19</sup>Hya xi camá ne, tjehen ndiya ne, cavëë me ngu yaxujun xi chine tú rë, peru xi cavechu me ngajan ne, ndastu me tú yaja rë, ta suva xca ni yaja rë. Ngajan xi cachja Jesús tsëhë:

—Quihndë tsajin nixtin xi cuaquí tú riji.

Hane ngutjen ne, caxintsen ya jan. <sup>20</sup>Hya xi cavëë xuta ladu rë me

xi cuatjin camá ne, cafarharcun me Jesús cachja me cuitjin:

—¿Hacutjin cumá xi jemu xati caxintsen yaxujun jan?

<sup>21</sup>Ngajan cafayangui Jesús tsèhë me cuitjin:

—Cuichjá quixë jain cojo nuju ta sá xi macjain nuju Nina hane hacuain jo cjuatacun nuju ne, cumá nihñu sacuha casahme cojo yaxujun vi. Hacuaha hisca sá xi cuinújun cojo ndetjún vihi ta: “Tihinxin tsèhë nguehe. Tihin tishin ngajñi ndachacun.” Hane cuatjin cumá. <sup>22</sup>Yëjë ni xcusun ne, tu mé ni xi chjahyun cojo Nina hane sá xi macjain nuju xi sacú nuju ne, cuetjuca quixi.

#### **Cavinenguisse xuta cojo Jesús yo cavitexa rë me**

<sup>23</sup>Hane xi vicuya Jesús ngajan ndatsen yungun xi matitjun ne, camatangun nahmi xi matitjun cojo xuta changá, hane cuitjin cavinenguisse me Jesús:

—¿Yo cavitexa nuju xi nihñu xa vi? ¿Yo casuaxa nuju?

<sup>24</sup>Hane xi cafayangui Jesús ne, cuitjin cachja me:

—Hacuaha cuinenguësë nuju ngu cjua, hane sá xi chjayunngun tsahan ne, sehe cuichjá cojo nuju yo cavitexa ná xi sahme xcusun vihi.

<sup>25</sup>¿Yo cavitexa rë Juan xi cuitenda me xuta? ¿Há Nina ne, o há tsajin ne, há xuta? —Cuatjin cachja me.

Sehe ngajan xi xuta xi cuacun jan ne, cavisiajmícn me ngajñi rë me, cachja me cuitjin:

—Sá xi cuinújan xi Nina cavitexa me cha Juan vë ne, cjuinenguisse naja me: “Sá cuatjin ne, ¿mé má

camacjaain nuju cha?” <sup>26</sup>Hane sá xi cuinújan xi xuta cavitexa rë cha ne, tsajin yo hvë mé sahmi xuta cojo naja ta, tsèhë xi yëjë ni xuta ne, ha macjain rë me xi cha vëhë ne, profeta cha.

<sup>27</sup>Hane xi cafayangui xuta jan tsèhë Jesús ne chja me ta:

—Hyiin.

Ngajan xi hacuaha Jesús ne, cachja me ta:

—Hacuaha cuichjaan cojo nuju yo cavitexa ná xi sahme xá vihi.

#### **Ejemplu tsèhë jo cha quihndi**

<sup>28</sup>Peru ¿mé nújun tsèhë cuentu vi? Ngu xihin ne, jo má cha quihndi rë me. Hya xi camá ne, cafehe cachja me cojo ngu cha cuitjin: “Tsan, tihin nihñi xá ngajan hiscan camatjë xca rë uva.” <sup>29</sup>Peru cha quihndi jan ne, cafayangui cha cuitjin: “¡Jéya! ¡Mijí cjué!” Peru hya xi camá ne, cavindeya cjuatacun rë cha hane quiji cha xcun xá jan. <sup>30</sup>Sehe hacuanitjin cachja nahmi jan cojo quihndi xi má jo, hane cuitjin cafayangui cha jan cachja cha: “Tatá, ngahan ne, cjué.” Peru quijiin cha. <sup>31</sup>Hindë ne, ¿jarë cha xi casahmi chihin cha xcusun xi meje rë nahmi rë cha?

Ngajan cafayangui me ta:

—Cha xi tjun cachja.

Sehe cachja Jesús cojo me cuitjin:

—Cuichjá quixë cojo nuju ta xuta xi cojo cjuamaña faha tujúnsa cojo chjuun xi viteña na yojo ran hitsë sa tjun cuisehen me gobiernu xi sahmi Nina xi cuma nuju ngayun, <sup>32</sup>ta cafehe Juan cavicuya me ngayun hacutjin nihñu xcun Nina hane camacjaain nuju cjua rë me.

Peru xuta xi faha tujúnsa cojo chjuun xi viteña yojo rë na, me vëhë camacjain rë me. Ngayun ne, handasa cahyun yëjë xcusun vëhë ne, canindeyuun cjuatacun nuju; camacjaain nuju.

**Ejemplu tsëhë cha xi sahmixa  
xi jemu tsehen cha**

<sup>33</sup> Nuhyun sa ngu ejemplu xi cuitjin fi: Ngu nai rë ngu ranchun matsejen ne, catsitjë me xcun nangui rë me xca rë uva. Hacuaha casahmi me hnchua xondyojo tahndee rë xitjë jan, hane ngajan ni ne, cafahnguiya me ngu ndyojotë hiscan cuaxë nandá rë uva jan. Hacuaha casahmi me ngu cahndé hiscan xi cavesun me ngu nachan ngahnga xi sesun xuta xi sahmi cuidadu xitjë rë me. Sehe casua me ngujo cha sahmixa xi cjuahacuenda cha. Sehe cjuaha tsë tsë me cojo cha. Hane hya xi camá ne, cavetju me quiji me ngu nangui xin. <sup>34</sup> Xi cavechú nixtin rë tütjë jan matsejen ne, sehe catsingatju me mosu rë me xi quiji cachja cha cojo cha xi fahacuenda xitjë jan xi sua cha hitsë tutjë xi satë rë me. <sup>35</sup> Peru cha xi sahmixa jan ne, cafaha cha mosu jan tu cavaja cha ngu mosu, catsiquehen cha ngu nga, hane cavetaha cha ndyojo xcun ngu nga. <sup>36</sup> Sehe catsingatju nga me mosu hacjahi xi hitsë sa cjín má cha tsëhë mosu xi tjun catsingatju me, peru cha xi sahmixa jan ne, ha chuva vëhë ni casahmi cha cojo yëjë ni.

<sup>37</sup> Hya xi camá ne, hisca catsingatju me suva quihndi rë me ta catsingatahacacun me cuitjin: “Tuxa cjuaharcun rë cha, xi quihndi

naha.” <sup>38</sup> Peru xi cavëë cha xi hatuxa quihndi rë me xi nduva ne, cavisiajmicjín cha cojo xicjin cha cuitjin: “Cha vihi ne, quihndi xi cjuahatsja xitjë vi cha. Niquen cha, cojo sa xi tsajan cuma nangui vi.” Cuatjin cavisiajmicjín cha. <sup>39</sup> Hya xi camá ne, cafaha cha cha quihndi jan quijicojo cha ndatsen cahndé jan, sehe catsiquehen cha cha.

<sup>40</sup> Hindë ne, xi má nuju ne, ¿mé sahmi nai rë xitjë jan cojo cha xi cuacun fahacuenda jan?

<sup>41</sup> Ngajan cafayangui me tsëhë Jesús cuitjin:

—Cjue tsiquehen me cha xi tsehen cjuatacun rë jan, sehe sua me xitjë jan cjuahacuenda jingu sa cha sahmixa, cha xi sua cha xitjë xi satë rë me hya xi cuechú nixtin rë. —Cuatjin cafayangui me.

<sup>42</sup> Sehe cachja Jesús cojo me cuitjin:

—¿Há cachutayuun xujun rë Nina xi chja cuitjin?:

Ndyojo xi catsitjungui chjinevexo ne, vëhë ndyojo xi cavëjña tjun tjun yuju rë xihndënaña.

Cuatjin casahmi Nina xi cuma.

Hane xi chutsejen ngayaan ne, jemu chjahanrcun xahasen naja.

<sup>43</sup> Vëhë xi cuichjá cojo nuju ta, chjahataha nuju cahndé xi cuisuhun gobiernu xi sahmi Nina, hane sua Nina xuta nanguixin cahndé jan, xuta xi sua me xi satë rë me.

<sup>44</sup> Hane ndyojo jan ne, hya xi ngu xuta cjuinenguisun me xcun ndyojo vëhë matsejen ne, cuatëlanga rë me. Hane hya xi ndyojo vëhë cuinenguisun rë ngu xuta matsejen ne, ña cumá të me.

<sup>45</sup>Hane xi cahndë nahmi xi matitjun cojo cha partidu fariseo ejemplu xi cachja Jesús tsëhë xuta vë ne, camachaya rë me xi condra rë me tichja Jesús. <sup>46</sup>Vëhë xi cavangui me chuva rë hacutjin cuma xi cjuaha me Jesús peru camaji ta tsacjun me xuta, ta xi má rë xuta ne, ngu profeta má Jesús.

Ejemplu tsëhë ngu suhi cjuavixan

**22** Sehe quijinduju sa cachja Jesús ejemplu cojo rë me cuitjin:

<sup>2</sup>—Nina ne sahmi me cojo xuta xi cuisehen me gobiernu xi sahmi me sacuaha casahmi ngu xihin xi matitjun tsëhë ngu nangui hya xi casahmi me suhi xi cuixan quihndi rë me. <sup>3</sup>Hya xi casune hora rë, catsingatju me mosu hndixahan rë me quiji cha ndava xuta xi ha casua me camachaya rë xi nduva me cjuavixan, peru canduvaain me suhi. <sup>4</sup>Sehe catsingatju me hndixahan xi hacjahi ne, cuitjin cavitexa me: “Tinoje cojo xuta xi nduva cuitjin: Chutsujun ni tai, ha tjin chihin comida, ha cahme chu xi tetjo ná tsëhë suhi vi, hane cachjan yojo. Tjin chihin yëjë ni: nduvun ne, xinëesuhi.” <sup>5</sup>Peru casahmi cuendaain me cjuajan, hane quijixin me cafacuenda me cjuacjintacun rë me. Ngu me quiji me xcun xitjë rë me, ngu nga me hiscan sahmi me negocio. <sup>6</sup>Hane yahnga nga me ne, cafahe me mosu hndixahan jan, choho casahmi me cojo cha hisca catsiquehen me cha. <sup>7</sup>Hya xi camá ne, me xi matitjun jan ne, cama cjan rë me. Catsingatju me sindadu rë me.

Catsiquehen sindadu cha tsiquehen jan hane cavaca me nandya rë cha. <sup>8</sup>Hya xi camá ne, cachja nga me cojo hndixahan rë me cuitjin: “Ha tjin ndaja xcusun rë cjuavixan. Peru xuta xi cuinduva ne, hacuiin ndaja cjuatacun rë me ndajintjin xi nduva me. <sup>9</sup>Vëhë xi tihin hisca cruci ndiyatë ne, hane tu hacutjin cjín má xuta xi sacu ri, noje cojo yëjë ni me xi catinduva me catjinesuhi me.” <sup>10</sup>Ngajan xi quiji hndixahan jan hiscan ndiyatë rë nandya ne, hane yëjë ni xuta xi cavechutaha cha, sá xuta tsehen, o sá xuta ndaja ne, casahmi cha xi camatangun me quiji me suhi. Hane ña catsëxtin xuta ndava suhi.

<sup>11</sup>Hya xi tijima suhi ne, xi cavisehen me xi matitjun jan xi scutsejen me xuta xi cafehe me, cavutsejen me ngu cha xi yuma jyih cojo tsjian rë. <sup>12</sup>Ngajan xi cachja me cojo cha cuitjin: “Tai, ¿hacutjin cama xi cavisuhun nguehe handasa jemu yuma jyih tsjian nuju?” Peru cavejñajyuu cha vë cachjaain cha. <sup>13</sup>Sehe cachja me xi matitjun jan cojo hndixahan rë me cuitjin: “Tetuhunhñu tsja cha cojo ntsacu cha sehe naxun cha ndatsen hiscan jñu. Ngajan hiscan hincha xuta xi tijihnda me, hacuaha titsijanerii me nehñu me.” <sup>14</sup>Cjín má me xi cachjinda rë xi nduva me, peru chuva má me xi tuxijijñi rë.

Cjuacjintacun tsëhë tujúnsa

<sup>15</sup>Hya xi camá ne, cha partidu fariseo ne, cavisajmichihin cha casacuse rë cha ngu cjuacjintacun xi tsavi fi xi cjuayangui Jesús tsëhë. <sup>16</sup>Hya xi camá ne, catsingatju cha

ngujo cha ladu jan, cojo cha ladu rë Herodes ne, cachja cha cojo Jesús cuitjin:

—Maestro, ngayin ne, hyin ta ngayun ne xuta ndaja ngayun. Vicuyun ndiya rë Nina cojo cjuaquixi. Ha tuxa cjuaquixindaja xi nújun, ha ndasa cojo xuta nchina visiajmu o sá cojo xuta yuma. <sup>17</sup>Xi má nuju ne, mé xi ndaja cuinújan. Sacuaha ley rë Moisés ne, ¿há tsingatihi xi cuechjen tujúnsa naja cojo César, me xi matitjun, o há tsingatiin?

<sup>18</sup>Peru Jesús ne, tsëhë xi ha vacun rë me xi jemu choho xcusun rë cha ne, cachja me cojo cha cuitjin:

—¿Mé má cuatjin meje chjuhunchuvun ná? Xuta ndacha ngayun. <sup>19</sup>Ningacun ná ngu tujún jan scutsejen.

Hane canduvacojo cha ngu tujún tyava.

<sup>20</sup>Sehe cavinenguise me cha cuitjin:

—¿Yo xcusun rë hacuaha yo ñihi rë xi quitaha xcun tujún vë? —Cuatjin cavinenguise Jesús.

<sup>21</sup>Hane cha xi cuacun vë ne, cuitjin cafayangui cha:

—Tsëhë César.

Sehen ngajan xi Jesús ne, cuitjin cachja me cojo cha:

—Cuatjin ne, tuhun rë César xi tsëhë me, hane tuhun rë Nina xi tsëhë me.

<sup>22</sup>Hya xi cahndë cha cjua xi cachja Jesús ne, quijircun rë cha, sehe cavetju cha quiji cha tsëhë cahndé xi tacun me.

### **Cjuachjinenguise tsëhë xi cuya nima cjuahñu**

<sup>23</sup>Sehe nixtin hya ne, cafehe tjengui Jesús cha partidu saduceo,

cha xi vicuya cjuachacun xi chja xi xuta xi cahme ne, cuyaainga me cjuahñu. Sehe cavinenguise cha Jesús cuitjin:

<sup>24</sup>—Maestro, Moisés ne cachja me ta: “Sá xi ngu xihin cueya, hane tsajin rë chjuun rë hisca ngu quihndi ne, hntsë nima vëhë ne, meje rë xi cjuaha rë chjuun cahan vëhë, cojo sa xi sacú rë na quihndi xi cuma sacuaha quihndi rë nima vëhë.” <sup>25</sup>Quihndë ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane tsëhë xi tsajin quihndi rë cha, hntsë nima vë ne, cafaha cha chjuun jan. <sup>26</sup>Hane cuanitjin cavatju cha xi majo cojo cha xi majyan hisca chuva ngu chuva ngu cha hisca cojo cha xi má yatu. <sup>27</sup>Hane xi cajnetaha ne, sehe cahme chjuun jan. <sup>28</sup>Quihndë ne, hya xi cuya yëjë nima cjuahñu ne, ¿jarë cha xi cuacún vë xi chjuun rë cha na xi cjuaquixi ta, tsëhë xi yëjë ni xi yatu cha ne, camá chjuun rë cha na? —Cuatjin cachja cha.

<sup>29</sup>Ngajan xi cachja Jesús cojo cha ta:

—Ngayun ne, cuaintjin xi nújun, tsëhë xi vijni rcun cjua xi chja xujun tsëhë Nina, hacuaha hyuun xi Nina ne, jemu hñu cjuatacun rë me. <sup>30</sup>Ta hya ne, cumaji cjuavixan hacuaha tsinguixainga xicjin me hya ta, sacuaha ángel xi siu ngahnga ne, cuatjin cuiyuju me. <sup>31</sup>Quihndë xi tinújun tsëhë nima xi cuya cjuahñu ne, cuinenguësë nuju ne, ¿há cjë chutayun cjua xi cachja Nina cojo nuju xcun xujun rë me tsëhë nima xutachanga nuju xi cuicun vi?

<sup>32</sup>“Ngahan xi Nina rë Abraham

ngahan, Nina rē Isaac hacuaha cojo Nina rē Jacob.” Cuatjin cachja Nina. Peru ndaja hyun ta Nina ne, hacuain Nina rē nima ta Nina rē xuta xi quicun me.

<sup>33</sup>Hya xi cahndē xutacjín cjua jan, jercu tu quijircun rē me cjua xi catsicuya Jesús.

**Cjuachjinenguise tsēhē jarē artículo tsēhē ley xi hitsē sa matitjun**

<sup>34</sup>Peru cha partidu fariseo xi camachaya rē cha xi catsinguejyu Jesús cjua rē cha partidu saduceo ne, camatangun cha cojo xicjin cha, <sup>35</sup>hane sehe cavitexa cha ngu maestru rē ley xi cavinenguise cha me cjua vi cojo sa xi cuma cjuahachuva cha me. Cuitjin cachja maestru jan:

<sup>36</sup>—Maestro, tsēhē yējē ni cjua xi cavitexa Nina naja xcun xujun ley ne, ¿jarē artículo xi hitsē sa matitjun?

<sup>37</sup>Ngajan xi cafayangui Jesús cuitjin:

—“Meje rē xi nihmutacún Nina naja cojo nguñajatacún, cojo yējē ni xahasen nuju, cojo yējē ni ngahñu nuju, cojo yējē ni cjuatacun nuju.”

<sup>38</sup>Cjua vē xi hitsē sa venguichji rē ne, hitsē sa matitjun xi cumá rē yējē ni cjua rē ley. <sup>39</sup>Hane xi má jo ni: “Meje rē xi nihmutacún xingun sacuatjin hmutacún suvun vojo nuju.” <sup>40</sup>Tsēhē jo artículo vi ne vetjun sa yējē cjua rē ley xi catsihindu Moisés cojo yējē cjua xi catsihindu profeta. —Cuatjin cachja Jesús cojo cha.

**¿Yo tjē rē má me xi catsingatju Nina?**

<sup>41</sup>Hya xi ha camá tangun cha partidu fariseo ne, sehe cavinenguise Jesús cha cuitjin:

<sup>42</sup>—¿Mé nújun? Mesías o sa Cristu ne, ¿yo tjē rē má me?

Cafayangui me ta:

—Tjē rē David má me.

<sup>43</sup>Sehe cachja Jesús cuitjin:

—Sá xi quixi xi cuatjin ne, ¿hacutjin cavátju xi suva David ne, hya xi catsihindu me cjua xi cachja Hasen tsēhē Nina cojo rē me, “Nai” cachja me tsēhē Mesias? ta cuitjin catsihindu me:

<sup>44</sup>Nina ne, cachja me cojo Nai naha cuitjin:

“Tinechin nguehe ladu quixi naha,

hisca hya xi yējē ni xi sahmi ri condra ne, cuiyúju ngahan ngahma gobiernu riji.”

<sup>45</sup>Quihndē ne, sá xi suvá David chja me xi Nai rē me má me xi tsingatju Nina ne, ¿hacutjin má ne xi hacuaha tjē rē me má me vēhē?

<sup>46</sup>Ngajan camá xi ndastu mé cafayangui cha, hacuaha hisca hya ne, tsacjun cha cjuinenguise sa cha me.

**Cachjajyē Jesucristu cojo xutacjín tsēhē cha xi vicuya cjuachacun**

**23** Hya xi camá ne, cachja Jesús cojo xutacjín hacuaha cojo xuta ladu rē me cuitjin:

<sup>2</sup>—Cha xi vicuya cjuachacun cojo cha partidu fariseo ne, casatē rē cha xá rē ley xi casatē rē Moisés hatsēē. <sup>3</sup>Vēhē xi meje rē xi nuhyun cjua rē cha hacuaha nihñuchuhun yējē ni xi vicuya cha; peru nihñuu sacuaha sahmi cha ta, ndaja chja cha jan peru hacjahi sahmi cha. <sup>4</sup>Cjua xi vicuya cha jemu chja sahmi chihin xuta ta

tangun sacuaha ngu chaha xi hai vaniji tyja rë me, peru suva ni cha ne, visecuaain cha me hisca hitsë.

<sup>5</sup>Yëjë ni xi sahmi cha ne, sahmi cha ngatsë rë xi scuëë xuta cha, sahmi hnga xuta cha. Vatjutaha cha chuva rë xujun xi chja ley xi setaha xten xuta, cojo tsjahya xi tsingaqui cha ntsacu tsjian rë cha. <sup>6</sup>Hacuaha jemu chuya rë cha hya xi satë rë cha cahndé xi matitjun tsëhë ngu ndava suhi o tsëhë yungun.

<sup>7</sup>Hacuaha hora xi fi tsujyihya cha, jemu chuya rë cha xi cuatjin fi xuta chja me nina cojo cha ngajan ngajñi ndetsin, maestro chja xuta tsëhë cha.

<sup>8</sup>Peru ngayun ne, xi cuichjaain xuta tsujun Maestro ta ngu ni me xi Maestru nuju, hane ngajñi nuju ngayun ne, xingun má yun.

<sup>9</sup>Hacuaha xuta ngasunhndë ne, canujuun tsëhë me xi Nahmi ta ngu ni me xi tacun me ngahnga ne, hacui Nahmi nuju. <sup>10</sup>Cuanitjin ne, xi cuichjaain xuta tsujun Nai ta ngu ni me xi Nai nuju, me vëhë ne, Cristu. <sup>11</sup>Hane ngu ngayun xi meje cumatitjun ngayun ne, sahmi me sacuaha ngu mosu rë xicjin. <sup>12</sup>Tsëhë xi yëjë xuta xi sahmi yehe suvá me yojo rë me ne, cuechu nixtin xi Nina ne, tsinguijne me cjuatacun rë. Hane xuta xi tsinguijne suvá me cjuatacun rë me, hya ne, Nina ne, sahmi yehe rë me.

<sup>13</sup>Jemu chojyihya tsujun, ngayun cha xi vicuya cjuachacun cojo ngayun cha partido fariseo. iXuta ndacha yun!, ta vechjun tingotjo hisca visehen gobiernu xi sahmi Nina cojo sa xi cumaji cuisehen xuta. Tivisuun suvun, hacuaha

tituun cahndé xi cuisehen xuta xi meje cuisehen me.

<sup>14</sup>Jemu chojyihya tsujun, ngayun cha xi vicuya cjuachacun cojo ngayun cha partido fariseo. Jemu cjin tujun naxun yachjin cahan xi hisca ndava na tsajin. Hane hya xi nújunyumun ne jemu nduju hora nihñu, peru hacuiin nguñaja tacun nújun ta, vindachun ni. Vëhë xi hitsë sa jyë cuma castigu xi cumá nuju.

<sup>15</sup>Jemu chojyihya tsujun, ngayun cha xi vicuya cjuachacun cojo ngayun cha partido fariseo. iXuta ndacha yun! ta cuangun jingujyë ni ngasunhndë xi sacu ngu ni me xi cuisehen ladu nuju. Peru hya xi cavicuyun rë me, hitsë sa jyë castigu satë rë me xi cuma nuju.

<sup>16</sup>Jemu chojyihya tsujun, ixuta rcá yun xi meje ningacun ndiya! Nújun ta: “Sá xi tuhun cjua nuju hane cuinújun ta: Quixi, vëë yungun xi matitjun ne, sahmi ngu jyë xi nihñu chihin cjua nuju, peru sá xi tuhun cjua nuju cojo oro xi jiya yungun xi matitjun ne, vëhë sahmi ngu jyë xi tuhun xi canújun.”

<sup>17</sup>iNgarca ni ngayun! iRcá yun! ¿Jarë xi meje rë xi chjaanrcun? ¿Há oro jan? o sá tsajin ne, ¿há yungun xi matitjun? ta, ngatsë rë yungun ne, vëhë xi camanchacun oro xi hincha cahntsua. <sup>18</sup>Hacuaha nújun ta: “Sá xi tuhun cjua nuju hane cuinújun xi ngasunscun yungun cuma testigu ne, sahmi ngu jyë xi nihñu chihin cjua nuju, peru sá xi nújun ta cuatjo xcun ngasunscun jan cuma testigu ne, sehe sahmi ngu jyë xi tuhun xi canújun.”

<sup>19</sup>iRcá yun! ¿Jarë xi meje rë xi



chjaanrcun? ¿Há cuatjo jan? o sá tsajin ne, ¿há ngasuncun ta, tsèhè xi xcun vèhè ngajan camachacun cuatjo? <sup>20</sup>Vèhè xi yo xi cuisiajmi hane cuichja me xi vèè ngasuncun ne, hacuaha tichja me xi vèè yèjè xi hinchasun xcun; <sup>21</sup>hacuaha yo xi cuisiajmi hane cuichja me xi vèè yungun xi matitjun ne, hacuaha tichja me xi vèè Nina xi tacun me ngajan. <sup>22</sup>Hane yo xi cuisiajmi hane cuichja me xi vèè ngahnga ne, hacuaha tichja me xi vèè cahndé hiscan sahmi Nina gobiernu hane hacuaha xi vèè Nina xi sahmi me.

<sup>23</sup>Jemu chojyihì tsujun, ngayun cha xi vicuya cjuachacun cojo ngayun cha partido fariseo. ¡Xuta ndacha yun! Ngayun ne, handasa tuhun diezmu nuju hisca cojo nchurca cojo ruda cojo yèjè sa xcusun ndeya ne, peru nihñuenduun xi nihñuchihin artículo rè ley xi hitsè sa meje rè Nina xi nihñuchuhun sacuaha xi chja cuitjin: nihñu hacutjin xi cjuaquixi cojo xingun, sacuaha xi mayuma nuju xingun, hane sacuaha xi ngu ni má cjuu nuju; hitsè sa ndaja sa canihñu yèjè xcusun vihi, hane canihñuendun tsèhè xcusun xi canihñu. <sup>24</sup>¡Ngayun ne xuta rcá yun xi meje ningacun ndiya! Nihñu sacuaha sahmi ngu xuta xi tsicaha me vinu rè me, sehe cuetjuxin ngu chu xihì xi jiya ngajñi rè. Peru cuma tsinguijne jingu me ngu chu camellu.

<sup>25</sup>Jemu chojyihì tsujun, ngayun cha xi vicuya cjuachacun cojo ngayun cha partido fariseo. ¡Jo xcun jo ntsuvun yun! Nihñu tyjahi táha ngaxtun ngu vasu cojo ngu

tyuva, peru cahntsua ne, quitsè camahani rè cjuachèjè cojo cjuatacun xi nimuju yèjè ni xcusun. <sup>26</sup>Fariseo rcá, titjun nihñu tyjahi cahntsua vasu cojo tyuva jan ta tsèhè xi cuatjin ne, hacuaha cuma tyjahi táha ngaxtun.

<sup>27</sup>Jemu chojyihì tsujun, ngayun cha xi vicuya cjuachacun cojo ngayun cha partido fariseo. ¡Jemu ndacha yun! Ngayun ne, tangun cun cojo ngu tsjun xi cahvi rè xujñu, ta ndaja tsejen tsjun jan, peru cahntsua ne, quitsè rè cojo ninda rè nima cojo yèjè ni xi jehndu. <sup>28</sup>Cuanitjin cun ngayun ta xi vutsejen xuta yun, tsejen sacuaha xuta ndaja tyjahi yun, peru cahntsua xahasen nuju ne, quitsè rè cojo cjuandacha cojo cjuatsehen.

<sup>29</sup>Jemu chojyihì tsujun, ngayun cha xi vicuya cjuachacun cojo ngayun cha partido fariseo. Ngayun ne, nindujun tsjun ndacun tsèhè yèjè ni nima profeta, hacuaha nihñu ndacun tsjun tsèhè nima xi tsajin xi cun rè me xcun Nina. <sup>30</sup>Hacuaha ngayun nújun ta: “Sá xi ngayin cavinechin nixtin hatsèè xi quicun xutachanga niji ne, cavisecuiin rè me xi tsiquehen me profeta xi cuacun vè ta cumacjain niji.” <sup>31</sup>Quihndè ne, cahyun ta cojo cjuu nuju vè, tuhun testigu condra nuju ta tsèhè xi ngayun ne hatuxa quihndi rè xutachanga nuju ngayun, hane me vèhè ne xi catsiquehen me profeta jan. <sup>32</sup>Quihndè ngayun ne, itangun cuéchun chuva rè cjuatsehen xi casahmi xutachanga nuju!

<sup>33</sup>Sacuaha cun yè chacun cuatjin cun ngayun, iquihndi rè yè yun!

¿Hacutjin cumá cuetjuntjun tsëhë castigu xi má hasen rë nima?

<sup>34</sup>Vëhë xi tsingátju sa nuju profeta cojo xuta xi quicun cjuatacun rë me cojo maestru ne, hane ngujo me ne, ngayun ne nicuhun me hacuaha cuetuhun me xcun cru. Ngujo nga me cjun rë me ngayun ngajan ndatsen yungun hacuaha tuhun rë me cjuañihi xi cuatju me sehe cuanga me ngu nandya ngu nandya.

<sup>35</sup>Cojo chuva vëhë ne, chanujujyun cjuaveya rë yëjë ni xuta xi tyjahi cjuatacun rë me xi cahme nguehe ngasunhdë. Chanujujyun cjuaveya rë xutachanga naja Abel cojo hisca cjuaveya rë xutachanga naja Zacarías quihndi rë Berequías, me xi canicuhun tiña ngasuncun hiscan ndatsen rë ndava Nina.

<sup>36</sup>Cuichjá quixë cojo nuju ta tsëhë cjuaveya rë yëjë ni me vë chanujujyun ngayujun ni xi nechun quihndë.

**Jemu choho camá rë Jesucristu ngatsë rë xuta Jerusalén**

<sup>37</sup>Ngayun xuta Jerusalén, ngayun xi cojo ndyojo nicuhun profeta xi tsingátju Nina ngajñi nuju! ¡Jemu choho má ná tsujun! ¡Mé hitsë ndiya xi meje scávëvaha nuju sacuaha javëvaha ngu nisë quihndi rë chu xi cuincha chu ngahma tyjunga rë chu! Peru ngayun ne, mijí nuju. <sup>38</sup>Chutsujun ni, Nina ne, catsismicacun me ngayun. <sup>39</sup>Cuichjá cojo nuju ta chuun camahani ná hisca hya xi cuechú nixtin xi cuinújun cuitjin: “iCatsinchacun Nina me xi titsingátju me ngajñi naja!” —Cuatjin cachja Jesús.

**Cachja Jesús xi cuetsun yungun**

**24** Hora xi tivetju Jesús tsëhë ndatsen yungun xi matitjun jan xi cjuí xin me ne, ngajan cafehe xuta ladu rë me caveyanangui me hane catsingacun tsja me xi yungun jan ne, jemu ndajyihi. <sup>2</sup>Hya xi camá ne, cuitjin cachja Jesús tsëhë yungun jan:

—Sacuaha yëjë ni ndihya vihi xi chutsujun tsëhë yungun ne, cuichjá cojo nuju ta cuechú nixtin xi hisca ngu ndyojo ndacun xi cuicun vi ne, tsajin xinchasuncoo xicjin ta cjuë yëjë cuixujne. —Cuitjin cachja Jesús.

**Hacutjin sacú cumachaya naja xi ha meje cuijnetaha nixtin vihi**

<sup>3</sup>Xi cafë cachja Jesús cuitjin ne, sehe cafehe me tiña rcu Ndetjún Olivu. Hane xi tacun suvá me, ngajan cafehe xuta ladu rë me, cavinenguise rë me cuitjin:

—¿Mé nújun? ¿Janihya cuetjucaa xcusun vëhë ni? ¿Hane hacutjin cuma sacú niji cjuaquixi xi ha tivechú nixtin xi nduvun ngayun tivechú hora xi cjuë nixtin rë ngasunhdë vi?

<sup>4</sup>Ngajan xi cachja Jesús cojo rë me cuitjin:

—Nechun cuidadu, cojo sa xi hacuini cuma ndacha ngayun ta, <sup>5</sup>tsëhë xi jemu cjín xuta cuetjucaa me xi cuichja me xi hacui me xi catsingátju Nina me. “Ngahan Cristu”, cuichja me. Hane cuatjin jemu cjín xuta cumacjain rë me cjuandacha rë me xi cuacun vë. <sup>6</sup>Hacuaha hya xi cumachaya nuju cjuá xi jemu yehe si tijima ngu

nación o sá xi tjin cjuacjintacun xi jemu yehe si nduva ne, xicarcuun ta, hatuxa tjin xi titjun xcusun vèhë cuma. Peru hacuiin ha hya cuijnetaha nixtin vihi. <sup>7</sup>Hacuiin hya cuma ta, titjun ne, scaan xuta ngu nación cojo jingu sa nación. Hacuaha scaan xuta ngu nandya cojo ngu nga nandya. Hacuaha jemu cjín cahndé xi cuma cuechu jindya. Jemu cjín cahndé xi cjuani nangui. <sup>8</sup>Peru xi cuatjin cumá yëjë ni xcusun vihi ne, sehe ntsacu tivetsihin cjuañihi xi cuatju xuta.

<sup>9</sup>Sehe cjuaha nuju xuta, cjucojo nuju me xi cuatjun cjuañihi, xi tsiquehen me ngayun. Hacuaha jemu chohovëë xuta rë yëjë nangui yun ngatsë naha. <sup>10</sup>Hya xi cumá ne, cjín xuta tsismicacun me ladu naha, hane tsindeya me cjuatacun rë me. Sehe cojo cjua ni cuiteña xicjin me. <sup>11</sup>Hacuaha jemu cjín profeta xi vindacha me xuta cuetjucaa me. Hane cuatjin jemu cjín xuta cumacjain rë me cjuandacha rë me. <sup>12</sup>Hacuaha cjuatsehen ne, jemu cumayehetaha. Vèhë xi hya ne, cumachuva cjuahmutacun xi tjin rë xuta. <sup>13</sup>Peru jarë ngayun xi scaa nuju cojo cjuacjintacun vèhë hisca xi cueyun ne, cuechun xcun Nina. <sup>14</sup>Hane xuta ne, cju me jingujyë ni ngasunhndë cuichja me cjuandajyihí vihi tsèhë gobiernu xi sahmi Nina, xi cumachaya rë xuta ngasunhndë. Hane hisca xi cuma chihin yëjë xcusun vèhë cuijnetaha nixtin vihi.

<sup>15</sup>Profeta Daniel ne, catsihindu me xcun xujun rë Nina tsèhë ngu xcusun tsehen xi tsinguetsun. Cuechún nixtin xi cuejña vèhë

xu cahndé ximinchacun —xuta xi vutaya cjua vi, catjahacuenda me cjua—. Hya xi cuatjin tsejen ne, <sup>16</sup>hya ne, xuta xi siu yëjë nandya tsèhë distritu Judea ne, catanga me hane catangahma me hiscan ndetjún. <sup>17</sup>Hacuaha jarë me xi hinchasun me rcu ndava me ne, mé tsèhë me xi siu cahntsua ndihya ne, mijí rë xi cjuējaha me. <sup>18</sup>Hacuaha ha chuva vèhë ni ne, xuta xi siutaha me nguijña ne, mijí rë xi cuya cjuējaha me tsjanga rë me ndava me. <sup>19</sup>Jemu chojyihí tsèhë yëjë yachjin xi hinchahma quihndi rë cojo yëjë me xi tjin rë quihndi vaqui xi cojo me cuanga me nixtin hya! <sup>20</sup>Chjahyun rë Nina xi cjuañihi vèhë ne, hacuiin cuinduva nixtin chan hnchan o sá nixtin xi chjahájenda rë ta, <sup>21</sup>tsèhë xi cjuañihi jyë xi cuma ne, ngu cjuandya jyë xi cjëë camahani camá hisca ntsacu cavetsihin ngasunhndë. Hacuaha cuyaaín cuma nga. <sup>22</sup>Jemu jyë cjuañihi jan, sá tsajin xi ha camachuva nixtin rë cjuañihi vèhë ne, hisca ngu xuta ne, cuetjintjiin me. Peru ngatsë rë cjuahmutacun xi tjin rë Nina cojo xuta xi cavaxijin me xi cuma ladu rë me ne, casahmichuva me nixtin vèhë.

<sup>23</sup>Hya ne, sá xi cuichja yahnga me cojo nuju ta: “Cuajyihí Cristu nguehe”, o sá “Cuajyihí me ngajan.” Xi camacjain nuju cjua jan ta, <sup>24</sup>tsèhë xi nixtin hya ne, jemu cjín xuta cuetjucaa me xi cuichja me cuindacha me ta Cristu me o sá profeta me. Hacuaha jemu sahmi me cjuarcun tsèhë xi meje cuindacha me xuta, hisca cojo

xuta xi cavaxijin Nina. <sup>25</sup>Quihndë ne cojo chaja sa xi cuechu nixtin vëhë ne, ngahan ne, ha cachjá cojo nuju. <sup>26</sup>Vëhë xi sá xi cuichja yahnga me cojo nuju ta: “Jemu xín tsëhë nandya tacun me”, hacuiin cuangun cojo me. O sá xi cuichja me ta: “Ndihya cahncun tacun me”, camacjain nuju tsëhë me ta, <sup>27</sup>sacuaha sahmi hasen ndihichuhún xi ha tu ñahñu sahmi hasen rë jinguyë ni ngahnga, hiscan ladu vetjucaa tsuhi hiscan ladu vetje tsuhi ne, cuatjin ha tu ñahñu scutsejen ná yëjë ni xuta hya xi cuinduvá nga ngahan xi Quihndi rë Xuta Jain. <sup>28</sup>Cuatjin cuma nixtin hya sacuaha chja cjuua ta hiscan jiña chu xi cahme ne, hacuaha ngajan matangun chu lote.

**Hya xi cuya nduva  
Quihndi rë Xuta Jain**

<sup>29</sup>Ngutjen xi camá cavatju cjuañihi jan ne, cuinduva nixtin xi cjuë ndavá rë tsuhi. Hacuaha sá ne, ha quihndë suaain ndavá rë. Hane niñú ne, cuixu tsëhë ngahnga. Hisca ngahñu xi tjin ngahnga ne, cjuiniyaya. <sup>30</sup>Hya xi camá ne, ngajan cuma tsejen seña tsëhë Quihndi rë Xuta Jain. Hane yëjë xuta xi siu ngasunhndë ne, jindayava me. Sehe hya scuëë xuta ngahan, xi Quihndi rë Xuta Jain ngahan, xi cuinduvá ngajñi rë yuffí cojo jemu jyë ngahñu, hisca seti hisca vatë jyihi ngahan xi cuinduva. <sup>31</sup>Hya ne, tsingátju ángel naha, hane xi ndaja hñu cuinuhya rë xi fane ngu tyjo, sehe cjuejaha rë yëjë ni xuta naha xi cavaxejen, sahmitangun rë me tsëhë jinguyëjë ni ladu ngasunhndë.

<sup>32</sup>Quihndë ne, ningatuhuntacún tsëhë ejemplu xi sua yaxujún: Hya xi cuetsihin cumá xcuen tsja rë tsëhë xi ha jemu camatiña cuetsihin cuetjusehen ne, ngayun ne, ha hyun ta ha jemu camatiña chan tsin. <sup>33</sup>Hacuaha chuva vëhë ni ne, hya xi chun xi cuetsihin cumá yëjë xcusun xi cachjá cojo nuju vë ne, vëhë sua cumachaya nuju xi ha camatiña nixtin rë, hisca meje cumá. <sup>34</sup>Cuichjá cjuaquixi cojo nuju ta xuta xi siu nixtin vihi ne siu cuaha me hya xi cuetjucaa xcusun xi cachjá cojo nuju jan. <sup>35</sup>Ngahnga cojo nguehe ngasunhndë ne, hatuxa cjuë. Peru hisca ngu cjuua naha ne, tsajin xi cuetjincaain.

<sup>36</sup>Sacuaha nixtin xi cuetjucaa cjuatacun vëhë ne, tsajin yo vëë rë. Hisca vñin ángel xi siu ngahnga. Hisca hveen ngahan xi Quihndi rë Xuta Jain. Suva tutu ni Nina nahmi naja ne, me vëhë xi vëë me.

<sup>37</sup>Sacuaha casahmi xuta hya xi cavéjña xutachanga naja Noé ne, hacuanitjin ni sahmi xuta hya xi cuinduva Quihndi rë Xuta Jain. <sup>38</sup>Tsëhë xi hya ne, xi chaja sa casesuntë nandan ngasunhndë ne, jine tjihvi xuta, vixan me, tsinguixan me quihndi rë me. Cuatjin casahmi cuaha me hisca nixtin xi cavisehen Noé cahntsua barcu. <sup>39</sup>Hacuaha camachayiin rë me hisca xi casesuntë nandá quijicojo rë yëjë ni me jan. Hacuaha cuanitjin ni sahmi xuta hya xi cuinduvá ngahan xi Quihndi rë Xuta Jain ngahan. <sup>40</sup>Jo cha ne, cuiyujutaha cha nguijña. Ngu cha ne, chjaháxin rë cha, hane cha xingu jan ne, cuejña cha.

<sup>41</sup>Hacuaha jo nga yachjin ne, cuiyujutaha na coho na. Ngu na ne, chjaháxin rë na, hane na xingu jan ne, cuejña na.

<sup>42</sup>Vëhë xi nechun cuidadu.

Hacuaha ningascun rë cjuatacun nuju ta ngayun ne, hyúun janihya cjuehe Nai nuju. <sup>43</sup>Hacuaha meje rë xi cumachaya nuju cjuatacun vihi: sá xi nai rë ngu ndihya ha machaya rë me hora xi cuinduva cha chëjë ndava me ne, suaaïn me cahndë xi scuxaha cha ndava me ne, sehe tsichëjë cha. <sup>44</sup>Hacuanitjin ni meje rë xi ngayujun ni ngayun ne, tuhun chjïnu yojo nuju ta, tsëhë xi hora xi ningatuuntacún xi cjuëhë ngahan xi Quihndi rë Xuta jain ngahan ne, hora vëhë cjuëhë.

**Xuta xi vihndë cojo xi  
vihndiin tsëhë Nina**

<sup>45</sup>¿Yo ngayun xi nihñu sacuaha sahmi ngu mosu hndixahan xi jemu quicun cacun xi sahmichihin yëjë ni hacutjin xi meje rë nai rë? Ngu hndixahan xi cjuahaxa xi cjuahacuenda rë yëjë sa hndixahan xi hora tjin sua xi sinë. <sup>46</sup>Jemu ndaja tsëhë ngu hndixahan jan xi tisahmi tutjin xi casuaxa rë nai rë. <sup>47</sup>Cuichjá cojo nuju cjuaquixi ta, nai rë hndixahan vëhë ne, suaxa me hndixahan vëhë xi hacuaha cjuahacuenda yëjë sa xcusun xi tjin rë me. <sup>48</sup>Peru cuejña na xi hndixahan vëhë ne, jemu choho xcusun rë me, tsingataha cacun cojo cjuatacun rë cuitjin: “Nai naha ne, tijima tafi sa xi cjuehe me.” Cuitjin tsingataha cacun. <sup>49</sup>Sehe cuetsihin cuaja rë hndixahan xi yahnga jan, hacuaha cuitjutaha

sinë cuihi hisca cuma chihi. <sup>50</sup>Peru cuechú ngu nixtin xi tsajin tacunya hndixahan vëhë, ngu hora xi hisca hvíin ne, hya cjuehe nai rë. <sup>51</sup>Hane jemu jyë castigu sahmi me, sehe tsingatju me cuatju tangun cjuañihi cojo xuta xi jo xcun jo hntsua me. Ngajan ne, jemu squihnda me, hacuaha tsijanerii me nehñu me.

**Ejemplu tsëhë të na nixti  
xi quiji na cjuavixan**

**25** <sup>1</sup>Hya xi cuechú nixtin xi sahmi Nina gobiernu ne, cumá sacuaha cavatju të na nixti xi cafaha na ndihi tsëhë aceite, sehe quiji na xi cuejñaya na cha xi cuixan hora xi nduva cha. <sup>2</sup>Hya xi camá ne, hñu na jan ne, rcu taja na, hacuiïn ndaja tsingatahacacun na. Peru hñu nga na jan ne, ndaja quicun na. <sup>3</sup>Cavejña xi na rcu taja ne, hora xi cafaha na ndihi ne, cafaain na aceite xi cuya cuincha na tsëhë. <sup>4</sup>Peru sacuaha na quicun jan ne, cafaha na ndihi ne, hacuaha xin cafaha na aceite. <sup>5</sup>Hane xi ma tafi xi nduva cha xi cuixan jan ne, cafaha rë na nijña ne, caviyujufë na. <sup>6</sup>Hya xi camá ne, sacuaha vasen nixten ne, canuhya rë xi jindaya xuta ta: “iNduva cha xi cuixan! Tangun tjengun cha xi cuanguncujun.” <sup>7</sup>Xi cuatjin canuhya rë ne, cavisatjenhnga na nixti jan ne, cavëhëchjine na ndihi jan. <sup>8</sup>Hya xi camá ne, cachja na xi taja rcu cojo na quicun cuitjin: “Tuhun niji hitsë aceite nuju ta meje cjuë xi tsijin ne, coho ndihi niji.” <sup>9</sup>Peru cafayangui na quicun cuitjin: “Cumaji tihin nuju ta sá cuitjin ne, cuechutaain tsëhë xi

cuma meje nuju hacuaha tséhë xi cuma meje niji. Hitsë sa ndaja ne, tangun hiscan xi xteña ne, hiscan ngajan chuhun.” <sup>10</sup>Cuatjin camá xi hora xi quiji cavatsë na jan aceite ne, cafehe cha xi cuixan. Hane na xi siuya ne, cojo na cavisehen na ndava suhi. Sehe casechjahñu tingotjo ndihya. <sup>11</sup>Hya xi camá ne, cafehe na nixti xi quiji jan, hane cajindaya na tingotjo ndihya cuitjin: “Tatá, chuxuhun tingotjo tsijin.”

<sup>12</sup>Peru me vëhë jan ne, cafayangui me cuitjin: “Hveen jani nduvun ngayun.”

<sup>13</sup>Vëhë xi nechun cuidado, hacuaha ningascun rë cjuatacun nuju ta ngayun ne, hyúun mé hora, hyúun mé nixtin xi cumá.

#### **Ejemplu tséhë tujún xi casua nai rë hndixahan**

<sup>14</sup>Cuejña ne xi ngu xuta jan ne, quiji me ngu nangui cjin. Hane chaja sa xi cjue me ne, cajindaya me mosu hndixahan rë me casua me xi cuejñatsja cha xi tséhë me. <sup>15</sup>Hora xi casua me ne, ngu cha, casua me cha hñu mil tujún, hane ngu nga cha ne jo mil, hane ngu nga cha ne ngu mil. Cuatjin casua me cha hatucutjin tsejen xi chutaha cha. Hya xi camá ne, cavetju me quiji me. <sup>16</sup>Ngajan camá xi cha xi cafahatsja cha hñu mil tujún ne, casahmi cha ngu negocio. Hane ngajan cavesun rë cha hñu cuatjin sa. <sup>17</sup>Hacuaha cha xi cafahatsja cha jo mil tujún ne, cuanitjin ne cavesun rë cha jo cuatjin sa. <sup>18</sup>Peru cha xi cafahatsja cha ngu mil tujún tséhë nai rë cha ne, quiji cha cafahangui cha ngu ngojo nangui.

Hane ngajan caveyanijihma cha tujún jan.

<sup>19</sup>Hya xi jercu cavatju nixtin xi quiji nai jan, cavuya cafehe me, cajindaya me cha xi sua cuenda cha tséhë tujún jan. <sup>20</sup>Ngajan xi cha xi cafahatsja cha hñu mil tujún ne, yaha cha hñu mil sa. Hane cachja cha cojo me ta: “Tatá, hñu mil catuhun ná, hindë ne, cavesun ná hñu cuatjin sa.” <sup>21</sup>Ngajan xi nai rë hndixahan jan ne, cuitjin cachja me cojo: “Ndatjin ri. Ngaye ne, ngu hndixahan ndaja ngaye. Ngatsë rë xi jemu ndaja canihñi xa lihndi vëhë ne, hitsë sa quisun xa xi sua ri. Quihndë ne, tehe cjuasua xahasen riji cojo ná.” <sup>22</sup>Sehe cafehe cha xi cafahatsja cha jo mil tujún. Hane cachja cha cuitjin: “Tatá, jo mil catuhun ná, hindë nguehe tacun tsujun jo cuatjin sa xi cavesun ná.” <sup>23</sup>Ngajan cachja nai jan cuitjin: “Ndatjin. Ngaye ne, ngu hndixahan ndaja ngaye. Ngatsë rë xi jemu ndaja canihñi xa lihndi vëhë ne, hitsë sa quisun xa xi sua ri. Quihndë ne, tehe cjuasua xahasen riji cojo ná.”

<sup>24</sup>Hacuaha cafehe cha xi cafahatsja cha ngu mil tujún. Hane cuitjin cachja cha: “Tatá, ha machaya ná xi ngayun ne, jemu hñu cjua nuju. Nangun xitjë handasa hacuiin ngayun xi canitjun. Ngayun ne, hacjahi sahmi xa ne, ngayun chjuhunntsun chji rë. <sup>25</sup>Vëhë xi tsácjun ngahan. Hane cëjë caveyaneje hma tujún nuju. Cuajyihí tujún nuju nguehe.” <sup>26</sup>Ngajan xi nai rë cha ne, catsicuya me tséhë cha cuitjin: “Ngaye ne, machjiriin ngaye. Ngaye ne, mosu

hndixahan tsehen. Sá xi hye xi fanga handasa hacuiin ngahan xi catsitjê, hye xi hacjahi sahmi xa ne, peru ngahan fahántsa chji rë, <sup>27</sup>hitsë sa ndaja xi xcun bancun cahmi chani tujún xi casuá ri, cojo sa xi hya xi cjuêhë ne, cúa cjuahántsa tujún naha, peru cojo quihndi rë.” <sup>28</sup>Sehe cachja me cojo me xi hinchacun jan cuitjin: “Chjuhuntuhan tujún xi yaha cha vë. Sehe tuhun rë cha xi tjin rë të mil tujún ta, <sup>29</sup>me xi ha tjin rë ne, sua sa Nina me, hisca vesun tsêhë. Hane me xi tsajin cjín jan ne, cjuahataha Nina hitsë xi tjin rë me. <sup>30</sup>Hacuaha chandunxin hndixahan xi machjiriin hiscan jñu ngajan candatsen. Ngajan ne, jemu squihnda me hacuaha tsijanerii me nehñu me.”

**Ejemplu tsêhë chu tsánga  
cojo chu tentsun**

<sup>31</sup>Hya xi cuya Quihndi rë Xuta Jain cuinduva me cojo hasen ndajiyihi tsêhë Nina hacuaha cojo ángel rë Nina cuinduva me, cuejña me cahndé hñu hiscan tsichuva me xuta. <sup>32</sup>Hane ngajan xcun me ne, cumatangun xuta rë jinguyëjê ni ngasunhndë ne, sehe scuxijin me xuta sacuaha sahmi ngu cha xi faha cuenda rë chu hora xi vaxijin cha chu tsanga tsêhë ngajñi rë chu tentsun. <sup>33</sup>Vinchaxin cha chu tsánga taha quixi rë cha, hane vinchaxin cha chu tentsun taha xcun. <sup>34</sup>Hya xi cumá ne, me xi matitjun jan, cuichja me cojo xuta taha quixi ta: “Nduvun nechun, ngayun xi catsinchacun Nina Nahmi naha. Ngayun xi

satë nuju cuisuhun gobiernu xi Nina cavêhëchjini me tsujun hisca ntsacu cavetsihin ngasunhndë. <sup>35</sup>Cuatjin satë nuju ta tsêhë xi hya xi vojo ná, canicjun ná. Hya xi xinda ná, catuhun ná nandá; xutaxín ngahan, peru catuhun cahndé cavitejñajenda ndya nuju. <sup>36</sup>Tsajin ná tsjian, peru catuhun ná tsjian xi mameje; hmu ná hane cafuhun cachusuhunyun ná; tejñaya ndavaya hane cafuhun cachutsujun ná.” <sup>37</sup>Sehe xuta tyjahi jan, tsicuya me cjuá cuitjin: “Tatá, ¿janihya camachaya niji xi vojo nuju, hane canicjin nuju? ¿O sá xi xinda nuju, hane catihin nuju nandá? <sup>38</sup>¿O janihya cachutsijin nuju nujyuhunyun sacuaha xutaxín hane catihin cahndé nechunjendun ndya niji? ¿Janihya cahyin xi tsajin nuju tsjian hane catihin? <sup>39</sup>Hacuaha ¿janihya cahyin xi hmu nuju o nechunyun ndavaya xi canduvintjenguin nuju?” <sup>40</sup>Sehe cuichja me xi matitjun jan ta: “Cuichjá quixi cojo nuju ta hya xi canihñu cjuandaja vë xi cavisecun rë tuyoni xuta yuma ladu naha ne, cavisecun ná ngahan.” <sup>41</sup>Hya xi camá ne, cachja me xi matitjun jan cojo xuta xi siu ladu scun rë me cuitjin: “Tangunxun ngayun xi cuatjun castigu rë Nina ne, tangun cuechún xcun ndihi xi catsindaja Nina xi cuisehen xitsehen xi matitjun cojo ángel rë. Ndihi jan ne, tsajin nixtin tsajin nixten xi coho. <sup>42</sup>Cuatjin satë nuju ta tsêhë xi hya xi vojo ná, ha canicjuun ná; hya xi xinda ná, catuun ná nandá; xutaxín ngahan, peru catuun cahndé cavitejñajenda

ndya nuju; <sup>43</sup>Tsajin ná tsjian, peru catuun ná tsjian xi mameje; hmu ná hane cafuun cachusunuun ná; tejñaya ndavaya hane cafuun chutsuun ná.” <sup>44</sup>Sehe cuinenguise me cuitjin: “Tatá, ¿janihya camachaya niji xi vojo nuju, o sá xi xinda nuju? ¿O janihya canutsijin nuju nujuhunyun sacuaha xutaxín, o xi tsajin nuju tsjian? Hacuaaha ¿janihya cahyin xi hmu nuju o nechunyun ndavaya? ¿Janihya cahyin vë xi cavisecuin nuju?” <sup>45</sup>Sehe cuichja me xi matitjun jan ta: “Cuichjá quixë cojo nuju ta tsëhë xi mijí nihñu cjuandaja vë xi cuisekun rë tuyoni xuta yuma ladu naha ne, mijí cuisekun ná ngahan.” <sup>46</sup>Sehe xuta jan ne, cuisehen me castigu xi nixtin nixten cumá, peru xuta xi tyjahi cjuatacun rë me ne, satë rë me cjuahñu xatsë xcun Nina.

### Camachihin cjuahacutjin xi chjahá rë Jesucristu

**26** Hya xi camá ne, xi cajnetaha cachja Jesús yëjë cjuahacutjin ne, sehe cachja me cojo xuta ladu rë me cuitjin:

<sup>2</sup>—Ha hyun xi chaja sa jo nixtin xi cuechú suhi tsëhë pascua ne hane ngahan xi Quihndi rë Xuta Jain ngahan ne, hatuxa hya cumá ngahan entregadu tsja xuta xi cuetaha ná xcun cru. —Cuatjin cachja me.

<sup>3</sup>Nixtin hya ne, yëjë nahmi xi matitjun cojo xuta changá rë xuta tjë rë Israel ne, casahmi me ngu junta ngajan ndihya jyë rë Caifás, me xi vitexa yëjë nahmi xi matitjun. <sup>4</sup>Ngajan xi caviyuju me cjuatacun rë me hacutjin xi cuma

cuidacha me Jesús cojo sa xi cuma cjuahahma me me xi tsiquehen me me. <sup>5</sup>Peru cachja me ta:

—Ndatjin xi cuinechanyan ne cuatju suhi, sehe chjahanhma cha, sá tu cumacjan rë xutacjín, hane cumá ngu suë jyë.

### Cavitejnu ngu chjuun aceite rcu Jesucristu

<sup>6</sup>Hya ne, Jesús ne, nandya Betania quitaha me. Tacun me ndava cha Simú, cha xi camandaja tsëhë chíhin vitaha xi casatë chuxin rë cha. <sup>7</sup>Hane ngajan camá xi cafehetjengui rë me ngu chjuun xi yaha na ngu frascu xi ndyojo camá, hincha ngu aceite ndaja xi jercu hnga chji rë. Hya xi camá ne, cavitejnu na aceite jan rcu Jesús hora xi tijinë me niñu. <sup>8</sup>Peru xi cavutsejen cha ladu rë me xi cuatjin casahmi na jan ne, camacjan rë cha cachja cha cuitjin:

—¿Mé má tu mahya ni catsichaja na aceite vë? <sup>9</sup>Sá xi xteña ne ndaja sacú tujún rë. Hane tujún vëhë ne cuma cuisecoo rë xuta yuma. —Cuatjin cachjataha cha na.

<sup>10</sup>Peru xi camachaya rë Jesús xi cuatjin chja cha ne, catsicuya me cjuahacutjin:

—¿Mé má cuatjin tivichuncjun tsëhë na ta jemu vengui chjí rë xcusun xi casahmi na cojo ná? <sup>11</sup>Xuta yuma ne, yëjë nu yëjë nixtin ne, siu me cojo nuju. Peru ngahan ne, hacuini yëjë nu yëjë nixtin tejña cojo nuju. <sup>12</sup>Tsëhë xi xi cavitejnu ná na aceite jan ne cojo tjun ni ne cuëhëchjine na yojo naha xi seyaniji ngahan. <sup>13</sup>Cuichjáquixë cojo nuju ta tuyani ni tsëhë



jingujyë ni ngasunhdë xi cuichja xuta cjuá tsëhë Nina ne, hacuaha cueyanangui me na vihi, cojo sa xi xuta xi yahnga ne, cumachaya rë me xcusun xi casahmi na cojo ná. —Cuatjin cachja Jesús.

**Judas casahmi cha compromisu xi cuiteña cha Jesús**

<sup>14</sup>Hya xi camá ne, ngu cha tsëhë ngajni rë me xi tejó xi má ladu rë Jesús, cha xi hmí rë Judas Iscariote ne, quiji cavisiajmi cha cojo nahmi xi matitjun <sup>15</sup>cavinenguise cha me cuitjin:

—¿Há cjin tujún tuhun ná sá xi sahme entregadu nuju Jesús?

Ngajan xi cavexqui me hane casua me cha cantë tujún tyava. <sup>16</sup>Hane ngajan cavejñaya cha ngu hora xi ndaja xi cuma sahmi cha entregadu Jesús cojo xuta xi cuacun jan.

**Hacutjin cajnë Jesús tsëhë suhi rë Pascua**

<sup>17</sup>Hya xi camá ne, nixtin xi tjun tjun tsëhë suhi xi chinë pan xi tsajin san rë, cafehe xuta ladu rë Jesús xi tejo jan, cachja cha cojo me cuitjin:

—¿Jani meje nuju xi cuihinchjini xi xine nguixun tsëhë suhi?

<sup>18</sup>Sehe cafayangui Jesús cuitjin:

—Tangun nandya Jerusalén. Hane xi cuechú ndava ngu cha xi cuacun jan ne, tinújun cojo rë cha cuitjin: “Chja maestru naja cuitjin: Meje cuechú hora naha, hindë ne, ndya nuju ne sínë niñu tsëhë pascua cojo xuta ladu naha.”

<sup>19</sup>Sehe quiji xuta ladu rë me ne, casahmi cha sacua ha xi cavitexa Jesús cha, hane cavëhëndaja cha xi sinënguixun me tsëhë pascua.

<sup>20</sup>Hya xi quiji hora jan ne, tijinë me niñu cojo xuta ladu rë me xi tejó jan, <sup>21</sup>hane ngajni hora xi tijinë me ne, cachja Jesús cuitjin:

—Cuichjá cojo nuju cjuaquixi ta ngu ngayun ne, nihñu ná entregadu. —Cuatjin cachja me.

<sup>22</sup>Ngajan xi jemu choho camá rë cha, cavetsihin cha cachja chuva ngu chuva ngu cha cojo rë me cuitjin:

—Nai, ¿há cumácacun xi ngahan sahme?

<sup>23</sup>Hya xi camá ne, cafayangui Jesús cuitjin:

—Ngu cha xi ngu ni tyuva tsinguísehenquinda niñu naha cojo ne, cha vëhë xi sahmi ná entregadu.

<sup>24</sup>Ngahan xi Quihndi rë Xuta Jain ngahan ne, hatuxa tjin ná xi cueya sacuatjin ha camá camahindu xcun xujun tsahan, peru jemu chojyihí tsëhë cha xi sahmi ná entregadu. Vengui sa chji rë xi catsiin cha.

<sup>25</sup>Sehe Judas, cha xi sahmi rë me entregadu cachja cha ta:

—Maestro, ¿há cumácacun xi ngahan sahme?

Ngajan xi cafayangui Jesús tsëhë cha cuitjin:

—Juun, quixi.

<sup>26</sup>Hora xi tijinë me comida ne, cafaha me ngu niñutsju hacuaha casua me nacuechji rë Nina ne, sehe cavotohocja me niñutsju jan, casua rë me xi tejó jan ne, sehe cachja me cuitjin:

—Chjuhun xinu. Vihi ne, yojo naha vi.

<sup>27</sup>Hya xi camá ne, cafaha me ngu vasu ne, sehe casua me nacuechji rë Nina, sehe cachja me cuitjin:

—Juhun vihi sehe siuhun ngajni ngayujun ni, <sup>28</sup>ta xan rë uva vihi

ne, vihi jni naha xi cuetju ngatsë rë xuta sehe cuma chihin compromisu xi cuaxëtje rë xuta tsëhë jyé rë me. <sup>29</sup>Hacuaha cuichjá cojo nuju ta quihndë cojo nixtin xi cjuiniji sa ne, ha quihndë cyaan cuëhë xan rë uva. Cuëhë, peru hisca hya xi cuëhë nga cojo nuju ngajan hiscan sahmi Nina gobiernu.

**Casua Jesucristu camachaya  
rë Pedru xi cuichja me xi  
hviiin me yo Jesucristu**

<sup>30</sup>Xi cajnetaha cajinë me ne, casë me ngu tsëhë Nina. Sehe cavetju me quiji me Naxi Olivu. <sup>31</sup>Hane sehe ngajan cachja Jesús cojo xuta ladu rë me cuitjin:

—Ngayujun ni ngayun ne, nismutacun ná hacuaha cuma ndaya cjuatacun nuju quihndë nguixun vi ne, hane cuejñu ná suva ta cumá sacuaha camahindu xcun xujun rë Nina xi chja xi: “Nina ne, tsiquehen me cha xi sahmi cuidadu rë chu tsánga, hane chu tsánga vë ne cuitsojo chu.” <sup>32</sup>Cuatjin cumá, peru hya xi cúya nga cjuahñu naha ne cjué titjun tsujun hisca distritu Galilea.

<sup>33</sup>Pedru ne, cafayangui cha cuitjin:

—Ha ndasa ngayëjë cha xi cuicun vi cuejña suva cha ngayun, hatuxa tsajin nixtin xi cojo ngahan sahme cuatjin.

<sup>34</sup>Hya xi camá ne, cuitjin cachja Jesús cojo cha:

—Cuichjáquixë cojo ri ta tajñu ni xi chaja squihnda xahnda ne, ha jyan ndiya cuinoje xi hyiin yo ngahan. —Cuatjin cachja Jesús.

<sup>35</sup>Cachja Pedru cuitjin:

—Ha ndasa hisca cueya cojo nuju ne, peru cuichjaan xi hveen yo ngayun.

Hacuaha cuanitjin ni cachja cha xi yahnga.

**Casahmi Jesucristu oración  
rë me ngajan Getsemaní**

<sup>36</sup>Sehe quiji Jesús cojo cha xi tejó jan ne, cafehe me ngu cahndé xi hmí rë Getsemaní. Ngajan cachja Jesús cuitjin:

—Nechun ni nguehe. Cjué nguvan hitsë ni cuisiajme cojo Nina. —Cuatjin cachja me.

<sup>37</sup>Hya xi camá ne, cavaxë me Pedru cojo jo cha quihndi rë Zebedeo xi quiji cojo me cha. Hane xi cjuí me ne, cavetsihin jemu camá va rë me, hacuaha jemu macjincacun me. <sup>38</sup>Sehe cachja me cojo cha cuitjin:

—Jercu choho camahani má rë xahasen naha, sacuaha xi vëhë ni tsiquehen ná. Nguehe nechuncun ngayun cojo ná.

<sup>39</sup>Sehe ngajan xi Jesús ne, quiji me hitsë nguvan. Hane ngajan cafañatsacjan me, cafehya rë me Nina cuitjin:

—Ngayun Nahmi naha, sá tjin sa ngu chuva rë ne, catisatiin ná cjuañihi xi cuátju cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan.

<sup>40</sup>Hya xi camá ne, cavuya cafehe me hiscan siu jyan xuta ladu rë me xi quijicojo me jan ne, casacutsja me xi siufë me. Ngajan xi cachja Jesús cojo Pedru cuitjin:

—Cahyun ni, ¿há camaji cavacun ngayun cojo ná hisca ngu hora

ni? <sup>41</sup>Nechuncun ngayun, nihñu oración nuju, sátu chjaháchuva nuju cojo cjuatacun nuju. Xahasen nuju ne, ndaja meje rë xi nihñu, peru yoju nuju ne, chuvacacun.

<sup>42</sup>Hya xi camá ne, camá jo ndiya xi quiji me nguvan cafehya me Nina cuitjin:

—Nahmi naha, sá xi cumaji cuatju chuva rë xi satiin ná cjuañihi ne, catama sacuatjin xi meje nuju ngayun.

<sup>43</sup>Hya xi camá ne, cavuya nga cafehe me hiscan siu jyan xuta jan casacutsja me xi siufë me ta jemu hai nijña rë me. <sup>44</sup>Hya xi camá ne, camá jyan ndiya xi quiji me nguvan ne hacuaha cojo vëhë nga ne, cafehya me Nina. <sup>45</sup>Sehe cavuya nga me cafehe me hiscan siu xuta jan ne, cachja Jesús cuitjin:

—¿Há tsjuñufun cahun? Chutsujun ne, ha cavechú hora xi ngahan Quihndi rë Xuta Jain ne, cjuaha ná xuta xi sahmi ná entregadu cojo xuta tsehen. <sup>46</sup>Tisatjunhngun, cuanguen chutsejen ta ha nduva cha xi sahmi ná entregadu.

#### Cafaha xuta Jesucristu

<sup>47</sup>Jinguyëjë rë xi tichja cuaha Jesús ne, cafehe Judas, cha xi cojo jiyajñi ngajñi rë cha xi tejó xi catsujyihya cojo me. Hacuaha jemu cjín xuta tivisecoo rë cha, xuta xi cavitexa nahmi xi matitjun cojo xuta changá xi quijijaha me Jesús. Hane yaha me quicha, yaha me ya. <sup>48</sup>Chaja sa xi cjuehe cha jan xi sahmi cha entregadu Jesús ne, cachja cha cojo xutacjín jan cuitjin:

—Cha xi cjué cuitatsuha xi suá rë nina ne, cha vëhë xi hacui cha.

<sup>49</sup>Xi tu cavechu cha hiscan nduva Jesús ne, ngutjen quiji casahmitiña cha tsëhë me hacuaha casua cha me nina cachja cha cuitjin:

—Cuhndanu, maestro —chja cha.

Hane quiji cavitatsuha cha me.

<sup>50</sup>Ngajan xi cachja Jesús cojo cha cuitjin:

—Tai, Nihñichihin xa vëhë xi candove.

Hya xi camá ne, quiji xuta jan ne, cafaha me Jesús. <sup>51</sup>Ngajan xi ngu cha xi secun cha cojo Jesús ne, cavaxë cha quichanduju rë cha, hane cavaja rë cha ngu cha mosu rë nahmi xi matitjun, hane cavatësun cha ngu ladu tyjavañuju.

<sup>52</sup>Ngajan xi cachja Jesús cojo cha cuitjin:

—Teyendeje quicha riji vë. Xuta xi tsicojo me quicha ne, hacuaha cojo quicha cueya me.

<sup>53</sup>¿Há hyuun ta sá xi cjuehya rë Nahmi naha ne, jemu cjín mil ángel tsingatju me cuisecoo ná? <sup>54</sup>Peru sá xi cuatjin sahme ne, ¿hacutjin cumachihin cjua rë xujun rë Nina? ta cuitjin meje rë xi cumá.

<sup>55</sup>Hya xi cajnetaha cachja Jesús cojo xuta ladu rë me ne, sehe cachja me cojo xutacjín cuitjin:

—¿Há nduvun chjuhun ná sacuaha ngu xuta xi chëjë me, xi cuatjin nduvun cojo ya cojo quicha vë ni? Xi cavitejñaya cojo nuju nchunchujun ni ndatsen yungun jan ne, cavetuhunntsuum ná cachjuun ná. <sup>56</sup>Peru cuitjin tijima cojo sa xi cuetjucaa jain hacutjin camahindu xcun xujun rë Nina xi catsihindu profeta.

#### Quiji me cojo Jesús ndava nahmi xi matitjun

<sup>57</sup>Hya xi camá ne, xi cafaha xuta jan Jesús ne, quijicojo me me

ndava Caifás, nahmi xi matitjun tsèhë yějë ni nahmi ta tsèhë xi ngajan ha camá tangun yějë ni cha xi vicuya cjuachacun cojo yějë ni xuta changá. <sup>58</sup>Pedru ne, hacuaha tjengui cha cjuí cha tu cjin tu cjin ni hacutjin cjuí xuta jan cojo Jesús hisca xi cavisehen cha ndatsen rë ndava nahmi xi matitjun jan. Hane ngajan cavéjña cha cojo cha nísë rë yungun cojo sa xi cumachaya rë cha mé cumá.

<sup>59</sup>Hane nahmi xi matitjun jan cojo yějë sa xuta xi matitjun ne, cavangui me xuta ndacha xi tsinguixi jyé rë Jesús, cojo sa xi cuma tsiquehen me me. <sup>60</sup>Peru tsajin mé jyé rë Jesús xi casacu rë me handasa jemu cjin má xuta ndacha xi cachja me. Hisca xi ha tisacuiyiin rë me hacutjin cuma, sehe cafehe jo cha ndacha xi cachja cha <sup>61</sup>cuitjin:

—Cha vi cuitjin cachja cha ta:  
“Ngahan ne, cuma tsinguétsun yungun xi matitjun vi xi casahmi xuta tsèhë Nina, hane cahntsua xi jyan nixtin ne, sahme nga ngu.”

<sup>62</sup>Ngajan xi nahmi xi matitjun tsèhë nahmi xi yahnga jan ne casecunvasen me, cavinenguise me Jesús cuitjin:

—¿Há chjayinnguini hisca ngu cjuá? ¿Mé noje tsèhë jyé xi vincha xuta jan?

<sup>63</sup>Hane Jesús ne, tu jyu ni casecun me. Sehe cachja nahmi xi matitjun jan cojo Jesús cuitjin:

—Cuitexa ri ngatsë rë xi macjain ri tsèhë ngu ni Nina quicun xi hora xi cjuahataha ri ne cuinoje cjuaquixi. ¿Há ngaye xi Quihndi rë Nina? ¿Há ngaye xi Cristu?

<sup>64</sup>Ngajan cafayangui Jesús tsèhë me ta:

—Sacuatjin nújun vë ne, cuatjin jain. Hacuaha cjuéhe nixtin xi chutsujun ná xi tejña ladu quixi tsèhë ngahñu rë Nina. Hacuaha chutsujun ná xi cuinduvajne ngajñi rë yufí tsèhë ngahnga.

<sup>65</sup>Hane ngajan xi nahmi xi matitjun tsèhë nahmi xi yahnga jan ne xi jemu camacjan rë me ne, hisca tsjian rë me cavicheya me. Hacuaha cuitjin cachja me:

—Tsixcuehyu cha Nina. Tsajin sa cjuá testigu xi mameje. Ngayun ne, ha canuhyun hacutjin tsixcuehyu cha Nina. <sup>66</sup>¿Mé nújun quihndë?

Ngajan cafayangui me cuitjin:  
—iMeje rë xi cueya cha!

<sup>67</sup>Hya xi camá ne, ngu jo me cavetsihin me cavèhënatya me Jesús hacuaha cavajaya me xcun. Yahnga nga me ne, cojo cahntsua tsja me cavaja me xcun Jesús.

<sup>68</sup>Cachja me cuitjin:

—Tinoje, ngaye Cristu, ¿yo xi cavaja ri?

### **Cachja Pedru xi hvíin me yo Jesucristu**

<sup>69</sup>Jinguyějë rë xi cuatjin tijima ne, Pedru ne, tacun me ndatsen ndihya. Hya xi camá ne canduva ngu na mosu hndixahan tsèhë nahmi jan, cafehe cachja na cojo Pedru cuitjin:

—Ngaye ne, ladu rë Jesús tsèhë distritu Galilea má ye.

<sup>70</sup>Peru xcun yějë me xi siu me ne, cafahahma me cachja me cuitjin:

—Hisca hveen mé xi noje.

<sup>71</sup>Hya xi camá ne, sehe cavetju me quiji me casecun me hiscan tu cuseen ni tsèhë ndatsen ndihya.

Hane ngajan xi ngu nga na cachja na cojo xuta xi siu ta:

—Cha vihi ne, ladu rë Jesús nandya Nasarét má cha.

<sup>72</sup>Hya xi camá ne, ngu ndiya nga ne cafahama me cuitjin:

—Vëë Nina xi hveen xuta jan.

<sup>73</sup>Hya xi cavatju ngu hora ne, sehe camatiña xuta xi hinchacun cojo Pedru jan cachja me cuitjin:

—Ha cjuaquixindaja ta ngaye ne, cojo ngaye nechin cojo cha xi cuajyihi vë, ta tsëhë xi cjuariji tsingacun xi xuta distritu vë ngaye.

<sup>74</sup>Ngajan xi cavetsihin nga Pedru cafahama me cjuaquixi hisca cachja me xi catinduva ngu cjuacjintacun xi cuatju me sá xi tichja me ngu ndesu. Cuitjin cachja me:

—Vëë Nina jain xi hveen yo me xi nújun vë.

Hane hora vëhë ne, cajihnda ngu xahnda. <sup>75</sup>Hane Pedru ne, catsinguitsjen me cjuar xi cachja Jesús cojo rë me xi cachja me cuitjin: “Chaja sa xi squihnda ngu xahnda ne, hacuaha camá jyan ndiya nújun xi hyúun yo ngahan.” Hane xi cavetju me candatsen ne, cajihnda susu me.

#### Casahmi entregadu me Jesucristu xcun Pilatu

**27** Hya xi camá nchujun ni ne, yëjë ni nahmi xi matitjun cojo yëjë xuta changá ne camatangun nga me xi sacuya rë me xcusun hacutjin cuma tsiquehen me Jesús. <sup>2</sup>Sehe catsihñu me Jesús ne, quijicani me xcun gobernador xi hmí rë Pilatu.

#### Cahme Judas

<sup>3</sup>Hya xi camá ne, Judas ne, cha xi cahami rë me entregadu,

camachaya rë cha xi cueya Jesús. Ngajan xi choho camá rë cha hane catsindeya cha cjuatacun rë cha. Quiji cha catsicuya cha catë tujún tyava jan cojo nahmi xi matitjun cojo xuta changá. <sup>4</sup>Cuitjin cachja cha:

—Jemu tjin jyé naha ta tsëhë xi casahme entregadu ngu me xi tsajin xi cun rë.

Peru cafayangui me cuitjin:

—iMé tsijin vë! Cjuacjintacun vë hatuxa tsiji sove.

<sup>5</sup>Hya xi camá ne, ngajan yungun xi matitjun ne, cacandi cha tujún tyava jan sehe cavatju cha quiji cha hiscan ngu cahndé xi cavityjanguí cha yojo rë cha hisca xi camá cahme cha.

<sup>6</sup>Nahmi xi matitjun jan cafaha me tujún tyava jan peru cachja me cuitjin:

—Cumaji cuinchan tujún vi cahntsua caxa tujún rë yungun ta tsëhë xi tujún vi ne, cavengui chji rë jni rë cha.

<sup>7</sup>Hya xi camá ne, cachuya rë me xi cuatsë me ngu xáhva xi chja xuta Nanguí rë Cha Chjinetiji. Xáhva jan ne cumachji rëhë xi xinchaniji xutaxín xi cueya me nanguí vë.

<sup>8</sup>Ngatsë rë xi cuatjin casacu xahva jan ne, hisca nixtin quihndë ne cahndé vëhë ne yaha ñihi xi Cahndé Tsëhë Jni. <sup>9</sup>Xi cuatjin camá ne, camachihin cjuar xi catsihindu profeta Jeremías xi cuitjin chja: “Cafaha me catë tujún tyava, xi cavejña chji rë cha xi cafehya xuta nanguí Israel, <sup>10</sup>sehe casua me tujún jan xi cjuaha me nanguí rë cha chjinetiji. Cuatjin cahami me sacuaha cavitexa Nina.”

**Xcusun xi cavatju Jesús xcun Pilatu**

<sup>11</sup>Hya xi camá ne, Jesús ne secun me xcun gobernador. Ngajan cavinenguise me Jesús cuitjin:

—¿Há ngaye xu matitjun ngaye tséhë xuta tjë rë Israel? —Cuatjin cavinenguise me.

Hane Jesús ne, cuitjin cafayangui me:

—Cuatjin sacuatjin nújun vë.

—Cuatjin cafayangui me.

<sup>12</sup>Peru hora xi nahmi xi matitjun cojo xuta changá jan cavincha jyé me Jesús ne, ndastu mé cafayangui Jesús. <sup>13</sup>Ngajan xi cachja Pilatu cojo me cuitjin:

—¿Há nuhyiin cjua xi chja me? Jercu cjín jyé riji cavincha me.

<sup>14</sup>Peru Jesús ne ha quihndé cafayanguiin me hisca ngu cjua. Hane Pilatu ne, jemu quijircun camahani rë me.

**Camá entregadu Jesús xi cjue cueya me**

<sup>15</sup>Tjin ngu xcusun xi nu nu ni, hya xi cumá nixtin rë suhi jan ne, tsismi gobernador ngu presu xi xuta vaxijin me. <sup>16</sup>Nixtin hya ne, jiya ngu presu xi jemu tjin cjua tséhë, Barrabás hmí rë cha. <sup>17</sup>Ngajan xi camá xi hya xi camatangun xutacjín ne, ngajan cavinenguise Pilatu xuta cuitjin:

—¿Jarë cha xi meje nuju xi tsisme? ¿Há Barrabás ne? ¿Há Jesús xi Mesías xu?

<sup>18</sup>Cuatjin cachja me cojo xuta ta tséhë xi ha vëë me xi ngatsë ni rë cjuaxin sahmi nahmi xi matitjun jan cojo Jesús, vëhë xi casahmi me entregadu xi meje rë me xi cueya.

<sup>19</sup>Hora xi tijimá vë, tacun Pilatu xcun silla hiscan vejña me hora xi vitexa me, ngajan xi chjuun rë me ne, catsingatju na cjua xi cuitjin chja: “Caninguisuunjnũu cjuacjintacun tséhë cha vë xi tyahi cjuatacun rë cha, ta nguchjin ne ngajñi nijña naha jemu cjín xcusun xi chocun camá ná chini ngatsë rë cha.” Cuatjin fi cjua xi catsingatju na.

<sup>20</sup>Hya xi camá ne, nahmi xi matitjun cojo xuta changá jan jemu cachja me cojo sa xi cama cuinchahaxi me xuta xi cjuehya xuta Pilatu jan xi tsismi me Barrabás ne, tsiquehen me Jesús.

<sup>21</sup>Ngajan cachja nga gobernador cuitjin:

—Tséhë jo cha vë ne, ¿jarë cha xi meje nuju xi tsisme?

Ngajan cafayangui xutacjín jan cuitjin:

—Nismu Barrabás.

<sup>22</sup>Sehe cachja nga Pilatu cuitjin: —Sá cuatjin ne, ¿mé xi sahme cojo Jesús xi Cristu xu?

Ngajan xi cafayangui yëjë xutacjín jan cuitjin:

—iTetuhun cha xcun cru!

<sup>23</sup>Ngajan xi cachja Pilatu cojo rë me ta:

—Peru ¿mé xi rcu jyé casahmi cha?

Peru xutacjín ne hitsë sa hñu cajindaya me cachja me cuitjin:

—iTetuhun cha xcun cru!

<sup>24</sup>Hya xi camachaya rë Pilatu xi sahmi cuendaain xuta xi chja me ta tu hitsë sa tijima ngu suë jyë ne, cafehya me nandá sehe cavane me tsja me xcun xutacjín jan. Sehe cachja me cuitjin:

—Quitjeen jyé tséhë cjuaveya rë cha vihi ta, tsajin jyé rë cha. Vëhë ne, ha chaha nuju vëhë.

<sup>25</sup>Hya xi camá ne, yëjë xutacjin jan ne, ngu tangun ni cafayangui me cuitjin:

—Tséhë cjuaveya rë cha vëhë ne, chanijjyin cojo quihndi nihi.

—Cuatjin cachja me.

<sup>26</sup>Hya xi camá ne, catsismi me Barrabás, peru casahmi me xi Jesús ne casehen rë me sehe casua Pilatu me xi cjue cueya me xcun cru.

<sup>27</sup>Hya xi camá ne cha sindadu xi vitexa gobernador ne, quiji cojo cha Jesús taha cahntsua ndava gobernador jan. Hane sehe casahmitangun sa cha yëjë sindadu cjin. <sup>28</sup>Hya xi camá ne, cavaxë cha tsjian rë Jesús, hane sehe catsicaja cha me ngu tsjian hani. <sup>29</sup>Hacuaha catsihya cha ngu corona nahyá sehe cavesun cha rcu Jesús hane cavisengui cha ngu bastón tsja me. Hya xi camá ne, cavixcuhnchi cha xcun me, catsixcuehyu cha me, cuitjin cachja cha:

—¡Viva! Me xi matitjun tséhë xuta tjë rë Israel.

<sup>30</sup>Hacuaha cavëhënatya cha me, hacuaha cafaha cha bastón jan xi yaha tsja me hane cavaja cha rcu me. <sup>31</sup>Hya xi camá xi cuatjin catsixcuehyu cha me ne, cafaxin cha tsjian hani jan, catsicaja nga cha me tsjian rë me. Hya xi camá ne, sehe quijicojo cha me xi cuetaha cha me xcun cru.

#### Casetaha Jesucristu xcun cru

<sup>32</sup>Hya xi cavetjun cjuicojo sindadu Jesús ne, cavechutaha cha ngu me xi hmí rë Simón tséhë

nandya Cirene. Sehe sindadu jan ne, casahmi cha ngujyë xi cuaniji me cru jan.

<sup>33</sup>Hane xi cafehe cha cojo Jesús hiscan xi hmí rë Gólgota, cjua xi meje cuichja Naxi Nínda Rcuun.

<sup>34</sup>Hya xi camá ne, casua cha me xan rë uva xi tecjan rë nandá rë tyjungunsa xi cuihi Jesús. Peru xi cavutaha me hitsë ne, cahviin me.

<sup>35</sup>Ngajan xi sindadu jan ne, xi cavatju casetaha me xcun cru ne, sehe cafaha cha tsjian rë me hane cavaxë cha suerte tséhë ne, jarë cha xi satë rë cha jima ngu tsjian.

<sup>36</sup>Sehe ngajan ne cavejñataha cha cavutsejensun cha Jesús xcun cru. <sup>37</sup>Hacuaha camahindu ngujo cjua xi casetaha xcun cru ngatihin rcu Jesús sacuaha xcusun rë me xi setaha xujun jyé rë xuta, hane cuitjin chja cjua jan: “Jesús, me xi Matitjun Tséhë Xuta Israel.”

<sup>38</sup>Hacuaha cavityanguí cha ngu chëjë ngu ngu ladu tjeheh rë me, jima ngu cojo cru rë. <sup>39</sup>Hya xi camá ne, xuta xi cavatju jan ne, catsixcuehyu me Jesús ne, catsitjiya rcu me, hacuaha cuitjin cachja me:

<sup>40</sup>—Ngaye xi ha canoje xi cuma ninguetin yungun xi matitjun, hane cahntsua xi jyan nixtin ne; cama nga canindeje ngu. Quihndë ne, sá cuatjin cuma nihni ne, naxetje sove yojo riji. Sá xi Quihndi Jain rë Nina ngaye, titujni tséhë cru vë.

<sup>41</sup>Ha chuva vëhë ni ne, nahmi xi matitjun ne cojo cha vicuya cjuachacun rë ley cojo xuta changá ne cachja me cuitjin:

<sup>42</sup>—Cavaxëtje xu cha xuta, peru quihndë ne, cumaji cuaxëtje suva

cha yojo rë cha. Sá xi hacui jain cha xi Matitjun Tsëhë Xuta Israel ne, catitujne cha tsëhë cru chutsejen, cojo sa xi cumacjain naja tsëhë cha.

<sup>43</sup>Macjain xu rë cha tsëhë Nina, quihndë ne cataxëtje Nina cha sá xi Nina meje rë me cha; ta cachja cha ta: “Quihndi rë Nina, ngahan.”

<sup>44</sup>Hacuaha cha chëjë xi cojo caxyangui taha cru jan ne, cojo cha choho cachja cha tsëhë Jesús.

### **Xcusun xi camá hya xi cahme Jesucristu**

<sup>45</sup>Hane hora vëhë ne, camajñu jingujyë ni. Cavetsihin xi camanchisen ne, quiji cani rë hisca fane jyan. <sup>46</sup>Hya xi camá ne, jercu hñu camahani cachja Jesús cuitjin:

—Elí, Elí, ðlama sabactani? -cjua vëhë meje cuichja ta: Ngayun Nina naha, mé má canismutacun ná.

<sup>47</sup>Hane ngujo xuta xi hinchacun jan ne, xi cajni rcu me hne jan hane cachja me cuitjin:

—Tijindaya me profeta Elías.

<sup>48</sup>Hya xi camá ne, ngtutjen ni, cavanga ngu me, quiji catsicahnchi me ngu tsjian hinda cojo xan rë uva xi ha sán, sehe cavetaha me rcu ngu ya nduju, sehe cavetaha me hntsua Jesús xi cuihingui me. <sup>49</sup>Ngajan xi yahnga xuta ne, cachja me cuitjin:

—Caveni tuhun. Cuinechanyan hitsë ne, ðhá cuinduva jain Elías cuaxëtje me cha?

<sup>50</sup>Hane Jesús ne, hora vëhë ne, jercu cajindaya nga me hane cahme me. <sup>51</sup>Hacuaha hora vëhë ni ne, tsjian nduju xi tyjanguí cahntsua yungun xi matitjun jan ne, hisca rcu hisca ntsacu canduva catiyavasen. Hacuaha

cafani nangui. Hacuaha cavacjan ndyojo. <sup>52</sup>Hacuaha hora vëhë ni ne, catuxaha tsjun rë nima, hane jemu cjin xuta xi tyjahi cjuatacun rë me xcun Nina ne, cavuya cjuahñu rë me. <sup>53</sup>Cavetjun xuta jan tsëhë tsjun. Hane hya xi ha cavuya cjuahñu rë Jesús ne, sehe cavisehen me nandya Jerusalén hane ngajan ne, cjin xuta ne, cavëë rë me.

<sup>54</sup>Hora xi cahme Jesús ne, cha capitán tsëhë cha sindadu cojo yahnga sindadu xi hinchacun me ngajan vutsejensun me Jesús ne, camachaya rë cha xi fani nangui cojo cjin xcusun sa xi cavatju camá. Hane jercu quijircun camaha ni rë cha. Hacuaha cachja cha cuitjin: —Hacui jain me vihi xi Quihndi Jain rë Nina, me.

<sup>55</sup>Hacuaha ngajan ne, tsëhë cjin ne hinchacun cuaha cjin yachjin xi tivutsejen me. Yachjin jan ne quijitjengui me Jesús xi cuisecoo me Jesús, sahmi cuenda me.

<sup>56</sup>Ngajñi yachjin jan ne, hinchajñi na xi cuicun vi: na María na Mágdala, hacuaha na María naa rë Jacobo cojo José, hacuaha cojo naa rë cha quihndi rë Zebedeo.

### **Caseya nima Jesucristu cahntsua tsjun**

<sup>57</sup>Hya xi cajne hora ne, ngu cha nchina xi hmí rë José, ngu xuta Arimatea cha xi hacuaha xuta ladu rë Jesús cha. <sup>58</sup>Cha vëhë quiji cha xcun Pilatu, cafehya cha cahndé sá xi cuma cjuahaxin cha nima Jesús. Hane Pilatu ne, casua me cha cahndé. <sup>59</sup>Ngajan xi cafahatsja cha nima jan ne, sehe catsitjinguí rë cha tsjian tyjahi, sacuaha xcusun



rë me. <sup>60</sup>Sehe caveya cha nima cahntsua ngu tsjun xatsë rë suva cha xi ha casahmi cha xi camá catjuhngui rë taha naxi. Sehe catsindefajne cha ngu ndoyojo jyë xi cuechja rë tingotjo rë tsjun jan. Hya xi camá casahmi cha ne, quiji cha cojo xuta ra. <sup>61</sup>Peru na María na Mágdala cojo na María xi hacjahi ne, caviyujutaha na xcun tsjun.

### Cha sindadu siu cuidadu cha tsjun

<sup>62</sup>Hya xi cumá nchujun ni ne, hya nixtin xi cjuahajenda rë me ne, hya camatangun nahmi xi matitjun cojo cha partidu fariseo sehe cachja cha cojo Pilatu. <sup>63</sup>Cuitjin cachja cha tsëhë Jesús:

—Nai, ngayin ne vitsjen niji xi hya xi chaja sa cueya cha cachja cha ndacha vë cuitjin: “Cahntsua jyan nixtin ne, cuya cjuahñu naha.”

<sup>64</sup>Ngatsë rë vëhë ne, meje rë xi nihñu cuendun xi sehñu ndaja tsjun rë cha hisca xi ha cavatju jyan nixtin jan, cojo sa xi cumaji nduva cha ladu rë nima vë ne, cjuahaxin cha nima tsëhë tsjun jan, sehe cuichja cha xi cavuya cjuahñu rë nima. Cuatjin nihñu ta tsëhë xi sá xi cuatjin sahmi cha, hisca hitsë sa choho cuatjuun cumá.

<sup>65</sup>Ngajan xi cachja Pilatu cojo rë me cuitjin:

—Sacu nuju sindadu jan xi sahmi cuidadu rë tsjun, sehe tanguncujun ne, hacuaha ndaja techjunhñu tsjun vë hacutjin cuma xi nihñu.

<sup>66</sup>Sehe quiji me cojo sindadu jan, cavechjahñu me tsjun, cojo sa xi cumatsejen sa xi cuaxë cha nima, hacuaha caviyuju cha sindadu xi sahmi cuidadu rë.

### Cavuya Jesucristu cjuahñu

**28** Xi cavatju nixtin xi chjahájenda rë jan ne, xi tu casahasen ni tsëhë nixtin ngu tsëhë totje ne, na María na Mágdala jan cojo na María xi hacjahi ne, cavetju na quiji vutsejen na xcun tsjun rë nima Jesús. <sup>2</sup>Hya xi camá ne, jercu cafani nangui ta tsëhë xi canduvajne ngu ángel rë Nina tsëhë ngahnga. Hane ángel jan ne, quiji catsivahaxin ndoyojo xi cavechja rë tingotjo rë tsjun jan, sehe cavejña xcun. <sup>3</sup>Ángel jan ne, sacuaha ndihi chuhun ne, cuatjin jyihi ángel. Hacuaha tsjian rë ne, jemu tu tyava camahani jyihi, sacuaha jyihi hnchan xi hmí rë nieve. <sup>4</sup>Xi camachaya rë me tsëhë ángel jan ne, jemu catsacjun sindadu xi siu cuidadu ngajan, hisca cafatsë hnchan cha hisca sacuaha cahme yojo ra cojo chircun. <sup>5</sup>Ngajan xi cachja ángel cojo yachjin xi siutaha jan cuitjin:

—Xicarcuun. Ha hvë xi Jesús vinchunsun me, me xi cavetaha xuta xcun cru. <sup>6</sup>Me vëhë ne, tsajin me nguehe ta cavuya me cjuahñu sacuaha cachja me. Nduvun chutsujun cahndé hiscan cafaña me. <sup>7</sup>Quihndë ne tangun sanii ne, tuhuncuendun rë xuta ladu rë me cuitjin: “Ha cavuya cjuahñu rë me; hane cjue titjun me tsujun Galilea. Hane ngajan sacu xingueen.” Hindë ne, vëhë cjua xi cuichjá cojo nuju.

<sup>8</sup>Hya xi camá ne, cavetju quiji yachjin jan. Jercu quijircun rë na peru hacuaha jercu ndama rë na. Cuatjin quiji na xi suacuenda na xuta ladu rë Jesús tsëhë cjua

xi cachja ángel. <sup>9</sup>Hane hora xi tifi na ndiya ne, Jesús ne cavechutaha me na jan, casua me na nina. Sehe chjuun jan ne, cafehetiña na tsêhê Jesús, caticjaxcun na cafaha na ntsacu Jesús hane cafaharcun na me. <sup>10</sup>Hya xi camá ne, Jesús ne, cachja me cojo na cuitjin:

—Xicarcuun. Tangun

tuhuncuendun rê hermano naja, tinújun cojo me xi cjue me distritu Galilea. Hane ngajan sacu xingueen.

### Cjua xi casua sindadu

<sup>11</sup>Jinguyêjê rê xi quiji yachjin jan ne, ngujo cha sindadu jan cavisehen cha nandya Jerusalén, casuacuenda cha nahmi xi matitjun tsêhê xcusun xi camá. <sup>12</sup>Sehe nahmi jan ne, hya xi ha camátangun me cojo xuta changá hane cavisiajmi cjin me tsêhê mé xi sahmi me. Hane xi cama chihin cjua ne, jemu cjin camahani tujún casua me cha sindadu jan, <sup>13</sup>hacuaha cachja me cojo sindadu cuitjin:

—Vihi cjua xi cuinújun ni.

Cuinújun ta xuta ladu rê me ne, nguixun ne, hora xi catsuñufun ne, cafehe me. Hane tahahma ne catsichêjê me nima. <sup>14</sup>Hane sá xi cumachaya rê gobernador tsêhê cjua jan ne, ngayin ne, cuanguin cuinújin cojo rê me cojo sa xi cuijnecacun me tsajin mé sahmi me cojo nuju.

<sup>15</sup>Cuatjin camá xi cafahatsja cha tujún jan, hane cachja cha sacuaaha cavitexa nahmi jan. Cjua vêhê ne, cavitsojo ngajñi rê xuta nangui Israel. Hane cuatjin chja cjua hisca nixtin quihndê.

**Jesús ne, casuaxa me xuta ladu rê me xi cjue cuichja me cjua rê Nina**

<sup>16</sup>Hya xi camá ne, xuta ladu rê Jesús xi má tengu me ne, quiji me distritu Galilea, hisca naxi xi cachja Jesús. <sup>17</sup>Hya xi camá ne, ngajan cavêê me Jesús ne, cafaharcun me me. Peru ngujo ni me macjaain rê me. <sup>18</sup>Ngajan xi camatiña Jesús tsêhê me, cachja me cojo me cuitjin:

—Ha cafahantsa ngahñu xi cumá sahme tu mé ni xcusun sá xi tsêhê ngahnga o sá xi tsêhê ngasunhndê. <sup>19</sup>Ngatsê rê ngahñu vêhê ne, tsingátju nuju ne, tangun jinguyêjê rê nandya ngasunhndê, cuinújun cojo xuta jan cojo sa xi cuisehen me ladu naha. Catiseyanangui ñihi rê Nina Nahmi, cojo ñihi naha, Quihndi rê Nina, cojo ñihi rê Hasen rê Nina hora xi xtenda me. <sup>20</sup>Hacuaha ticuyun rê me xi cuihndê me ne, sahmichihin me yêjê xcusun xi cavitéxa nuju ngahan. Hane xi cuatjin ne, hacuaha cuitejñacuaha cojo nuju yêjê ni hora hisca cuijnetaha nixtin rê ngasunhndê.